

## प्रस्थान

**ब्रेक्ब मुर:** एको किताब ब्रेक्ब मोसा बाक्ब, दे सां खेयप ब्रेक्बो बाक्ब। प्रस्थान १७:१४; प्रस्थान २४:४; प्रस्थान ३४:२७-२८

**गेना ब्रेक्बो:** एको किताब योसेफ बेक्म नोले रे परमप्रभु यावे आ ताम्बु सेल्ची ना सम्म इस्राएलीपुकीम इजीप्त रागीम श्येत जशो आ पर्बम बाक्ब। इस्राएलीपुकी ४३० बर्स सम्म इजीप्तम बाक्बो बाक्तेक्म। परमप्रभुम मेको आन श्येत जशो तशा, आ ठेयब सक्ति इजीप्त डा मुर आन कली कोंइशा, आ मुर इस्राएली आन कली श्येत रे प्रोना बाक्त। एको लोत्र गेना दुम्बो बाक्बा मेको मतुंडसीब। एको किताब मोसामी आ गेय पची ना ब्रेक्बो बाक्त।

### मार ब्रेक्बो:

१. इस्राएलीपुकी इजीप्त रागीम बाक्बो श्येत जशो प्रस्थान १:- १२:३६
२. इजीप्त रे गुंडशा, आन श्येत रे प्रोंइशो प्रस्थान १२:३७-१८:२७
३. परमप्रभु यावेमी मेकोपुकी नु कबल पशो

### इस्राएलीपुकीमी श्येत जशो

- 1 आन खिं खिं डा मुर लाइशशा, याकूब नु इजीप्त लाइब इस्राएल आ तौ सु सु बाक्मा बाक्त देंशा हना, उत्पत्ती ४६:८-२७
- 2 रूबेन, सिमियोन, लेवी, यहूदा,
- 3 इस्साकार, जबूलून, बेन्यामीन,
- 4 दान, नाप्ताली, गाद नु आशेर बाक्मा बाक्त।
- 5 मिनु याकूब आ तौ आन खिं खिं डा मुर नेल्ल पा ७० जना बाक्मा बाक्त। योसेफ चहिं इजीप्त रागीमी बाक्बो बाक्माक्त।
- 6 मिनु नोले योसेफ नु मेको आ लोक्ब आन पाला डा मुर नेल्ल बेक्मा बाक्त। उत्पत्ती ५०:२६

7 मिनु इस्राएल आ चच युइ सोशा बोशा शुश दुम्मा बाक्त। शुश दुम्शा डा मिन, बोल्यो दुम्मा बाक्त। मिनु इस्राएल आ मुरपुकीमी रागी नेल्ल ब्रीमा बाक्त। प्रेरित ७:१७-१९

8 मिनु नोले योसेफ कली मतुइक्ब पिप काम इजीप्त रागी कली सासन पवा बाक्त।

9 मेकोमी आ मुर आन कली “नेनीन, इं रागीमी बाक्शो इस्राएल डा मुरपुकी इं क्येडा शुश नु बोल्यो दुम्तेक्म।

10 मेको आन पबर्मी शुश मिम्शा, सल्ला पय। मो मपाइतय हना, मेको शुश दुम्शा, नोले लडाइ दुम्मेनु, इं जोरी सत्रु आन कली वारच पाइशशा, एक रे प्रोक्नीमी, कोर में” दे आ मुर आन कली माइक्मी बाक्त।

11 मोपतीके मेकोपुकीमी इस्राएली आन कली श्येत गेशा, गेय पपाइक्चा कली कोत्रब ठेयब मुरपुकी वोदमे बाक्त। मिनु इस्राएलीपुकीमी फाराओ माइशशो पिप आ मार मार वोइक्चा कली पिथोम नु रामेसेस सहर निक्शी सेल्मे बाक्त। उत्पत्ती १५:१३; उत्पत्ती ४७:११

12 तन्न इस्राएली गिश श्येत जामे, मिश बारना बारन शुश दुम्शा, इजीप्त रागी ब्रीमा बाक्त। मिनु मेको आन कली तशा, इजीप्त डा मुर शुश हिंमा बाक्त।

13 मोपतीके इस्राएली आन कली डोंइती क्येडा यो शुश गेय पपदमे बाक्त। उत्पत्ती १५:१३

14 शुश श्येत गेशा, शुश गेय पपदमे बाक्त। मार गेय पपदमे बाक्त देंशा हना, हिलो निपदमे बाक्त, इंटा सेल्पदमे बाक्त, रू डा गेय यो पपदमे बाक्त। तेको गेय गेमे, मेको शुश श्येत डा गेय बाक्माक्त।

### परमप्रभु कली मान पाइब मीश मुर

15 मिनु इजीप्त डा पिपमी हिब्रू मीश मुर आन आल थिची ना वारच पाइब आन ठेयब मीश मुर आस कली लोत्र पवा बाक्त। मेको आन दाते डा का आ नें शिप्रा नु अर्को आ नें पुआ बाक्माक्त।

16 मिनु फाराओमी “गे निक्शी हिब्रू मीश मुर आन कली आल थिची ना वारच पाइनीसी। तौ थिम्तेक्म हना, सतीसे। तमी बाक्त हना, मसतीसे” दे माइक्सी बाक्त।

17 तन्न मेको मीश मुर आन कली वारच पाइब नेल्लेमी परमप्रभु कली मान पा हिंशा, इजीप्त डा पिपमी देशो मपथु, वोंइश आल आन कली यो मसदमे बाक्त।

18 मिनु इजीप्त डा पिपम मेको वारच पाइब मीश मुर आस कली ब्रेशशा “गे मारदे वोंइश आल आन कली यो ब्रोंइचा गेसी? मारदे मोदेशो पसी?” दे लोत्र पवा बाक्त।

19 मिनु मेको मीश मुरुमी “हिब्रू मीश मुरपुकी इजीप्त डा मीश मुर आन क्येडा बोल्यो बाक्नीम। मोपतीके गो जाक्दीत्वा क्येडा डोंइती आल थिने थुम्शो बाक्नीमी” देसा बाक्त।

20 मोपतीके परमप्रभुमी मेको आल थिचा वारच पाइब मीश मुर आन कली आसीक गेवा बाक्त। मिनु इस्राएली शुश दुम्शा, बोल्यो दुम्मा बाक्त।

21 वारच पाइब मीश मुरपुकी परमप्रभु कली मान पा हिंतीके परमप्रभुमी मेको आन खिं कली यो आसीक गेवा बाक्त।

22 मिनु पिप फाराओमी आ मुर आन कली “हिब्रूपुकीमी दोशो तौ थीमे, मेको नेल्ल नील खोलाम लाइशशा ताइक्तीन। आन तमी आन कली चहिं ब्रोंइचा गेने” दे हुकुम पवा बाक्त।

## 2

### मोसा जरमेशो

1 लेवी आ थर डा मुर का बाक्माक्त। मिनु मेकोमी लेवी आ थर डा मीश आल का ग्युंबे पवा बाक्त। प्रस्थान ६:२०

2 मिनु मेको मीश मुरुमी तमी का नु तौ का थिमाक्त। नोले लेंशा आल कुरशा, तौ का थिमाक्त। आ थिशो तौ कली तशा “शुश दारशो आल बाक्ब” दे महिना सां सम्म खुइशशा वोदा बाक्त। प्रेरित ७:२०; हिब्रू ११:२३

3 मिनु नोले आल आ ममामी महिना सां डा आल कली खुइक्ने मचबा बाक्त। मिनु आल कली सुम्तीके पाइश्शो ग्युर सेल्शा, ब्वाक्कु मओत्रचा डा पा अल्कत्राम सिल्दा बाक्त। मिनु मेको आ तौ कली ग्युरुम कुर पा खोला आ नेक्था डा बुदी मीलु घांस आगा, ब्वाक्कुम वोदा बाक्त।

4 मिनु मेको आल आ दिदी “आं लोकब कली मार दुम्मे” दे डोन रे कोव्रदीम्माक्त। गन्ती २६:५९

5 मेना पिप आ तमी खोलाम चिक्चा कली जाक्दीम्माक्त। आ गेय पाइबपुकी यो खोला आ नेक्था लमा बाक्त। मिनु पिप आ तमीमी बुदी मीलु घांस आगा, ब्वाक्कुमी मेको ग्युर तशा, आ गेय पाइब का कली “मेको ग्युर ब्रथ लावो” दे सोइक्ता बाक्त।

6 मिनु पिप आ तमीमी मेको सुम्तीक पाइश्शो ग्युर रोक्शा कोव्रडानु “ए, आल का बाक्त” देंमाक्त। मिनु आल डाक्माक्त। मेको आल तशा, शिशी पवा बाक्त। मिनु पिप आ तमीमी “एको हिब्रू डा मुर आ तौ का बाक्ब” देंमाक्त।

7 मिनु आल आ दिदीमी “गो इन कली हिब्रू दूध तुंडब मीश मुर का चाक्गु? आल कली दूध तुंडबा को” दे हिल्लो पवा बाक्त।

8 मिनु फाराओ आ तमीमी “लो, चाक्को” दे मीश आल कली देंमाक्त। मिनु मेको मीश आलम आ ममा ब्रथ लमाक्त।

9 मिनु फाराओ आ तमीमी मेको मीश मुर कली “एको आल आं कली थुलो। एको आल थुल्शो डा, इ कली क्येट गेनुड” दे लोत्र पवा बाक्त। मिनु मीश मुरुमी आल लाइश्शा, थुला बाक्त।

10 मेको नोले आल कोल्माक्त। मिनु काबु मेकोमी मेको आल फाराओ आ तमी कली लाइश्शा, गेवा बाक्त। मिनु आ तौ खोदेशो दुम्माक्त। मिनु पिप आ तमीमी मेको आ नें मोसा वोदा बाक्त। मारदे हना “गो मेको कली ब्वाक्कु रे गुंडताक्ड” देंमाक्त। मोसा आ अर्थ हिब्रू लोत्रमी “ब्वाक्कु रे गुंडशो” देंशो बाक्ब।

मोसामी इजीप्त डा मुर साइश्शो

11 मिनु नोले मोसा ठेयब दुम्शा, आ लोकब आन कली ग्रुम्थ लशा, आन श्येत जशो ताप्तु। मेकोमी इजीप्त रागी डा मुरुमी आ हिब्रू लोकब का कली तुप्शो ताप्तु। प्रेरित ७:२३-२९; हिब्रू ११:२४-२७

12 मिनु मोसामी एर ओंथ कोत्रशा, सुइ मबाक्शो तशा, इजीप्त डा तुप्ब मुर कली साइक्तु। मिनु बाल्वामी थिम्तु।

13 आ दीसा मोसा लेंशा हिरथ लमेनु, हिब्रू निक्शी जिशा तुम्मुशो ताप्तु। मिनु मोसामी मरिम्शो पाइब कली “मारदे आंम लोकब कली तुबी?” दे हिल्लो पाप्तु।

14 मिनु मेकोमी “सुमी इ कली आंस होत्रप नु निसाफ पाइब सेला? इजीप्त डा मुर कली साइश्शो खोदेशो पा आं कली यो सद्दु, देंने?” देंत। मिनु मोसामी “मुल एको लोत्र, मुर नेल्लेमी तुइक्नीमी” दे मिम्शा हिंत। प्रेरित ७:३५

15 मिनु फाराओमी “मोसाम इजीप्त डा मुर का साइक्तु” देशो नेंशा, मोसा कली साइक्चा माल्तु। मोसा चहिं फाराओ आ बाक्तीक रे प्रोक्शा, मिदयान रागी जाक्दीश्शा, इनार तारी निश्शा बाक्त।

### मोसा मिदयान रागी प्रोक्शो

16 मिनु मिदयान रागीमी ७ जना तमी बाक्शो नाक्सो का बाक्माक्त। मेको मीश आलपुकीमी आन आफ आ क्यारश भेडा आन कली ब्वाक्कु तुंइचा, दे शुंगु ब्वाक्कुम प्रिंचा कली, ब्वाक्कु कीतेक्म। प्रस्थान ३:१

17 तन्न अरु गोठलापुकी जाक्शा, मेको आन कली श्येत गेम्तेक्म। मोसामी चहिं मेको मीश आल आन कली वारच पा, आन भेडा आन कली ब्वाक्कु तुंइताक्व।

18 मिनु मेको आन आफ रूएल आ खिं जाक्दीम्मानु, मेकोमी आ तमी आन कली “मुलाक्ती गे दोपा रीब पा जाक्नी?” दे हिल्लो पवा बाक्त।

19 मिनु मेको आ तमीपुकीमी “इजीप्त रागी डा वोंइश मुर कामी आंइ कली गोठला आन गुइ रे प्रोंइतु। मिनु शुश ब्वाक्कु कुर पा

आंइ क्यारश भेडा आन कली तुंइताकव” दे आन आफ कली मदमे बाक्त।

20 मेकोमी आ तमी आन कली “मेको मुर ते बाकमे? एक मारदे मचाकनी? मुल गो नु जथ ब्रेत्तीने” दे माइकमी बाक्त।

21 मिनु मोसा मेकोपुकी नु बाकचा बिस्साकव। रूएलमी मोसा कली आ तमी सिप्पोरा ग्युंवे पा गेप्टु। गन्ती १२:१

22 मिनु नोले तौ का थिप्टु। मिनु मोसामी मेको आल आ नें गेरशोम वोइक्तु। मारदे हना “गो मतुइश्शो रागीमी अर्को रागी डा मुर दुम्ती” देंत। प्रस्थान १८:४

परमप्रभुमी इस्राएली आन लोव्र नेंशो

23 मिनु शुश बर्स नोले इजीप्त रागी डा पिप बेकमाक्त। इस्राएल जात डा मुर इजीप्त रागीम वाइलीम वाइल खोदेशो दुम्शा, शुश श्येत जशा, परमप्रभु कली “वारच पाइय्यीकी” दे पुंइशा डाकमा बाक्त। मिनु परमप्रभुमी मेको आन डाकशो नेना बाक्त।

24 मिनु परमप्रभुमी अब्राहाम, इसहाक नु याकूब नु कबल पशो मिम्ता बाक्त। उत्पत्ती १५:१८; उत्पत्ती २६:३; उत्पत्ती २८:१३-१४

25 मिनु परमप्रभुमी आन श्येत जशो तशा शिशी पवा बाक्त।

### 3

परमप्रभुमी लोव्र पशो

1 मेना मोसा आ शिउ आ क्यारश भेडा योव्रथ लत। आ शिउ रूएल आ नें यित्री यो बाकमाक्त। यित्री चहिं मिदयान रागी डा नाक्सो का बाकमाक्त। मोसामी क्यारश भेडा आन कली गोरशो रागी डा नां पेरतीके गे योव्रतु। मोपा योव्रना योव्रन, होरेब माइश्शो परमप्रभु आ डांडा आ नेकथा जाकदीत्त। प्रेरित ७:३०-३४

2 मेकेर परमप्रभु यावे आ स्वर्ग डा गेय पाइब मी ब्रशो बुटा रे गूत। डोंइती दोदेशो बाक्त देशा हना, मोसामी डोन रे कोव्रडानु, ब्रशो बुटा का कली मीम काइ मनेकशो ताप्टु। ब्यवस्था ३३:१६

3 मिनु मोसामी “गो मेकेर लशा कोव्रचा माल्नुड। छक लाकचा डा बाकत। मारदे मीम मेरे बुटा कली मनेकगा?” दे आंमा लोव्र पाप्तु।

4 मिनु परमप्रभु यावेमी मोसा कली ब्रशो बुटा कोव्रथ पिशो तशा, परमप्रभुमी बुटा रे “मोसा, मोसा” दे ब्रेत्ताकव। मिनु मोसामी “गो एक बाक्ती” दे लोव्र लेत्ताकव।

5 मिनु लेंशा “एक मपिवो। इ जुत्ता प्रुतो। मारदे हना इ राप्शा बाक्तीके आं बाक्तीके बाकब। उत्पत्ती २८:१७; यहोसु ५:१५

6 गो इ आफ आ परमप्रभु इ किकी पिपी अब्राहाम, इसहाक नु याकूब आन परमप्रभु नड” दे मोसा कली लोव्र पाप्तु। मिनु मोसामी परमप्रभु कली तशा हिंशा, आ कुल सुम्साकव। उत्पत्ती १७:१; उत्पत्ती २८:१-४; उत्पत्ती ३५:९-११; मत्ती २२:३२

7 मिनु परमप्रभु यावेमी “गो इजीप्त रागीमी बाकशो आं मुर आन श्येत ताता। मेको आन कली गेय पपाइकब आन पबर्म डाकनीमी। गो आन डाकशो नेता, ताता। गो आन श्येत जशो तुइक्ताकड। प्रस्थान २:२३

8 मिनु मेको आन कली इजीप्त रागी डा मुरपुकीम गेशो श्येत रे प्रॉइनुडमी। गो आं मुर आन कली रिम्शो नु ठेयब रागी लाइक्नुडमी। मेको रागीम दूध नु खुदो शुश बाकब। मारेइ मारेइ यो शुश ग्रेल्ब। मेको रागी कनानी, हिती, एमोरी, परिज्जी, हिव्वी नु यबुसी आन बाक्तीक रागी बाकब।

9 नेनो, गो इस्राएल जात डा मुर आन डाकशो नेता। इजीप्त रागी डा मुरुमी मेको आन कली दिप्शा श्येत गेम्तेकम। गो मेको यो ताता।

10 गो इ कली फाराओ आ बाक्तीके सोइक्नुड। गो इस्राएल जात डा मुर आन कली इजीप्त रागी रे गुंडदो” दे परमप्रभुमी मोसा कली माइक्तु। प्रस्थान ७:१६; न्यायाधीस ६:१४

11 मिनु मोसामी परमप्रभु यावे कली “गो दोपा मो पने चाप्नुडा? फाराओ आ बाक्तीकेमी लशा, इस्राएल जात डा मुर आन कली इजीप्त रागी रे दोपा गुंडने चाप्नुडा?” दे परमप्रभु कली देंत। प्रस्थान

४:१०; उत्पत्ती ३२:११; २सामुएल ७:१८; यसैया ६:५,८; येरमीया १:६

12 मिनु परमप्रभुमी “गो थमा पा, गे नु बाक्नुड। इ कली सोइक्ब गो नड, दे चिन्ड का कोंइनन। मेको चिन्ड मार बाक्त देंशा हना, गे इस्राएल जात डा मुर आन कली इजीप्त रागी रे ग्रुंइशा नोले एको परमप्रभु आ डांडामी आं कली ठेयब सेल्नीनी” दे माइक्तु। येरमीया १:८

### परमप्रभुमी आ नें तुइक्पाइशो

13 मिनु मोसामी परमप्रभु कली “गो इस्राएल जात डा मुर आन बाक्तीके जाक्दीशशा, मेको आन कली ‘इन किकी पिपी आन परमप्रभुमी आं कली इन बाक्तीके सोइक्ताक्यी’ देंडानु, मेकोपुकीमी चहिं ‘मेको आ नें मार में?’ दे हिल्लो पाइनीम। मेना गो मार देंनुडा?” दे हिल्लो पाप्तु।

14 मिनु परमप्रभुमी मोसा कली “आं नें ‘गो नड’ बाक्ब। इस्राएल जात डा मुर आन कली ‘गो नड’ देंबमी आं कली इन बाक्तीकेमी सोइक्ताक्यी, देंचा माल्नेवे” देंत। प्रस्थान ६:२; मलाकी ३:६; प्रकाश १:४,८

15 मिनु लेंशा परमप्रभुमी मोसा कली “इस्राएल डा मुर आन कली मार देंचा माल्नेवे देंशा हना ‘परमप्रभु यावे, इन किकी पिपी अब्राहाम, इसहाक नु याकूब आन परमप्रभुमी इन कली गुमथ सोइक्ताक्यी। आं नें गेना हना यो लीब। नेल्ल पाला डा मुरुम आं नें आन थुंमी मिम्शा वोइक्चा माल्नीम’ देंचा माल्नेवे। प्रस्थान ६:२-३; यसैया ४२:८

16 गे इस्राएल जात डा मुर आन खाल्पा आन कली खुपथ लावो। मिनु मेको आन कली ‘परमप्रभु यावे इन किकी पिपी आन परमप्रभु आं डोंइती गूत। अब्राहाम, इसहाक नु याकूब आन परमप्रभुमी आं कली गुमथा, लोत्र पाप्तु’। मेकोमी आं कली ‘गो थमा पा इन कली गुमथ यिती, इजीप्त रागीम इन कली गिश श्येत गेमे, मेको ताता।

17 गो इन कली इजीप्त रागी डा मुर आन गेशो श्येत रे प्रोंडनुड। गो इन कली कनानी, हिती, एमोरी, परिज्जी, हिव्वी नु यबुसी आन बाक्शो रागी गेनुड। मेको रागीम दूध नु खुदो शुश बाक्ब, अन्न यो शुश ग्रेल्ब। गो आं देशो लोव्र खाप्नुड' देंत, देंचा माल्नेवे।

18 इ देशो लोव्र नेंशा, टिम्तेक्म हना, गे नु इस्राएल डा मुर आन खाल्पापुकी इजीप्त रागी डा पिप आ बाक्तीक लशा, मेको कली लोव्र पचा माल्नीनी। गेमी इजीप्त रागी डा पिप कली 'परमप्रभु यावे हिब्रू आन परमप्रभुमी आंइ कली गुम्तीकी। आंइ कली नाक्त सां गोरशो रागीम लचा गेकी। मेकेर परमप्रभु यावे आंइ परमप्रभु कली चढ्थे लाइनीकी' दे पिप कली देनीन। प्रस्थान ५:१, ३

19 मेको पिपमी चहिं इन कली लचा मगेब, गो तुइक्नुड। गो थम ठेयब सक्तिमी इन कली वारच पाता हना ला, लचा गेब।

20 मिनु गोमी इजीप्त रागी डा मुर आन दातेमी थम छक लाक्चा डा गेय कोंइशा, मेको आन कली श्येत गेनुड। मिनु नोले मेकोमी इन कली लचा गेब।

21 इजीप्त रागी डा मुरपुकीमी इन कली दाक्ब सेल्नुडमी। इजीप्त रे ग्रनीनु, श्येतथ ग्रूचा ममाल्नीनी। प्रस्थान ११:२-३; प्रस्थान १२:३५-३६

22 मीश मुर नेल्लेमी आन नेक्था डा इजीप्त रागी डा वारच रे सुन, चांदी नु वासी पुंइचा माल्नीम। आन तमी तौ आन कली पांइपाइक्चा माल्नीम। मोदेशो पा इजीप्त डा मुर आन शोंप रोइक्चा माल्नीनी" दे परमप्रभु यावेमी मोसा कली देंत।

## 4

परमप्रभुमी मोसा कली चिन्ड कोंइशो

1 मिनु मोसामी परमप्रभु कली "मेकोपुकीमी आं देशो थमा मसुइक्थु, मटीनीमी कों? 'परमप्रभु यावेमी इ कली मगुम' देंनीमी कों" देंत।

2 मिनु परमप्रभु यावेमी “इ गुइमी मार कुरी?” दे हिल्लो पाप्तु। मिनु मोसामी “कोक्के कुरता” देंत।

3 मिनु “खपीम ब्वारदो” देंत। मिनु मोसामी आ कोक्के ब्वारदानु, बुस्स दुम्त। मिनु मोसा मेको तशा प्रोक्त। प्रस्थान ७:१०

4 मिनु परमप्रभु यावेमी “आ मीलुम ग्याइक्तो” देंत। मिनु मोसामी आ गुइ दिंशा, बुस्स कली ग्याइक्दीमेनु, आ गुइमी लेंशा कोक्के दुम्त।

5 मिनु मेको तशा, मेकोपुकीमी “परमप्रभु यावे, आन किकी पिपी अब्राहाम, इसहाक नु याकूब आन परमप्रभुमी इ डोंइती गूशा, इ कली गुम्तु, दे थमा सुइक्नीम” देंत।

6 मिनु परमप्रभु यावेमी लेंशा “इ गुइ इ फेक्शो वा आगाम वोतो” देंत। मिनु मोसामी मो पाप्तु। मिनु नोले आ गुइ ग्रुंइशा कोव्रडानु, कोव्रर मुशा बुश दुम्शो ताप्तु।

7 मिनु मेकोमी “लेंशा, इ गुइ इ फेक्शो वा आगाम वोतो” देंत। मिनु वोइश्शा ग्रुंइदानु, आ गुइ डोंइती डा खोदेंशो पा सेस दुम्शो ताप्तु।

8 “इ डोंइती डा चिन्ड तशा, इ लोव्र थमा मसुइक्थु, मटिम्तेक्म हना, नोले डा चिन्ड तशा, थमा सुइक्नीमी को?”

9 तन्न मेकोपुकीमी चिन्ड निक्शी तशा यो, थमा मसुइक्थु, इ कली मटिम्तेक्म हना, गे नील खोला डा ब्वाक्कु लाइश्शा, सोव्रशो खप तारी मोतो। खोला रे लाइश्शा ब्वाक्कु सोव्रशो खप तारी मोदीनु, मेको हुश दुम्ब” दे परमप्रभु यावेमी देंत। प्रस्थान ७:१७-२१

10 मिनु मोसामी परमप्रभु यावे कली “आं परमप्रभु, गो लोव्र पस मजोक्नुड। गे, मुल इन गेय पाइब नु लोव्र पनीनु यो, आं कली लोव्र पचा मपी। गो थांइशो लें पाइश्शो मुर बाक्नुड” देंत। प्रस्थान ३:११; प्रस्थान ६:१२-३०

11 मिनु परमप्रभु यावेमी “सुमी मुर आ शोव्र सेला? सुम लोव्र पपाइक्ब, नोफा नेंब नु मनेंब, मिक्च ताइब नु मताइब सेला? गो,

परमप्रभु यावे मनडा डा? भजन संग्रह ९४:९

12 मुल लावो। गो इ कली लोव्र पपाइक्नुड, मार देंचा माल्बा, मेको इ कली शेंनुड” देंत। ब्यवस्था १८:१८; मत्ती १०:१९

13 मोसाम चहिं “आं परमप्रभु, आं पा डा अरु कली सोइक्ने चाप्नीनी कों? तन्न आं कली मसोइक्तीनी” देंत।

14 मिनु परमप्रभु यावे मोसा आ पबर्म गाइश्शा “लेवी थर डा इ लोकब हारून रिम्शो लोव्र पस जोक्ब बाक्ब, गो मतुइक्नुडा डा? मिनु मुल इ कली गुम्थ जाक्ब। इ कली तशा शुश ग्येरब।

15 गो इ पचा माल्शो लोव्र नेल्ल शेंनुड। मिनु गे मेको हारून कली देंचा माल्नेवे। मिनु मेकोमी इ पा डा मुर आन कली लोव्र पचा माल्ब। मेको इ शोव्र खोदेशो दुम्ब। गो इ कली लोव्र पाइब परमप्रभु खोदेशो पा, गे हारून कली लोव्र पाइब बाक्नीनी।

16 दोपा गो, परमप्रभुम इ कली लोव्र पाइनुडा, मोपा गे हारून कली लोव्र पचा माल्नेवे। मिनु मेकोमी मुर आन कली लोव्र पचा माल्ब। प्रस्थान ७:१-२

17 मेको कोक्के लाइश्शा, आं देशो चिन्ड कोइदो” दे परमप्रभु यावेमी मोसा कली माइक्तु।

### मोसा इजीप्त रागी लेशो

18 मिनु मोसा आ शिउ, यित्रो आ खिं लशा, मेको कली “इजीप्त रागीम बाक्शो आं लोकब आन कली गुम्थ लचा गेयीनी। बेक्मा कों, ब्रोंइमा, गो तुइक्चा दाक्ती” दे पुंइतु। मिनु यित्रोमी “इ थुं नाइश्शा, लावो” देंत। प्रस्थान ३:१

19 मिनु मोसा मिदयान रागीम बाक्मेनु, परमप्रभु यावेमी “लेंशा इजीप्त रागी लावो। मारदे हना इ कली साइक्चा माल्बपुकी बेक्तेक्मे” दे लोव्र पाप्तु।

20 मिनु मोसा आ मीश नु आ तौ निक्शी नु गधा डोइश्शा, इजीप्त रागी लेत्त। परमप्रभु आ गेशो कोक्के यो कुरतु। प्रस्थान १८:३-४

21 मिनु परमप्रभु यावेमी मोसा कली “इ नोफा दाइशशा नेनो। गे इजीप्त रागी जाक्दीशशा, गो इ कली पपाइशशो छक लाक्चा डा गेय नेल्ल फाराओ आ डोंइती पावो। गो चहिं मुर आन कली लचा मगेचा डा पा फाराओ कली काइ मटीब सेल्लुड। प्रस्थान ७:३, १३; ब्यवस्था २९:३; यसैया ६:१०; रोमी ९:१८

22 मिनु गे मेको कली ‘परमप्रभु यावेमी इन कली मार लोव्न पाप्तु देंशा हना, इस्राएल आं डोंइती जरमेशो तौ बाक्ब। ब्यवस्था ३२:६

23 आं तौ कली आं कली चढ़ेतीक चढ़ेथ लचा गेवो। गे मटिप्तीवी हना, गो इ डोंइती जरमेशो तौ कली साइक्नुड’ देंत, देनो” दे परमप्रभु यावेमी मोसा कली माइक्तु। प्रस्थान ११:५; प्रस्थान १२:२९

### मोसा आ तौ कली चिनु खोइशशो

24 मिनु लांम बास बाक्मानु, परमप्रभु यावेमी मोसा आ नेक्था जाक्शा, मेको कली साइक्चा माल्लु। उत्पत्ती १७:१४; उत्पत्ती ३२:२५

25 मिनु सिप्पोरामी चहिं हेशशो फुल्लु का गुप्शा, आ तौ कली खोइक्तीक चिन्ड खोदा बाक्त। मोपा मेकोमी आ तौ आ चारतीक डा कुशुल खोइशशा, आ तौ आ कुशुलम मोसा आ रां थिशा “गे हुश के ग्युम्ले नवे” देंमाक्त। यहोसु ५:२

26 मोदेशो पतीके, परमप्रभुमी मोसा कली मसाइक्थु, प्रोना बाक्त। सिप्पोरामी मारदे “हुश के ग्युम्ले” देंत देंशा हना, खोइक्तीक चिन्ड रे हुश यिमाक्त।

### मोसा नु हारून

27 डोंइती परमप्रभु यावेमी हारून कली “मोसा गोरशो रागीम जाक्चा चिक्शो बाक्ब। मेको कली गुम्थ लावो” दे माइक्तु। मिनु लशा, परमप्रभु आ डांडाम मोसा कली गुम्शा, पुक्पु पाइक्तु।

28 मोसामी आ कली सोइक्ब परमप्रभु यावे आ लोव्न नेल्ल नु आ पचा माल्लशो चिन्ड यो हारून कली शेंताक्व।

29 मिनु मेको निक्शीमी इस्राएली आन खाल्पा नेल्ल आन कली खुप्ताक्से।

30 हारूनमी परमप्रभु यावेमी मोसा नु पशो लोव्र नेल्ल मेको आन कली शेंताक्व। मोसा कली कोंइशो चिन्ड, हारूनमी मुर आन डोंइती कोंइताक्व।

31 मिनु मुरपुकीमी थमा सुइक्तेक्म। मिनु परमप्रभु यावेमी इस्राएली आन कली ग्रुम्शा, आन श्येत तशा, वारच पचा चिक्शो तुइश्शा, मेकोपुकी बाप्शा, परमप्रभु कली ठेयब सेल्लेक्म। प्रस्थान ३:१६

## 5

मोसा नु हारून आस लोव्र

1 मिनु नोले मोसा नु आ लोकब हारून फाराओ ग्रुम्थ लाम्ताक्स। मिनु मेको कली “परमप्रभु यावे, इस्राएली आन परमप्रभुमी आंस कली लोव्र पाप्तु। मेकोमी ‘आं मुर आन कली गोरशो रागीमी आं पबर्म चाड मानेचा कली लचा गेवो’ दे परमप्रभु यावेमी इन कली देशो बाक्ब” देंताक्स। प्रस्थान ३:१८; प्रस्थान ७:१६, २६; प्रस्थान ९:१, १३

2 मिनु फाराओमी “परमप्रभु यावे सु बाक्म, गो मतुइक्नुड। मार, आ देशो लोव्र टिचा माल्नुडा? गो इस्राएली आन कली मारदे लचा गेनुडा? गो परमप्रभु यावे कली मतुइक्नुड। मोपतीके इस्राएल डा मुर, इन कली लचा मगेनन्नी” देंत।

3 मिनु मेको निक्शीमी “हिब्रू मुर आन परमप्रभुमी आंस कली ग्रुम्तु। आंइ कली लचा गेने, दे पुंइनस्कु। गोपुकी रोइमी, लडाइमी मबेक्कल, दे परमप्रभु यावे, आंइ परमप्रभु कली चढेथ नाक्त सां सम्म गोरशो रागीम लचा गेने” दे माइक्ताक्स।

4 मिनु इजीप्त डा पिपम मेको आस कली “मोसा नु हारून, गे मारदे मुर आन कली आन गेय क्योल्चा माल्नीसी? इस गेय पथ लस” देंत।

## इस्त्राएली आन कली श्येत गेशो

5 मिनु फाराओमी लेंशा “नेनीस, इस जात डा मुर शुश दुम्तेकम। गे मेको आन कली आन गेय रे नाइक्चा गेचा माल्सी?” दे मोसा नु हारून आस कली हुइक्ताक्व। प्रस्थान १:७, १२

6 मोपतीके मेको नाक्ती रे फाराओमी गेय पपाइक्ब ठेयब मुर नु कोव्रब मुर आन कली

7 “मुल रे इस्त्राएली आन कली इंटा सेल्चा कली पराल मगेचा, आंमा गुप्थ लचा माल्नीम।

8 तन्न इंटा चहिं डोंइती दोशो सेल्मे, मुल यो मोशोन सेल्चा माल्नीमी। मिनु आन गेय डोंइती पशो खोदेशो पा पचा माल्नीम। मारदे हना आन गेय मबाक्मेनु, मेकोपुकीमी ‘गोपुकी गोरशो रागीम आंइ परमप्रभु कली चढ़ेचा दाक्नीकी’ दे लोव्र पशा ग्रीनीम।

9 मेको मुर आन कली शुश गेय पपाइश्शा श्येत गेचा माल्नीनी। मेकोपुकीम गेय पा बाक्मानु, दूली लोव्र मनैनीम” दे आ मुर आन कली देंमाक्त।

10 मिनु इस्त्राएली आन कली गेय पपाइक्बपुकी नु कोव्रबपुकीमी मुर आन कली “फाराओमी ‘इन कली पराल मगेनुड’ देशो बाक्ब।

11 मोपतीके ते खुप्ने चाप्नीनी, मेक डा खुप्तीन। इंटा चहिं डोंइती दोशो सेल्नी, मुल यो मोशोन सेल्चा माल्नीनी” दे मदमे बाक्त।

12 मोपा मेकोपुकी इजीप्त रागीमी पराल मथित्तीके पराल के ठुटा गुप्थ ब्रशा गाक्मा बाक्त।

13 गेय पपाइक्बपुकीमी “पराल गेशो नाक्त दोशो इंटा सेल्नी, मुल यो मोशोन सेल्चा माल्नीनी” दे शुश गेय पपदमे बाक्त।

14 फाराओ आ गेय पपाइक्ब इस्त्राएली कोव्रबपुकी यो वोइश्शो बाक्मा बाक्त। मेको आन कली तुप्शा “डोंइती डा खोदेशो पा सिनाक्ती मुलाक्ती इंटा मारदे मसेल्नी?” दे इस्त्राएली कोव्रब आन कली हुइक्तमे बाक्त।

15 मिनु इस्राएली कोव्रबपुकीमी फाराओ कली “मारदे इन वाइल आन कली ओदेशो मरिम्शो पाइनीनी?

16 इन वाइल आन कली पराल मगेथु ‘इंटा सेलीने’ दे हुइक्नीनी। मेको ला ममाइ, इन मुरपुकीमी आंइ कली तुप्नीम। गे इन रागी डा मुर आन कली मरिम्शो पपाइक्नीनी” देंमा बाक्त।

17 मिनु फाराओमी “गे अल्सेपुकी, थम अल्से दुम्तीनी। मोपतीके गे ‘आंइ कली परमप्रभु यावे कली चढेथ लचा गेने’ देंतीनी।

18 मुल गेय पथ लने। पराल मगेंसीब, इंटा चहिं डोंइती दोशो सेल्नी, मोशोन सेल्चा माल्नीनी” देंमाक्त।

19 मिनु इस्राएली कोव्रबपुकीमी “इं कली मरिम्शो पशा, शुश श्येत गेनीम” दे तुइक्तमे बाक्त। मारदे हना “डोंइती नाक्त किंत किंत दोशो इंटा सेल्नी, मुल यो मोशोन सेल्चा माल्नीनी” देंशो बाक्मा बाक्त।

20 मिनु फाराओ आ बाक्तीके रे लमानु, मेकोपुकीमी लांमी रिम्शा बाक्शो मोसा नु हारून आस कली ग्रुम्तेक्म।

21 मिनु मेको कोव्रबपुकीमी “परमप्रभु यावेमी इस कली सजाइ गेवल। मारदे हना गे निक्शीमी फाराओ नु आ मुर आन डोंइती आंइ कली मरिम्शो सेल्तीसी। आंइ कली साइक्चा, दे तरवार आन गुइमी गेतीसी” दे गाइश्शा हुइक्ताक्म।

22 मिनु मोसा परमप्रभु यावे आ नेक्था लशा “परमप्रभु, मारदे गे इन मुर आन कली मरिम्शो पाइनीनी? आं कली मारदे एक सोइक्तीनी?

23 गो इन नेमी फाराओ नु लोव्र पडा नोले, मेकोमी इन मुर आन कली डोंइती क्येडा शुश श्येत गेप्टु। गे चहिं इन मुर आन कली मप्रोंइनी” देंत।

## 6

परमप्रभुमी मोसा नु लोव्र पशो

1 मिनु नोले परमप्रभु यावेमी मोसा कली “गो फाराओ कली मार पाइनुडा, गे मुल ताइनेवे। फाराओम मेको आन कली लचा गेचा ला ममाइ, ठेयब सक्तिमी फाराओ कली आं मुर आन कली आ रागी रे खेरपाइक्नुड” देंत। प्रस्थान ११:१; प्रस्थान १२:३३

2 मिनु लेंशा परमप्रभुमी मोसा कली “गो यावे नड। प्रस्थान ३:१४-१५; उत्पत्ती १७:१

3 गो अब्राहाम, इसहाक नु याकूब आन डोंइती गूशो ‘नेल्ल क्येडा सक्ति पाइश्शो परमप्रभु नड’ दे मेको आन कली तुइक्पाइक्ताक्मी। तन्न ‘आं नें यावे बाक्ब’ दे मतुइक्पदुमी।

4 गो मेको आन कली ‘गे मुल अर्को रागी डा मुर दुम्शा, हिरना हिरन बाक्शो कनानी आन रागी इन कली गेनुड’ दे अब्राहाम, इसहाक नु याकूब नु कबल पने थुम्शो नड। उत्पत्ती १७:८

5 मिनु गो इजीप्त डा मुरपुकीमी इन कली गेय पाइब सेल्मेनु, श्येत जशो इस्राएली आन डाक्शो ताता। मिनु गो आं कबल पशो मिम्ताक्ड।

6 मोपतीके गो इस्राएली आन कली ‘गो परमप्रभु यावे नड। गो इजीप्त डा मुर आन गेशो श्येत नु इन वाइल दुम्शो गेय रे प्रोंइनन्नी। गो इजीप्त डा मुर आन कली ठेयब सजाइ गेशा, आं ठेयब सक्तिमी इन कली ग्रुंइनुड।

7 मिनु गो इन कली आं मुर सेल्नुड। गो इन परमप्रभु दुम्नुड। मिनु गो इन कली इजीप्त डा मुर आन गेशो श्येत रे ग्रुंइब, परमप्रभु यावे, इन परमप्रभु नड, दे तुइक्चा माल्नीनी।

8 मिनु गो अब्राहाम, इसहाक नु याकूब आन कली गेनुड, दे कसम जशो रागीम इन कली चाक्दीत्नुड। मिनु मेको रागी इन के दुम्ब। गो परमप्रभु यावे नड’ दे गे इस्राएली आन कली देंचा माल्नेवे” देंत। उत्पत्ती २२:१६

9 मिनु मोसामी मेको लोव्र इस्राएली आन कली नेंपदानु, वाइल दुम्तीके नु आन थु लुक्च लतीके मोसा आ लोव्र मनेनेम।

10 मिनु परमप्रभु यावेमी मोसा कली

11 “गे इजीप्त डा पिप फाराओ कली ‘इस्त्राएली आन कली इन रागी रे लचा गेने’ दे मतो” देंत।

12 मिनु मोसामी परमप्रभु यावे कली “इस्त्राएलीपुकीमी ला यो आं लोव्र मनेनेम हना, गो ब्वाक्स मजोक्ब मुर आं लोव्र फाराओम दोपा नेंबा?” दे लोव्र लेत्ताक्व। प्रस्थान ६:३०; प्रस्थान ४:१०

13 मोपा परमप्रभु यावेमी मोसा नु हारून आस कली इस्त्राएली आन पबर्म लोव्र पाप्तु। मिनु “गेमी इजीप्त डा पिप फाराओ कली ‘इस्त्राएली आन कली इन रागी रे लचा गेचा मालनीनी’ दे रूप्पतीस” देंत।

### मोसा नु हारून आस किकी पिपी

14 इस्त्राएली आन किकी पिपी आन दातेमी ठेयब दुम्शो, सु सु बाक्मा बाक्त देंशा हना, इस्त्राएल आ डोंइती जरमेशो तौ रूबेन मेको आ तौपुकी हनोक, पल्लु, हेस्रोन नु कारमी बाक्मा बाक्त। मेको रूबेन आ खिं खिं डा मुर बाक्मा बाक्त। उत्पत्ती ४६:९-११

15 सिमियोन आ तौपुकी येमुएल, यामीन, ओहद, याकीन नु सोहार बाक्मा बाक्त। मिनु का कनानी मीश रे जरमेशो शावल बाक्माक्त। मेको सिमियोन आ खिं डा मुर बाक्मा बाक्त।

16 मिनु लेवी आ तौ आन खिं खिं डा मुर सु सु बाक्मा बाक्त देंशा हना, गेरशोन, कोहाथ नु मेरारी बाक्मा बाक्त। मिनु लेवी सहे का ३७ बर्स ब्रोंइमाक्त। १इतिहास ५:२७-३०; १इतिहास ६:१-४

17 गेरशोन आ तौ लिब्नी नु शिमेइ बाक्सा बाक्त।

18 कोहाथ आ तौपुकी अम्राम, इच्छार, हेब्रोन नु उज्जीएल बाक्मा बाक्त। मिनु कोहाथ सहे का ३३ बर्स ब्रोंइमाक्त।

19 मिनु मेरारी आ तौ माहली नु मुशी बाक्सा बाक्त। मेको लेवी आ खिं खिं डा मुर बाक्मा बाक्त।

20 मिनु अम्राममी आ आफ आ समी चाक्गा बाक्त। मेको आ नें योकेबेद बाक्माक्त। मेकोमी हारून नु मोसा थिमाक्त। अम्राम सहे का ३७ बर्स ब्रॉइमाक्त। प्रस्थान २:१; लेवी १८:१२

21 इच्छार आ तौपुकी कोराह, नेफेग नु जिक्की बाक्मा बाक्त। गन्ती १६:१

22 उज्जीएल आ तौपुकी मीशाएल, एल-साफान नु सिथ्री बाक्मा बाक्त। लेवी १०:४

23 मिनु हारूनम नहशोन आ समी अम्मीनादाब आ तमी एली-शेबा चाक्गा बाक्त। मेकोमी नादाब, अबीहु, एलाजर नु इथामार थिमाक्त। प्रस्थान २८:१

24 कोराह आ तौपुकी अस्सीर, एल्काना नु अबी-आसाफ बाक्मा बाक्त। मेको कोराह आ खिं डा मुर बाक्मा बाक्त।

25 मिनु हारून आ तौ एलाजरम पुतीएल आ तमी चाक्गा बाक्त। मेकोमी फिनेहास थिमाक्त। मेकोपुकी लेवी आ खिं डा ठेयब मुर बाक्मा बाक्त। गन्ती २५:७

26 मिनु परमप्रभु यावेमी हारून नु मोसा कली “गे इस्राएल डा मुरपुकी हुल हुल पा इजीप्त रागी रे गुंडीस” देंत। प्रस्थान ६:१३

27 मिनु मेको निक्शीमी इजीप्त डा पिप फाराओ कली “इस्राएल डा मुर आन कली लचा गेने” दे लोत्र पाम्ताक्से।

28 मिनु परमप्रभु यावेमी इजीप्त रागीमी मोसा कली

29 “गो परमप्रभु यावे नड। गे इजीप्त डा पिप फाराओ कली आं देंशो लोत्र नेल्ल माइक्चा माल्नेवे” देंत।

30 मिनु मोसामी परमप्रभु यावे कली “गो ब्वाक्स मजोक्ब मुर नड। दोपा फाराओमी आं लोत्र नेंबा डा?” देंत। प्रस्थान ६:१२

## 7

मोसामी चिन्ड कोंडशो

1 परमप्रभु यावेमी मोसा कली “नेनो, गो इ कली फाराओ आ डोंइती परमप्रभु खोदेशो पा चिन्ड कोंइने चापब सेल्लतन। इ लोक्ब हारून चहिं इ लोत्र पाइब दुम्ब। प्रस्थान ४:१६

2 गो इ कली मार मार माइक्ना, गे मेको देंचा माल्नेवे। मिनु इ लोक्ब हारूनमी ‘इस्त्राएली आन कली इन रागी रे लचा गेन’ दे फाराओ कली देंचा माल्ब।

3 तन्न गो फाराओ कली काइ मटीब सेल्लुड। मिनु गो इजीप्त रागीमी शुश चिन्ड नु छक लाक्चा डा गेय कोंइनुड। प्रस्थान ४:२१

4 मिनु फाराओमी इस कली मटीब। मिनु गो इजीप्त डा मुर आन कली थाम्पान सजाइ गेशा, आं शुश मुर आन कली इजीप्त रागी रे गुंइनुड।

5 गो इजीप्त डा मुर आन कली थाम्पान सजाइ गेशा, इस्त्राएली आन कली आन दाते रे गुंइदुनु ‘गो परमप्रभु यावे नड’ दे इजीप्त डा मुर आन कली तुइक्पाइक्नुड” देंत। प्रस्थान ७:१७; प्रस्थान ८:१८; प्रस्थान ९:२९; १सामुएल १७:४६; १राजा २०:२८; २राजा १९:१९; इजीकीएल २९:६

6 मिनु मोसा नु हारूनमी परमप्रभु यावे आ देशो पाम्ताक्से।

7 मोपा फाराओ नु लोत्र पची ना, मोसा ८० बर्स दुम्शो बाक्त। हारून ८३ बर्स दुम्शो बाक्त।

### कोक्के ब्वारशा बुस्स दुम्पाइशो

8 मिनु परमप्रभु यावेमी मोसा नु हारून आस कली

9 “फाराओमी इस कली ‘छक लाक्चा डा चिन्ड कोंइदीसे’ देंमेनु, गेमी हारून कली ‘इ कोक्के बुस्स दुम्पाइक्चा कली फाराओ आ डोंइती ब्वारदो’ देंचा माल्नेवे। मिनु मेको कोक्के बुस्स दुम्ब” देंत। प्रस्थान ४:३

10 मोपा मोसा नु हारूनमी परमप्रभु यावे आ देशो पशा, फाराओ आ बाक्तीकेमी लाम्ताक्स। मिनु हारूनमी आ कोक्के फाराओ नु आ गेय पाइब मुर आन डोंइती ब्वारताक्व। मिनु मेको कोक्के बुस्स दुम्त।

11 मिनु फाराओमी इजीप्त रागी डा जादू नु टुना मुना पाइब आन कली ब्रेत्ताकमी। मेकोपुकीमी यो आन टुना मुनामी हारून खोदेशो पा आन कोक्के ब्वारशा, बुस्सपुकी सेल्लेक्म। प्रस्थान ७:२२; प्रस्थान ८:३; उत्पत्ती ४१:८; २तिमोथी ३:८

12 तन्न हारून आ कोक्के रे दुम्शो बुस्सुमी मेको आन कोक्के रे दुम्शो बुस्स नेल्ल आन कली दाक्तीमी।

13 मिनु परमप्रभु यावेमी देशो खोदेशो पा फाराओ काइ मटीब दुम्शा, मोसा नु हारून आस देशो लोव्र मबिस्से। प्रस्थान ४:२१

ब्वाक्कु नेल्ल हुश सेल्लो

14 मिनु परमप्रभु यावेमी मोसा कली “फाराओ काइ मटीब दुम्त। आं मुर आन कली लचा मगेब।

15 गे दीसा सुनी फाराओ ग्रुम्थ लचा माल्नीसी। फाराओ ब्वाक्कु आ नेक्था लमेनु, गे मेको आ क्येडा डोंइती खोला आ नेक्था जाकदीश्शा, रिम्शा बाक्चा माल्नीसी। बुस्स दुम्ब कोक्के यो लाइक्चा माल्नीसी।

16 मिनु गे मेको कली ‘परमप्रभु यावे, हिब्रू मुर आन परमप्रभुमी इन कली, आं मुर आन कली आं कली चढ़ेतीक चढ़ेथ गोरशो रागी लचा गेवो, देंती। तन्न गे मुल सम्म आं लोव्र मटिवी’ देंत” देनीस। प्रस्थान ५:१

17 मोपतीके परमप्रभु यावेमी “गो परमप्रभु यावे नड। गे आं पतीकेमी तुइक्नेवे। गो आं कोक्केमी नील खोला डा ब्वाक्कु तुप्नुड। मिनु मेको हुश दुम्ब। प्रस्थान ४:९

18 मिनु खोला डा डांइ नेल्ल बेक्नीम। खोला शुश राक्शो रिना पाइब। मिनु इजीप्त डा मुरपुकी मेको ब्वाक्कु तूचा ग्रांग्रा दीनीम” दे मोसा कली देंत।

19 मिनु परमप्रभु यावेमी मोसा कली “गेमी हारून कली “इ कोक्के इजीप्त रागी डा ब्वाक्कु हुश दुम्पाइक्चा कली ब्वाक्कु तारी दिंदो। नादी, खोला, कुवा नु इनार आन तारी दिंदो। मुर आन

चाक्शो ठेका नु गरम बाक्शो ब्वाक्कु यो हुश दुम्ब' दे हारून कली देनो" देंत। प्रकाश ११:६

20 मिनु परमप्रभु यावेमी मोसा नु हारून कली दोदेशो देंमे, मोदेशो पाम्ताक्स। मोसामी फाराओ नु आ गेय पाइब आन डोंइती आ कोक्के खोला डा ब्वाक्कु तार दिंशा तुबानु, हुश दुम्त।

21 मोपा नील खोला डा डांइ नेल्ल बेक्तेक्म। मिनु ब्वाक्कु राक्शो रिना पाइश्शो दुम्त। इजीप्त रागी डा मुर नेल्लेमी नील खोला डा ब्वाक्कु तूने मचबेम। इजीप्त रागी नेल्ल हुशेइ हुश दुम्त।

22 इजीप्त रागी डा ठेयब टुना मुना पाइबपुकीमी यो आन मन्तरमी आस पशो खोदेशो पाम्तेक्म। फाराओ आ थुं चहिं डोंइती डा खोदेशो पा काइ मटीब दुम्माक्त। मिनु मोसा नु हारून आस देंशो मटिवो। परमप्रभु यावेमी डोंइती दोदेशो देंमे, मोदेशो दुम्त। प्रस्थान ७:११

23 मिनु फाराओ आ खिं लेम्माक्त। मार दुम्मे, मारेइ ममिन्ता बाक्त।

24 इजीप्त रागी डा मुरपुकीमी नील खोला आ नेक्था शुश कुवा दोम्तेक्म। मारदे हना नील खोला डा ब्वाक्कु काइ तूचा मदुम।

25 मोपा परमप्रभु यावेमी नील खोला डा ब्वाक्कु तुप्शा, हुश दुम्शो ७ नाक्ती दुम्त।

## 8

### क्रुक्कु गूपाइश्शो

1 मिनु नोले परमप्रभु यावेमी मोसा कली "गे फाराओ आ बाक्तीक लावो। परमप्रभु यावेमी आ मुर आन कली लचा गेमी। प्रस्थान ५:१

2 गे लचा मगेतीनी हना, क्रुक्कुपुकीमी इ रागी डा मुर नेल्ल आन कली श्येत गेपाइक्नुडमी।

3 नील खोलाम शुश क्रुक्कु गूपाइक्नुड। मेकोपुकी इन खिंम बाक्थ जाक्नीम। इन इप्तीक कोठामी यो ओव्रनीम। इन खाट तार

डोइक्नीम। मिनु इन दरवार डा गेय पाइब आन खिंमी यो ओवनीम। मुर आन तार नु आन चुप्लुमी यो बाक्नीमी। आन फस नित्तीके बोस आगाम ओवनीम।

4 मेको कुक्कुपुकी इन तारी, इन मुर आन तारी नु इन दरवार डा गेय पाइब आन तारी जाक्नीम, दे परमप्रभु यावे आ देशो लोव बाक्ब, दे मतो” दे मोसा कली देंत।

5 मिनु नोले परमप्रभु यावेमी मोसा कली “गेमी हारून कली ‘इ कोक्के खोला नेल्ल आन तार दिंदो। मोपा गे इजीप्त रागीम कुक्कु गूपाइक्नेवे’ दे हारून कली देनो” देंत।

6 मिनु हारूनमी आ गुइ इजीप्त डा ब्वाक्कु तारी दिंताक्व। मिनु कुक्कुपुकी गूशा, इजीप्त रागी नेल्ल ब्रीतेक्म।

7 इजीप्त रागी डा जादू टुना मुना पाइबपुकीमी यो आन मन्तरमी हारून खोदेशो पा कुक्कु गूपाइक्तेक्म। प्रस्थान ७:११

8 मिनु फाराओमी मोसा नु हारून आस कली ब्रेप्पाइशशा “आं पबर्म नु आं मुर आन पबर्म परमप्रभु यावे कली पुनीस। कुक्कु लमल, दे पुनीस। गोमी इस्राएल जात डा मुर आन कली परमप्रभु यावे कली चढेथ लचा गेनुड” दे मोसा नु हारून आस कली देंत। प्रस्थान ८:२४; प्रस्थान ९:२८; प्रस्थान १०:१७

9 मिनु मोसामी फाराओ कली “हजुर, इन कली नु इन गेय पाइब आन कली, इन मुर आन खिं नु इन खिं रे कुक्कु लमल, नील खोलाम ला बाक्मल, दे गेना पुंडचा माल्नस्कु?” दे हिल्लो पाप्तु।

10 मिनु “दीसा कली पुनीस” दे लोव लेत्ताक्व। मोसामी “परमप्रभु यावे आंइ परमप्रभु खोदेशो सुइ मबा, दे तुइक्पाइक्चा कली इन देशो दीसा दुम्ब। प्रस्थान ९:१४; प्रस्थान १५:११; ब्यवस्था ३३:२६; २सामुएल ७:२२; येरमीया १०:६

11 दीसा कुक्कुपुकी इन बाक्तीक, इन गेय पाइब नु इन मुर इन खिं नेल्ल रे गाक्नीमी। नील खोलाम ला बाक्नीम” देंत।

12 मोपा मोसा नु हारून फाराओ आ खिं रे लाम्ताक्स। मिनु मोसामी मेको परमप्रभु यावे आ सोइशो कुक्कु आ पबर्म पुंडतु।

13 मिनु परमप्रभु यावेमी मोसामी पुंडशो नेंशा पाप्तु। खिंम, लाडगाम नु रूम बाक्शो कुक्कु नेल्ल बेक्तेक्म।

14 मुरुमी बेक्शो कुक्कु नेल्ल खुप्ताक्म। मिनु रागी नेल्ल थाम्पा रिना पाइक्तु।

15 इजीप्त रागी डा फाराओ चहिं मेको कुक्कु रे ब्रोंइशो तशा, आ थुं डोंइती डा खोदेशो पा काइ मटीब दुम्माक्त। मिनु मोसा नु हारूनम देशो लोत्र मपव। डोंइती परमप्रभु यावेमी मो देशो बाक्माक्त। प्रस्थान ४:२१

### भुस्ना गूपाइशो

16 मिनु नोले परमप्रभु यावेमी मोसा कली “गेमी हारून कली ‘इ कोक्के दिंशा, फुरक तुपो’ दे मतो। मिनु मो पवानु, इजीप्त रागीमी फुरक नेल्ल भुस्ना दुम्शा फोंइनीम” दे मोसा कली माइक्तु। प्रस्थान

17 मिनु हारूनमी फुरक तुबानु, इजीप्त रागी नेल्लेमी मुर नु बस्तु भाव आन तारी भुस्ना शुश फोंइतेक्म।

18 इजीप्त रागी डा जादू टुना मुना पाइबपुकीम यो हारून खोदेशो पा भुस्ना गूपाइक्चा माल्लेक्म। तन्न मचबेम। मुर नु बस्तु भाव आन तारी भुस्ना शुश जुक्ताक्म। प्रस्थान ७:११

19 मिनु जादू टुना मुना पाइबपुकीमी फाराओ कली “एको परमप्रभुमी पाप्तु” देमा बाक्त। फाराओ चहिं काइ मटीब दुम्माक्त। मिनु मोसा नु हारून आस देशो लोत्र मटिव। परमप्रभु यावेम डोंइती देशो खोदेशो दुम्त। भजन संग्रह ६४:१०; भजन संग्रह ७२:१८; लूका ११:२०

### डांस गूपाइशो

20 मिनु परमप्रभु यावेमी मोसा कली “सुनी कना बोक्को। फाराओ खोला लमेनु, मेको कली गुम्थ लावो। मिनु फाराओ कली ‘परमप्रभु यावेमी, आं मुर आन कली आं कली चढेथ लचा गेवो। प्रस्थान ५:१

21 नेनो, गे आं मुर आन कली लचा मगेप्तीवी हना, गो इ कली, इ गेय पाइब आन कली नु इ मुर नेल्ल आन कली श्येत जपाइक्चा कली इ खिंमी, इ रागी डा मुर आन खिंमी डांसम ब्रीपाइक्नुड। रू नेल्ल डांसम ब्रीपाइक्नुड।

22 मेको मो दुम नाक्ती आं मुर आन बाक्तीक गोशेनमी चहिं डांस मग्रूपाइक्नुड। अरु इजीप्त रागीमी ग्रूपाइक्नुड। आं पबर्म तुइक्पाइक्चा कली मो पाइनुड। मिनु गे आं पबर्म परमप्रभु यावे मेको रागीम बाक्ब, दे तुइक्चा माल्नेवे। प्रस्थान ७:५

23 मोदेशो पा गो आं मुर आन बाक्तीकेमी डांस मग्रूपाइक्नुड। इ मुर आन बाक्तीकेमी ला डांस ग्रूपाइक्नुड। दीसा गे तुइक्नेवे, देनो' देंत" दे परमप्रभु यावेमी मोसा कली देंत।

24 मिनु परमप्रभु यावेमी आ देशो पाप्तु। डांस शुश फोंइशा फाराओ आ खिं, आ दरवारम गेय पाइब आन खिं, इजीप्त रागी नेल्लेमी शुश डांस फोंइशा ब्रीतेक्म। मिनु डांसमी मेको रागी नेल्ल खतम सेल्लेक्म।

25 मिनु नोले फाराओमी मोसा नु हारून आस कली ब्रेप्पाइशशा "लने, इन परमप्रभु कली आं रागी उइ चढेने" देंत।

26 मोसामी चहिं "मो पचा मदुम्ब। मारदे हना परमप्रभु यावे, आंइ परमप्रभु कली चढेशो तशा, इजीप्त डा मुर ग्रान्गा दीनीम। मोपा इजीप्त डा मुर आन डोंइती आन मदाक्शो गेय पकानु, मेकोपुकीमी आंइ कली फुल्लु आप्शा, साइक्नीम। उत्पत्ती ४३:३२; उत्पत्ती ४६:३४

27 गोपुकी नाक्त सां डा लां गाक्शा, गोरशो रागीम लशा, परमप्रभु यावेम देशो खोदेशो पा चढेचा माल्नीकी" देंत। प्रस्थान ३:१८

28 मिनु फाराओमी "गो इन कली गोरशो रागीम परमप्रभु यावे, इन परमप्रभु कली चढेथ लचा गेनुड। शुश डोन चहिं मलने। आं पबर्म यो पुनीस" देंत।

29 मिनु मोसामी "मुल गो एकेर रे लशा, परमप्रभु यावे कली

पुंइनुड। मार पुंइनुड देंशा हना ‘दीसा फाराओ, आ गेय पाइब नु रागी डा मुर नेल्ल आन बाक्तीक रे डांस प्रोक्पतीने’ दे पुंइनुड। तन्न लोव्र का पाइनुड। गे आंइ कली परमप्रभु यावे कली चढ़ेचा दुम्ब, दे नोले ‘लचा मगेनुड’ देंशा, जोल मपने” दे मोसामी फाराओ कली देंत।

30 मो देंशा मोसा फाराओ आ खिं रे लशा, परमप्रभु यावे कली पुंइतु। प्रस्थान ८:८

31 मिनु परमप्रभु यावेमी मोसा आ पुंइशो लोव्र नेंशा पाप्तु। मिनु डांस फाराओ आ खिं, आ गेय पाइब नु मुर नेल्ल रे तिल्तु। काइ मलीम।

32 तन्न फाराओ लेंशा काइ मटीब दुम्शा, इस्राएली आन कली लचा मगेव। प्रस्थान ४:२१

## 9

बस्तु भाव बेक्पाइशो

1 मिनु परमप्रभु यावेमी मोसा कली “फाराओ आ बाक्तीके लावो। मिनु गे परमप्रभु यावे, हिब्रू मुर आन परमप्रभुमी इन कली ‘आं मुर आं कली चढ़ेथ लचा गेवो। प्रस्थान ५:१

2 नेनो, गे मेको आन कली लचा मगेथु, तेक्तीवी हना, यसैया १:२०

3 परमप्रभु यावेमी इन गोठम बाक्शो बस्तु भाव आन कली ठेयब रोइ पपाइक्ब। इन शारा, गधा, दलओंठ, बी व्यफ नु क्यारश भेडा नेल्ल आन कली बेक्तीक रोइ पपाइक्ब। प्रस्थान ३:२०

4 तन्न इस्राएली आन बस्तु भाव आन कली रोइ मपपाइक्ब। इजीप्त डा मुर आन बस्तु भाव आन कली चहिं रोइ पपाइक्ब। इस्राएली आन बस्तु भाव मबेक्नीम’ दे फाराओ कली माइक्चा माल्नेवे” दे परमप्रभु यावेमी मोसा कली देंत। प्रस्थान ८:१८

5 मिनु परमप्रभु यावेमी “गो दीसा इजीप्त रागीम मो पाइनुड” देंत।

6 मिनु आ दीसा परमप्रभु यावेमी आ देंशो पाप्तु। इजीप्त रागी डा मुर आन बस्तु भाव बेक्मा बाक्त। तन्न इस्राएली आन बस्तु भाव चहिं मबेक्म।

7 मिनु फाराओमी इस्राएल डा मुर आन बस्तु भाव यो बेक्मा कों, दे कोव्रथ मुर सोइक्ताक्व। तन्न का यो मबेक्शो बाक्तेक्म, दे तुइक्पाइक्तेक्म। मोपा यो फाराओ काइ मटीब दुम्शा, इस्राएली आन कली लचा मगेव। प्रस्थान ४:२१

### परमप्रभुमी गार मुपाइश्शो

8 मिनु नोले परमप्रभु यावेमी मोसा नु हारून आस कली “गे चुप्लु डा पुलु हुइश्शा कुरशा लस। मिनु मोसामी फाराओ आ डोंइती मेको पुलु सरीड गे फ्रचा माल्ब।

9 मेको पुलु फुरक दुम्शा, मुर नु बस्तु भाव आन कली मरिम्शो गार मुपाइक्व। इजीप्त रागी नेल्लेमी मोदेंशो दुम्ब” देंत। ब्यवस्था २८:२७

10 मिनु मोसा नु हारूनमी चुप्लु डा पुलु हुइश्शा कुरशा, फाराओ आ डोंइती राप्ताक्स। मिनु मोसामी मेको पुलु सरीड गे फ्राप्तु। मिनु मुर नु बस्तु भाव नेल्ल शुश गार मुतेक्म। प्रकाश १६:२

11 मिनु इजीप्त रागी डा जादू पाइबपुकी यो शुश गार मुशा, रोइ पशा, मोसा आ नेक्था बाक्ने मचबेम।

12 परमप्रभु यावेमी फाराओ कली काइ मटीब दुम्पदा बाक्त। मिनु मोसा नु हारून आस लोव्र मटिव। परमप्रभु यावेमी मोसा कली डोंइती दोदेंशो देंमे मोदेंशो दुम्त। प्रस्थान ४:२१

### ठेयब मुप्स यिपाइश्शो

13 मिनु परमप्रभु यावेमी मोसा कली “सुनी कना बोक्शा, फाराओ कली गुम्थ लशा, परमप्रभु यावे, हिबू मुर आन परमप्रभुमी इन कली ‘आं मुर आन कली आं कली चढेथ लचा गेवो। प्रस्थान ५:१

14 मारदे हना मुल रे गेचशो श्येतम इ कली, इ गेय पाइब आन कली नु इ मुर नेल्ल आन कली सोइक्नुड। रागी रागीमी आं खोदेशो सुइ मबाक्ब, दे इ कली तुइक्पाइक्नुड। प्रस्थान ८:६

15 मुल गो इ कली नु इ मुर आन कली बेक्तीक रोइ पपदु वा।

16 तन्न गो आं सक्ति रागी नेल्लेम तुइक्पाइक्चा कली इ कली मुल सम्म ब्रोंइचा गेता। आ नें रागी नेल्ल डा मुर आन कली तुइक्पाइक्चा, दे इ कली ब्रोंइचा गेता। प्रस्थान १४:४; रोमी ९:१७

17 गे आं मुर आन कली लचा मगेतीके, इ ठेयब लेशशो तुइक्ताक्ड।

18 नेनो, दीसा गो शुश मरिम्शो मुप्स यिपाइक्नुड। मुल सम्म इजीप्त रागीमी मुर बाक्चा गोत्रमे रे मोदेशो ठेयब मुप्स गेनायो मयिशो बाक्ब।

19 मोपतीके इ बस्तु भाव आन कली खिं आगा ओंइदो। मारदे हना मुर नु बस्तु भाव, सु सु लाडगाम बाक्नीमी, मेको मुप्सीम तुप्शा बेक्नीम' देनो देंत" दे परमप्रभु यावेमी मोसा कली देंपाइक्तु।

20 फाराओ आ गेय पाइब आन दातेमी सु सु परमप्रभु यावे क्येडा हिंमा, मेकोपुकीमी आन गेय पाइब नु आन बी ब्यफ, क्यारश भेडा आन कली खिं आगा ओंइताक्म।

21 सु सु परमप्रभु यावे आ देशो लोत्र क्येडा महिंमा, मेकोपुकीमी चहिं आन गेय पाइब नु आन बस्तु भाव आन कली खिं आगा मओंइदेम।

22 मिनु नोले परमप्रभु यावेमी मोसा कली "इ गुइ सरीड गे दिंदो। मो पवीनु, इजीप्त रागी नेल्लेमी मुप्स यीब। मुप्स यिशा, मुर बी ब्यफ, क्यारश भेडा नु रू आन तारी देल्ब" दे परमप्रभु यावेमी मोसा कली देंत।

23 मिनु मोसामी आ कोक्के सरीड गे दिंदानु, बुंबु चिला पा, मुप्स यित। मोपा परमप्रभु यावेमी इजीप्त रागीमी मुप्स यिपाइक्तु। मिनु परमप्रभु यावेमी चिला दाप्पाइश्शा, मुप्स यिपाइक्तु। प्रकाश १६:२१

24 चिला पना पन मुप्स यित। मेको मुप्स थम कोल्कोल्शो बाक्तेक्म। इजीप्त रागीम मुर बाक्चा गोव्रमे रे मोमो कोल्शो मुप्स गेनायो मतशो बाक्तेक्म।

25 मिनु इजीप्त रागी डा रूम वाशो मारेइ मारेइ मुप्सीमी श्येत्थ पोक्तु। मुर नु बी ब्यफ, क्यारश भेडा आन कली साइक्तु। रूम मार मार खुम्शो बाक्मे, मेको नेल्ल साइश्शा, रवा आन कली यो जिक्तु।

26 इस्राएली आन बाक्तीके गोशेनमी ला मुप्स मयी। प्रस्थान ९:४; प्रस्थान ८:१८

27 मिनु फाराओमी मोसा नु हारून आस कली ब्रेत्ताक्मसी। मिनु मेको आस कली “मुल गो पाप पाता। परमप्रभु यावे ठीक पाइब बाक्ब। गो नु आं मुरपुकीम मरिम्शो पाइतक।

28 आंइ पर्वम परमप्रभु यावे कली पुनीस। एको बुंबु नु मुप्स मयिपदल। गो इन कली लचा गेनुड। मुल गे एकेर बाक्चा ममाल्नीनी” देंत। प्रस्थान ८:४

29 मिनु मोसामी “गो सहर रे लशा, इन पर्वम आं गुइ पोक्शा, परमप्रभु यावे कली पुंइनुड। नोले बुंबु पचा नु मुप्स यिचा नाइक्ब। मिनु गे रागी नेल्ल परमप्रभु यावे केन बाक्ब, दे तुइक्नीनी। प्रस्थान ७:५

30 तन्न गे नु इन दरवार डा गेय पाइबपुकी मुल सम्म परमप्रभु, परमप्रभु यावे कली महिंशो बाक्नीनी, दे तुइक्ताक्ड” दे फाराओ कली देंत।

31 मेको मुप्सीमी मार पाप्तु देशा हना, सनपाट नु क्योव्रज नेल्ल खतम सेल्लु। मारदे हना क्योव्रज बाला दुम्ने थुम्शो नु सनपाट बोइक्ने थुम्शो बाक्त।

32 तन्न चेरब नु अर्को अन्न चहिं नोले ला मीबाक्तेक्म। मोपतीके मसद।

33 मोदेशो दुम्शा मोसामी फाराओ आ बाक्तीके रे लशा, आ गुइ परमप्रभु यावे गे पोक्शा, फाराओ आ पर्वम पुंइतु। मिनु बुंबु पा, मुप्स नु रेउ यिचा नाइक्ताक्व।

34 मिनु फाराओ नु आ गेय पाइबपुकीमी रेउ, मुप्स यिचा नु बुंबु पचा नाइशो तशा, लेंशा पाप पाम्तेक्म। मोपा मटीम।

35 फाराओ काइ मटीब दुम्शा, इस्राएली आन कली लचा मगेव। परमप्रभु यावेमी मोसा कली देशो खोदेशो दुम्त। प्रस्थान ४:२१

## 10

### सल्हा माले गूपाइशो

1 मिनु परमप्रभु यावेमी मोसा कली “गे फाराओ कली आं चिन्डपुकी कोंइचा कली ग्रुम्थ लसे। मारदे हना गो मेको नु आ गेय पाइब आन कली काइ मटीब दुम्पाइक्ता।

2 मिनु गे इ चच युइ आन कली ‘गो इजीप्त डा मुर आन कली मार मार पडा’ मेको शेंदो। गो मोदेशो चिन्ड कोंइब बाक्नुड। ‘गो परमप्रभु यावे नड’ दे नेल्लेमी तुइक्तमेक्ल” देंत। प्रस्थान ६:२-८

3 मिनु मोसा नु हारून फाराओ आ बाक्तीके जाक्दीशशा, मेको कली “हिबू आंइ परमप्रभु यावे, हिबू मुर आन परमप्रभुमी इन कली ‘गेना सम्म गे आं डोंइती ठेयब लेशशा बाक्नेवे? आं मुर आन कली आं कली चढेथ लचा गेवो। प्रस्थान ५:३

4 नेनो, गे आं मुर आन कली लचा मगेनेवे हना, दीसा इ रागीम शुश सल्हा माले जाक्पाइक्नुड।

5 मेकोपुकीमी रागी मतचा डा पा सुम्नीम। मिनु मुप्स रे पा गिग खाइ मार मार लीशो बाक्मा, मेको नेल्ल नेक्नीम। रवा आन सफा यो नेल्ल नेक्नीम।

6 मिनु मेकोपुकी इ खिं, इ दरवार डा गेय पाइब आन खिं नु नेल्ल इजीप्त डा मुर आन खिं खिंम ओव्रशा ब्रीनीम। इ किकी पिपीम मोदेशो गेनायो मतामे’ दे परमप्रभुमी इन कली देंत” दे मोसामी देंत। मिनु मोसा फो गूशा गाक्त।

7 मिनु फाराओ आ दरवार डा गेय पाइबपुकीमी फाराओ कली “मेको मुरुम आंइ कली गेना सम्म श्येत गेबा? मेको मुर आन कली

परमप्रभु यावे, आन परमप्रभु कली चढेचा गेने। इजीप्त रागी मुल थुम्साक्व, दे मतुइक्नीनी?” देमा बाक्त।

8 मिनु मेकोपुकीमी मोसा नु हारून आस कली फाराओ आ बाक्तीके लेशशा चाक्तेक्म। मिनु फाराओमी मेको आस कली “गे लने। परमप्रभु यावे, इन परमप्रभु कली गेय पने। सु सु लाइक्नीनी?” दे हिल्लो पाप्तु।

9 मिनु मोसामी “परमप्रभु यावे आ चाड मानेचा कली गो तमी तौ, खाल्पी खाल्पा, बी ब्यफ नु क्यारश भेडा नेल्ल लाइशशा, लचा माल्नीकी” देत। प्रस्थान ५:१

10 मिनु फाराओमी मेको आस कली “इन परमप्रभु यावे गे नु बाक्शो खोदेशो पा गो इन कली नु इन आल नु लचा मगेनुड। गे मरिम्शो पचा माल्नीनी, दे आंमा तुइक्नीसी।

11 मोदेशो मदुम्ब। वोंइश मुरपुकी ला परमप्रभु यावे कली चढेथ लने। मारदे हना एकोन इन माल्शो बाक्ब” दे हुइक्ताक्व। मिनु फाराओ आ डोंइती रे खेरतु।

12 मिनु परमप्रभु यावेमी मोसा कली “सल्हा माले ग्रूपाइक्चा कली इ गुइ इजीप्त रागी तार दिंदो। मेकोपुकीम रागीमी मार मार गिग खाइपुकी मुप्सीम हेंशो बाक्मा, मेको ब्वाइनीमी” देत। प्रस्थान ९:३२

13 मिनु मोसामी आ कोक्के इजीप्त रागी तार दिंताक्व। मेको नाक्त रे आ दीसा सुनी सम्म परमप्रभु यावेमी पूर्व रे फश पपाइक्तु। मिनु सुनी नां सोत्रमेनु, पूर्व रे पिशो फशेमी सल्हापुकी चाक्तु। योएल १:२-१२; योएल २:१-११

14 मिनु सल्हा मालेमी इजीप्त रागी नेल्ल सुम्तेक्म। डोंइती रे मोदेशो शुश सल्हा माले गेनायो मबाक्शो बाक्मा बाक्त। मिनु नोले यो मोदेशो गेनायो मदुम्माक्त।

15 मेको शुश सल्हा माले बेरमानु, नाक्ती यो नाक्दो खोदेशो पा छिडछिड दुम्त। मेको सल्हा मालेमी मुप्स रे लीशो रू डा वाशो नु

रवा डा फल नेल्ल नेक्तेक्म। मार मार गिग बाक्मा, मारेइ महेंदेम। इजीप्त रागी डा रवा नु गिग खाइ नेल्ल नेक्तेक्म।

16 मिनु फाराओमी रीब पा मोसा नु हारून आस कली ब्रेप्पाइक्तु। मिनु मेकोमी “गो परमप्रभु यावे, इन परमप्रभु आ डोंइती पाप पाता। मिनु इस कली यो मरिम्शो पाता। प्रस्थान ९:२७

17 मुल खेयप का ला आं कली माफ गेयीसी, दे पुंइनुड। मिनु आं पबर्म परमप्रभु यावे, इन परमप्रभु कली पुनीस। सल्हा माले खेरशा, अन्काल रे मबेक्पाइक्चा नम, दे पुनीस” दे मोसा नु हारून आस कली माइक्तीम्सी। प्रस्थान ८:४

18 मो देंम नोले मोसा फाराओ आ डोंइती रे लशा, परमप्रभु यावे कली पुंइतु।

19 मिनु परमप्रभु यावेमी नां पेरतीक रागी रे ठेयब फश गिवार सोइक्ताक्व। मेको फश गिवारमी सल्हा माले आन कली हुरशा, लल समुन्द्रम ताइक्ताक्व। मिनु मोपा इजीप्त रागीम सल्हा माले काइ मलीम।

20 तन्न परमप्रभु यावेमी फाराओ कली मबिप्पाइक्चा कली काइ मटीब दुम्पाइक्तु। मोपतीके मेकोमी इस्राएली आन कली लचा मगेव। प्रस्थान ४:२१

### छिडछिड दुम्पाइश्शो

21 मिनु परमप्रभु यावेमी मोसा कली “इ गुइ सरीड गे पोक्को। मो पवीनु, इजीप्त रागीम हिंचा डा पा छिडछिड दुम्ब” दे माइक्तु।

22 मिनु मोसामी आ गुइ सरीड गे पोक्कु। मिनु इजीप्त रागीमी नाक्त सां सम्म शुश छिडछिड दुम्त। मारेइ मतांइस।

23 मिनु मेकोपुकी मतमुथु, आन बाक्तीक रे बोक्ने मचबेम। तन्न इस्राएली आन बाक्तीकेमी चहिं छेडछेड बाक्त।

24 मिनु फाराओमी मोसा कली ब्रेशशा “लने, परमप्रभु यावे कली गेय पने। इन आल नु मीश आन कली यो लाइक्ने चाप्नीनी। इन बी ब्यफ नु क्यारश भेडा चहिं मेकेरेन बाक्मल” देंत। प्रस्थान १०:१०

25 मोसामी चहिं “आंइ चढेतीक नु चोशा चढेतीक बस्तु भाव नेल्ल लाइक्चा माल्नीकी। मेको ला परमप्रभु यावे, आंइ परमप्रभु कली चढेने चाप्नीकी।

26 गोपुकी आंइ बी ब्यफ, क्यारश भेडा नेल्ल लाइक्चा, लचा माल्नीकी। का यो मप्रोंइथु लाइक्चा माल्नीकी। परमप्रभु यावे, आंइ परमप्रभु कली मार चढेचा माल्नीकी मुल मजाक्दीशशो सम्म मतुइक्नीकी” दे फाराओ कली माइक्तु।

27 परमप्रभु यावेमी चहिं फाराओ कली काइ मटीब दुम्पाइक्तु। मोपतीके फाराओमी इस्राएली आन कली लचा मगेव। प्रस्थान ४:२१

28 मिनु फाराओमी मोसा कली “मुल एकेर रे लावो। आं कली ग्रुमथ मपिवो। गे लेंशा आं कली ग्रुमथ पिते हना, गो इ कली साइक्नन” देंत।

29 मिनु मोसामी “दुम्ब, गो इन कली लेंशा ग्रुमथ मपीनुड” देंत।

## 11

डोंइती जरमेशो तौ नेल्ल बेक्शो

1 मिनु परमप्रभु यावेमी मोसा कली “फाराओ नु इजीप्त रागी डा मुर आन कली नेल्ल क्येडा नोले डा बेक्चा डा श्येत का गेनुड। मिनु इन कली लचा गेब। लचा गेवानु, नेल्ल इन कली ब्रा ब्रु खेरब।

2 गे मुल इ मुर आन कली ‘वोंइश मुर नु मीश मुरपुकीमी आन नेक्था बाक्ब इजीप्ती आन के सुन नु चांदी के पांडतीक शोंप पुंइचा माल्नीम’ दे शेंचा माल्नेवे” देंत। प्रस्थान ३:२१-२२

3 मिनु परमप्रभु यावेमी इजीप्त डा मुर आन कली इस्राएली आन कली दाक्ब सेल्लतु। मिनु मोसा फाराओ आ गेय पाइब नु इजीप्त डा मुर नेल्ल आन डोंइती शुश ठेयब मुर दुम्त।

4 मिनु मोसामी फाराओ नु आ मुर आन कली “परमप्रभु यावे आ देंशो लोव्र मार बाक्त देंशा हना नाक्दो उइक्थ दुम्मेनु, इजीप्ती आन दातेम लाइनुड।

5 इजीप्त रागीमी सु सु डोंइती जरमेशो बाक्मा, मेको बेक्चा माल्नीम। फाराओ आ नोले सासन पाइब डोंइती जरमेशो तौ रे नेल्ल क्येडा आइक्च यात हिल्ल मीश मुर आन डोंइती जरमेशो तौ सम्म नेल्ल बेक्चा माल्नीम। बस्तु भाव आन के यो डोंइती जरमेशो बेक्चा माल्नीम। प्रस्थान ४:२३

6 मिनु इजीप्त रागी नेल्लेमी ठेयब रोंका पा डाक्नीम। डोंइती मोदेशो गेनायो मदुम्शो बाक्त। मिनु नोले यो लेंशा मदुम्ब।

7 इस्राएली आन दातेमी चहिं मुर नु बस्तु भाव आन चां का यो महेम्ब। परमप्रभु यावेमी इजीप्त डा मुर आन कली नु इस्राएल डा मुर आन कली खाल का डा मपाइब, दे तुइक्तमेक्ल। प्रस्थान ९:४

8 मिनु नोले इन गेय पाइब नेल्लेमी आं डोंइती खुम्की पा बाप्शा, आं कली 'गे नु इन नोले खोइक्ब मुरपुकी एक रे लने' देंनीम। मिनु गो लाइनुड" दे मोसामी फाराओ कली देंत। मिनु मोसा फाराओ आ बाक्तीके रे शुश गाइशशा चुरशा गाक्त।

9 मिनु परमप्रभु यावेमी मोसा कली "इजीप्त रागीम आं छक लाक्चा डा शुश चिन्ड दुम्ल, दे फाराओम इ कली मटिपदु" देंत।

10 मोसा नु हारूनमी फाराओ आ डोंइती मेको छक लाक्चा डा चिन्ड मार मार नेल्ल पाम्ताक्स। इस्राएल डा मुर आन कली लचा मगेवल, दे परमप्रभु यावेमी फाराओ कली काइ मटीब दुम्पाइक्तु। प्रस्थान ४:२१

## 12

डोंइती डा पास्सा चाड

गन्ती ९:१-१४; ब्यवस्था १६:१-८

1 मिनु मोसा नु हारून इजीप्त रागीम बाक्सानु, परमप्रभु यावेमी मेको आस कली

2 "मुल जाक्शो महिना बर्स डा डोंइती डा महिना दुम्चा माल्ब। प्रस्थान १३:४

3 मिनु गे इस्राएली नेल्ल आन कली 'मेको महिना डा १० नाक्ती खिं का डा ठेयब मुरुमी पाठा का चाक्चा माल्नीम।

4 खिं का कली पाठा का आ श्ये शुश दुम्त हना, आ नेक्था बाक्शो मुर आन कली हिक्शा, दोशो ब्वाइनीमी योक्शा, ब्वचा कली ब्रेत्चा माल्नीम।

5 मेको पाठा मारेइ मदुम्शो थम रिम्शो नु बर्स का डा बोका बाक्चा माल्ब। भेडा के हना यो, क्यारश के हना यो दुम्ब। लेवी २२:२०

6 मिनु मेको महिना डा १४ नाक्ती सम्म मेको बोका कली ठीक पा वोइक्चा माल्नीनी। मिनु नां रिक्चावानु, इस्राएली नेल्लेमी मेको बोका क्योरचा माल्नीनी।

7 तेको खिंमी ब्वाइनीनी, मेको खिं डा मुरुमी बोका आ हुश इच्का लाइश्शा, आ खिं डा थाम निक्शी नु लाप्चो आ पियाम खेक्चा माल्नीनी। प्रस्थान १३:२२

8 मेको नाक्दो मेको बोका आ श्ये ब्वचा माल्नीनी। दोपा ब्वचा माल्नीनी देंशा हना, मीम चोशा, बोरब ओरूती मसुप्शो शोब्ले, कशो खाइ नु ब्वचा माल्नीनी।

9 मेको श्ये क्येख ब्वचा मदुम्ब, लोप्शा ब्वचा यो मदुम्ब। आ पिया, खोइली कयी नेल्ल मी तारी चोचा माल्नीनी। ब्यवस्था १६:७

10 सुनी सम्म मारेइ हेंत हना, मीम चोशा थुम्चा माल्नीनी।

11 मेको श्ये किप्शुर किप्शा, जुत्ता लिक्शा, गुइमी कोक्के ग्याइश्शा, रीब पा ब्वचा माल्नीनी। मारदे हना मेको परमप्रभु यावे आ पास्सा चाड बाक्ब। ब्यवस्था १६:३; यसैया ५२:१२

12 मेको नाक्दो गोमी इजीप्त रागी हिरशा, इजीप्त डा मुर आन डोंइती जरमेशो तौ नेल्ल साइक्नुडमी। बस्तु भाव आन के यो डोंइती जरमेशो नेल्ल साइक्नुडमी। इजीप्त डा देवी देवता नेल्ल आन कली सजाइ गेनुडमी। गो, परमप्रभु यावे मेकोन पाइनुड। गन्ती ३३:४

13 मेको खेक्शो हुश इन खिं डा चिन्ड दुम्ब। तेको खिंम हुश खेक्शो तडा, मेको खिं कली हेरशा लाक्नुड। गो इजीप्त रागी डा

मुर आन कली बेक्चा डा श्येत गेनुडमी। इन कली चहिं मेको श्येत मगेनुड। हिबू ११:२८; प्रस्थान ३०:१२

14 मेको नाक्ती इन कली मिम्तीक नाक्ती दुम्या माल्ब। मोपतीके आं नेम भोज जचा माल्नीनी। गे बर्स बर्सम मेको चाड परमप्रभु यावे कली मानेचा माल्नीनी। इन पाला नेल्ल आन कली गेना हना यो अरेशो लोव्र बाक्ब।

### बोरब ओरुत्ती मसुप्शो शोब्ले

15 गे ७ नाक्त सम्म बोरब ओरुत्ती मसुप्शो शोब्ले जचा माल्नीनी। ७ नाक्त डा डोंइती नाक्ती गे इन खिंम बाक्शो बोरब ओरुत्ती ताइक्चा माल्नीनी। सुम मेको ७ नाक्तीम बोरब ओरुत्ती सुप्शो शोब्ले जाइबा, मेको इस्राएली आन दाते रे तिल्चा पुंइसीब। प्रस्थान १३:७; प्रस्थान २३:१५

16 मिनु ७ नाक्त डा डोंइती नाक्ती नु नोले डा नाक्ती परमप्रभु आ नेमी गुम्या माल्नीनी। मिनु जचा थोव्रक सेल्चा क्येडा लाक्शा, अरु गेय काइ मपने।

17 बोरब ओरुत्ती मसुप्शो शोब्ले डा चाड मानेचा माल्नीनी। मारदे हना मेको नाक्ती गो इन हुल आन कली इजीप्त रागी रे गुंइताक्ड। मोपतीके इन पाला मुर नेल्ल आन कली गेना हना यो अरेशो लोव्र बाक्ब।

18 डोंइती डा महिना डा १४ नाक्ती डा नाक्दो रे २१ नाक्त डा नाक्दो सम्म गे बोरब ओरुत्ती मसुप्शो शोब्ले ला जचा माल्नीनी।

19 मेको ७ नाक्ती इन खिंमी बोरब ओरुत्ती काइ मवोइक्चा। सुमी बोरब ओरुत्ती सुप्शो शोब्ले जाइबा, मेको अर्को रागी डा मुर बाक्त हना यो, इस्राएली बाक्त हना यो इस्राएली आन दाते रे तिल्चा पुंइसीब।

20 इन बाक्तीक नेल्लेमी बोरब ओरुत्ती मसुप्शो शोब्ले ला जने, बोरब ओरुत्ती सुप्शो शोब्ले मजने' दे माइक्मी" दे परमप्रभुमी देंत।

पास्सा डा पाठा आ हुश

21 मिनु नोले मोसामी इस्राएल डा खाल्पा नेल्ल आन कली ब्रेशशा “इन खिं डा ठेयब मुर आन कली पाठा का का चाक्कीन। मिनु मेको पाठा पास्सा चाड मानेचा कली क्योरीन।

22 मिनु गे हिस्सोप के ब्राक्स लाइशशा, हुश दाइक्तीक बोसुम खुम्शा, लाप्चो आ पिया नु थाम निक्शी कली खेक्तीन। मेको नाक्दो सुनी सम्म सुइ लाडगा मगूडीने। प्रस्थान १२:१३

23 परमप्रभु यावे इजीप्त डा मुर साइक्चा कली हिरब। परमप्रभु यावेमी लाप्चो आ पिया नु थाममी हुश खेक्शो तशा, इं खिं हेरशा लाक्ब। मिनु साइक्ब कली इं खिंम ओव्रचा मगेब।

24 मुल रे इन तौ, चच युइ नेल्लेमी एको पास्सा चाड बर्स बर्सम मानेचा माल्नीम। मेको गेना हना यो लीशो अरेशो लोव्र बाल्ब।

25 मिनु गे परमप्रभु यावेमी देशो खोदेशो पा इन कली गेशो रागी जाक्दीशशा, यो एको चाड मानेचा माल्नीनी।

26 इन आलपुकीम इन कली ‘एको चाड आ अर्थ मार बाक्मे?’ दे हिल्लो पाम्तेक्म हना,

27 गे मेको आन कली ‘इस्राएल डा मुरपुकी इजीप्त रागीम बाक्मानु, परमप्रभु यावेमी इजीप्त डा मुर आन कली साइक्ची ना इस्राएली आन खिं चहिं हेरशा लत। एको हेरतीक आ पर्बम चदेशो बाक्ब’ देंचा माल्नीनी” दे मोसामी देंत। मिनु मुरपुकीमी खुम्की पा बाप्शा, परमप्रभु यावे कली ठेयब सेल्लेक्म।

28 मिनु इस्राएलीपुकीमी लशा, परमप्रभु यावेमी मोसा नु हारून आस कली दोदेशो देमे, मोदेशो पाम्तेक्म।

डोंइती डा जरमेशो नेल्ल बेक्शो

29 मिनु नाक्दो उइक्थ दुम्मेनु, परमप्रभु यावेमी इजीप्त रागी डा मुर आन डोंइती जरमेशो तौ आन कली साइक्तीमी। फाराओ आ नोले सासन पाइब तौ रे जेल्खानम बाक्ब मुर आन डोंइती जरमेशो तौ नेल्ल आन कली साइक्तीमी। बस्तु भाव आन डोंइती जरमेशो यो साइक्तु। प्रस्थान ४:२३

30 मिनु मेको नाकदो फाराओ, आ गेय पाइबपुकी नु इजीप्त रागी डा मुर नेल्ल बोक्तेक्म। इजीप्त रागीमी ठेयब रोंका पा डाक्तेक्म। मारदे हना खिं खिं नेल्लेमी मुर बेक्तेक्म। प्रस्थान ११:६-७

### इस्राएलीपुकी इजीप्त रे गूशो

31 मिनु मेको नाकदो फाराओमी मोसा नु हाखून आस कली ब्रेशशा “छुल छाल बोक्कीस। गे नु इस्राएल डा मुर नेल्ल आं रागी डा मुर आन दाते रे गूडीन। इस देशो खोदेशो पा परमप्रभु यावे कली चढेथ लने।

32 इन बी ब्यफ नु क्यारश भेडा आन कली लाइशशा, फो फु गूडीने। आं कली आसीक गेयीसी” देंत। प्रस्थान १०:२६; एज्रा ६:१०

33 मिनु इजीप्त डा मुरपुकीमी मेको आन कली आन रागी रे ब्रा बु खेरशा सोइक्ताक्म। मारदे हना “गो नेल्ल बेक्नय” दे हितेक्म। प्रस्थान ६:१

34 मिनु मुरपुकीमी बोरब ओख्ती मसुप्शो, निशो फस आन बोस वाम गिल्शा, बलाम लाप्शा कुरतेक्म।

35 मिनु इस्राएलीपुकीम मोसा आ देशो खोदेशो पा इजीप्ती आन सुन चांदी नु वासी पुंइतेक्म। प्रस्थान ११:२

36 मिनु परमप्रभु यावेमी इजीप्त डा मुर आन कली इस्राएली आन कली दाक्पाइक्तीके, आन पुंइशो नेल्ल गेम्तेक्म। मोपा इजीप्त डा मुर आन शोंप लाइशशा गाक्तेक्म। प्रस्थान ३:२१

37 मिनु इस्राएल डा मुरपुकी रामेसेस सहर रे गाक्शा, सुक्कोथ सहर जाक्दीत्तेक्म। मेको आन मीश नु तमी तौ नेल्ल महिक्थु, वोंइश मुर ला ६ लाख बाक्तेक्म।

38 मिनु हिकने मचाप्चा डा पा इस्राएली खोदेशो पा परमप्रभु यावे कली टीबपुकी यो, आन बी ब्यफ, क्यारश भेडा, शुश बस्तु भाव खुल्शा गाक्तेक्म।

39 मिनु इजीप्त रे कुरशो बोरब ओख्ती मसुप्शो निशो फस रे शोब्ले चोम्तेकम। मारदे हना इजीप्त रागी रे खेरचा पुंडसीतीके मेकेर लाम्जी सेल्ले मचाप्शो बाक्तेकम।

40 इस्राएलीपुकी ४ सहे ३० बर्स इजीप्त रागीमी बाक्शो बाक्मा बाक्त। उत्पत्ती १५:१३

41 मिनु ४ सहे ३० बर्स गाम नाक्ती, परमप्रभु यावे आ योत्रशो इस्राएली नेल्ल इजीप्त रागी रे गाक्मा बाक्त।

42 मेको नाक्दो इस्राएलीपुकीमी परमप्रभु यावे आ डोंइती शुश मिम्तीक नाक्दो दुम्माक्त। मारदे हना मेको आन कली इजीप्त रागी रे गुंडदा बाक्त। मेको परमप्रभु यावे आ नाक्दो बाक्ब। इस्राएल डा मुर आन पाला नेल्लेमी मेको मिम्तीक नाक्दो बाक्ब। यसैया ३०:२९

### पास्सा चाड दोपा मानेचा

43 मिनु परमप्रभु यावेमी मोसा नु हारून आस कली “पास्सा दोपा पचा आं अरेशो लोत्र मार बाक्त देंशा हना, अर्को रागी डा मुरुम मेको जचा ब्वचा मदुम्ब।

44 खोइक्तीक चिनु खोइश्शो इन वाइलपुकीम चहिं जचा ब्वचा दुम्नीम। उत्पत्ती १७:१२-१३

45 तन्न अर्को रागी डा मुर इन दातेमी बाक्त हना यो, गेय पाइब हना यो जचा ब्वचा मदुम्ब।

46 मेको पास्सा डा पाठा आन खिंमी ब्वचा माल्नीम। आ श्ये लाडगा गुंडचा मदुम्ब। आ रुश का यो जिक्चा मदुम्ब। यूहन्ना १९:३६

47 इस्राएली नेल्लेमी मोदेशो पचा माल्नीम। प्रस्थान

48 इन दातेमी अर्को रागी डा मुर काम परमप्रभु यावे कली पास्सा चाड मानेचा दाक्ताक्व हना, आ खिं डा गेय पाइब वोंइश मुर नु आ तौ आन कली खोइक्तीक चिनु खोइश्शा ला, इस्राएली आन नेक्था जाक्शा, पास्सा चाड मानेने चाप्ब। मोपा ला इन खोदेशो दुम्ब। मारदे हना खोइक्तीक चिनु मखोइश्शो मुरुम जने ब्वने मचाप्नीम।

49 मेको इन कली नु इन दातेम बाक्ब अर्को रागी डा मुर आन कली अरेशो लोव्र का बाक्ब” दे परमप्रभुमी देंत। लेवी १९:३४; लेवी २४:२२

50 मिनु परमप्रभु यावेमी मोसा नु हारून आस कली दोदेशो देंमे, मोदेशो इस्राएली नेल्लेमी पाम्तेक्म।

51 मिनु मेको नाक्ती परमप्रभु यावेमी इस्राएली थर आन कली हुल हुल पा इजीप्त रागी रे गुंडताक्व।

## 13

डोंइती डा तौ परमप्रभु के बाक्ब

1 मिनु परमप्रभु यावेमी मोसा कली

2 “इस्राएलीपुकी, इन डोंइती जरमेशो तौ नु इन बी ब्यफ, क्यारश भेडा आन डोंइती जरमेशो बोहोर बोका योव्रशा गेयीनी। मारदे हना मेको आं के बाक्नीम, दे मुर आन कली देंचा माल्ब” देंत। प्रस्थान १३:१२, १३; प्रस्थान २२:२८

3 मिनु मोसामी मुर आन कली “गेपुकी इजीप्त रागीम वाइलीम वाइल दुम्शा, ब्रोंइशा, एक जाक्शो नाक्त मप्रेदीन। परमप्रभु यावेमी इन कली आ सक्तिमी गुंडताक्व। मोपतीके मेको नाक्त गे बोरब ओरुत्ती मसुप्शो शोब्ले ला जचा माल्नीनी। प्रस्थान १२:३३-३४

4 गे मुलाक्ती आबीब महिनामी गूतीनी। प्रस्थान १२:२

5 मिनु परमप्रभु यावेमी इन किकी पिपी आन कली ‘कनानी, हित्ती, एमोरी, हिव्वी नु यबुसी आन रागी इन कली गेनुड’ दे कसम जशो बाक्माक्त। मेको रागीमी जाक्दीशशा, आबीब महिनामी पास्सा चाड मानेचा माल्नीनी। मेको रागीम दूध नु खुदो शुश बाक्ब, मारेइ मारेइ यो शुश ग्रेल्ब। उत्पत्ती १५:१८

6 ७ नाक्त सम्म बोरब ओरुत्ती मसुप्शो शोब्ले जचा माल्नीनी। मेको आ नोले डा नाक्ती परमप्रभु यावे आ नेमी चाड का मानेचा माल्नीनी। प्रस्थान १२:१५-१६

7 मिनु बोरब ओख्ती मसुप्शो शोब्ले ७ नाक्त सम्म जचा माल्नीनी। इन बाक्तीके नेल्लेमी बोरब ओख्ती सुप्शो शोब्ले काइ वोइक्चा मदुम्ब। मिनु बोरब ओख्ती यो वोइक्चा मदुम्ब।  
१कोरिन्थी ५:८

8 मेको नाक्ती इन आल आन कली 'परमप्रभु यावेमी इं कली इजीप्त रागी रे गुंडशो कोइचा, दे ओदेशो पाइनय' दे शेंचा माल्नीनी।

9 मेको पास्सा चाड इन गुइमी नु इन कुप्फीम मिम्तीके चिन्ड खोदेशो पा बाक्चा माल्ब। मोपा परमप्रभु यावे आ अरेशो लोव्र गे नु बाक्ब। मारदे हना परमप्रभु यावेमी आ ठेयब सक्तिमी इन कली इजीप्त रागी रे गुंडताक्व। ब्यवस्था ६:८; ब्यवस्था ११:१८

10 मोपा गेपुकी बर्स बर्समी मेको चाड ठीक नाक्तीम मानेशा आ अरेशो लोव्र पचा माल्नीनी।

11 मिनु परमप्रभु यावेमी इन कली नु इन किकी पिपी आन कली 'गो मेको रागी इन कली गेनुड' दे कसम जशो, कनानी आन रागीम चोव्रदीब।

12 गे इन डोंइती जरमेशो तौ नु इन बी ब्यफ, क्यारश भेडा आन डोंइती जरमेशो परमप्रभु यावे कली गेचा माल्नीनी। डोंइती जरमेशो बोहोर बोका परमप्रभु यावे केन नम।

13 तन्न इन गधैनी आ डोंइती जरमेशो बोहोर प्रोंइचा कली मेको आ पा डा पाठा का गेचा माल्नीनी। पाठा गेचा मदाक्ताक्नी हना, आ शुर जिक्चा माल्नीनी। इन डोंइती जरमेशो तौ आ पा डा क्येट गेचा माल्नीनी।

14 मिनु काबु इन आलपुकीमी 'गे मारदे ओदेशो पाइनीनी?' दे हिल्लो पाइनीम। मेना गेपुकीमी 'परमप्रभु यावेमी इं कली आ ठेयब सक्तिमी इजीप्त रागी रे गुंडताक्व। वाइलीम वाइल दुम्शो रे यो प्रोंइतु' दे इन आल आन कली शेंचा माल्नीनी। प्रस्थान १२:२६, २९

15 'फाराओम इं कली काइ लचा मगेतीके, परमप्रभु यावेमी इजीप्त रागी डा मुर आन डोंइती जरमेशो तौ नु बस्तु भाव आन दाते डा डोंइती जरमेशो नेल्ल साइक्तु। मोपतीके डोंइती जरमेशो

बोहोर बोका परमप्रभु यावे कली चढ़ेनीकी। तन्न डोंइती जरमेशो तौ आ पा डा क्येट गेशा प्रोंइनीकी।

16 एको पतीके इन गुइमी नु इन कुप्फीम मिम्तीके चिन्ड खोदेशो पा बाक्चा माल्ब। मारदे हना परमप्रभु यावेमी इं कली आ ठेयब सक्तिमी इजीप्त रागी रे गुंइताक्व' दे इन आल आन कली शेंचा माल्नीनी” देंत।

### गोस्स के थाम नु मी के थाम

17 मिनु फाराओमी इस्राएली आन कली लचा गेवानु, परमप्रभुमी इस्राएली आन कली आन नेक्था डा लां पलिस्ती आन रागी डा लां मकोइद। मारदे हना मुरपुकीमी “लडाइ पचा माल्तेक्म हना, हिंशा इजीप्त रागी लेत्नीमी, कों” दे लाइश्शो लां कोंइताक्व।

18 मोपा परमप्रभुमी इस्राएली आन कली गोरशो रागी रे लल समुन्द्र गे डा लां कोंइताक्व। मिनु इस्राएली इजीप्त रागी रे गाक्मानु, लडाइ पचा कली यो ठीक दुम्शो बाक्तेक्म।

19 मोसामी योसेफ आ रुश यो कुरतु। मारदे हना योसेफमी इस्राएली आन कली “परमप्रभुम इन कली थमा पा एको रागी रे गुंइशा लाइब। मेना आं रुश यो लाइक्चा माल्नीनी” दे कसम जपाइश्शो बाक्माक्त। उत्पत्ती ५०:२५; यहोसु २४:३२

20 मेकोपुकी सुक्कोथ सहर रे लशा, एथाम सहर डा गोरशो रागी आ नेक्थामी बास बाक्तेक्म।

21 मिनु परमप्रभु यावेमी मेकोपुकी नाक्दो नाक्ती गाक्ने चाप्मेक्ल, दे मेको आन कली लां कोंइचा कली नाक्ती गोस्स के थाम नु नाक्दो मी के थाम दुम्शा, मेको आन डोंइडोंइती गाक्त। प्रस्थान ४०:३६-३८; गन्ती ९:१५-२३; भजन संग्रह ७८:१४; १कोरिन्थी १०:१

22 नाक्ती गोस्स के थाम नु नाक्दो मी के थाम आन डोंइडोंइती गाक्चा मप्रोन।



10 मिनु इस्राएलीपुकी फाराओ नु आ लडाइ पाइबम आंम कली खेदा पशो तशा, हिंशा खिंखि पाम्तेक्म। मिनु परमप्रभु यावे कली “वारच पाइय्यीकी” दे पुंइतेक्म।

11 मिनु मेकोपुकीम मोसा कली “गे आंइ कली मारदे इजीप्त रे गुंइदीकी? इजीप्त रागीम मुर थिम्तीके मबाक्बा डा? मारदे गोरशो रागीम साइक्थ चाक्गी?

12 गोपुकी इजीप्त रागीम बाक्कानु, इन कली ‘आंइ कली श्येत मगेकी। इजीप्त डा मुर आन गेय पचा गेकी, मदेका डा? गोरशो रागीम बेक्चा क्येडा इजीप्त रागी डा मुर आन गेय पक वा’ ” दे मोसा कली ग्रीतेक्म।

13 मिनु मोसामी मुर आन कली “महिनीन। मुलाक्ती परमप्रभु यावेमी दोपा इन कली इजीप्त डा मुर रे प्रोइबा, कोव्रशा बाक्कीन। मुलाक्ती तशो इजीप्त डा मुर आन कली गे लेंशा गेनायो मताइनीनी।

14 इन पचा डा लडाइ परमप्रभु यावेमी पाइब। गे थुं नाइशशा बाक्कीन” दे माइक्तीमी। ब्यवस्था १:३०; २इतिहास २०:१५, २९; यसैया ५१:९

15 परमप्रभु यावेमी मोसा कली “मारदे आं कली ठेयब सेंदा पा पुंइनेवे? इस्राएली आन कली ‘गाक्कीन’ दे मतो।

16 इ कोक्के लल समुन्द्र तार दिंदो। मो पवीनु, समुन्द्र ब्राशा, गाक्तीक लां दुम्ब। इस्राएलीपुकी हिलो मबाक्शो लांम गाक्ने चाप्नीम।

17 मिनु गोमी इजीप्त डा मुर आन कली काइ मटीब दुम्पाइक्नुड। मो दुम्मेनु, इस्राएली आन नोले खोइशशा, लल समुन्द्र ओव्रशा, खेदा पाइनीम। मिनु गो फाराओ आ मुरपुकी, आ बग्गी नु आ शारा डोइक्ब नु लडाइ पा आं सक्ति कोइशा ग्रानुड।

18 गो फाराओ, आ बग्गी नु आ शारा डोइक्ब आन कली आं सक्ति कोइनुड। मिनु इजीप्त डा मुरपुकीमी ‘परमप्रभु यावेमी पाप्तु’ दे तुइक्नीम” देत।



मचबेम। मोपा परमप्रभु यावेमी इजीप्त डा लडाइ पाइब आन कली समुन्द्रमी खुम्तु।

28 मिनु ब्वाक्कु लेंशा डोंइती डा खोदेंशो दुम्मेनु, इजीप्त डा बग्गी, शारा डोइक्बपुकी नु फाराओ आ लडाइ पाइब आन कली सुम्शा, समुन्द्रमी योल्ताक्व। सुइ यो मब्रोंडम।

29 तन्न इस्राएली चहिं सोत्रशो लां लशा, समुन्द्र शोकसाक्म। ब्वाक्कु गारो खोदेंशो पा, आन ग्युरा नु पेरा गे बाक्त।

30 मोपा परमप्रभु यावेमी मेको नाक्ती इस्राएली आन कली इजीप्त रागी डा लडाइ पाइब रे प्रोंइतीमी। मिनु इस्राएलीपुकीमी इजीप्त डा मुर आन कली दिल दिल थिश्शा, समुन्द्र आ नेक्था बेक्शो ताम्तेक्म।

31 मिनु मुरपुकीमी “परमप्रभु यावेमी इजीप्त डा मुर आन कली साइक्तीमी” दे तुइश्शा, परमप्रभु यावे क्येडा हितेक्म। मिनु “परमप्रभु यावेमी नेल्ल पने चाप्ब। मोसा आ गेय पाइब बाक्ब” दे थमा सुइक्तेक्म। प्रस्थान १९:९; २इतिहास २०:२०

## 15

### मोसा आ कुम्सो

1 मिनु नोले मोसा नु इस्राएलीपुकीमी परमप्रभु यावे कली कुम्सो पाम्तेक्म। “गो परमप्रभु यावे कली कुम्सो पाइनुड। मारदे हना मेकोमी आ ठेयब सक्ति कोंइशा, ग्रात। शारा नु शारा डोइक्ब आन कली समुन्द्रमी ताइक्ताक्व। प्रकाश १५:३

2 यावे आं सक्ति बाक्ब। आं कली कुम्सो पपाइक्ब। मारदे हना आं कली आ जोरी सत्रु रे प्रोंइती। मेको आं परमप्रभु बाक्ब। मिनु गो मेको कली ठेयब सेल्लुड। परमप्रभु आं आफ आ परमप्रभु बाक्ब। मिनु गो मेको कली मान पाइनुड। भजन संग्रह ११८:१४; यसैया १२:२

3 परमप्रभु यावे लडाइ पाइब बाक्ब। मेको आ नें परमप्रभु यावे बाक्ब। प्रस्थान १४:१४; भजन संग्रह ४६:१०; प्रस्थान ३:१५

4 मेकोमी इजीप्त डा फाराओ आ बग्गीपुकी नु आ लडाइ पाइब आन कली लल समुन्द्रमी योल्पाइवतु। ठेयब कप्तान नेल्ल आन कली ब्वाक्कुम गुम्पाइवतु।

5 समुन्द्र डा ब्वाक्कुमी मेको आन कली सुम्तु। मेकोपुकी फुल्लु खोदेशो पा आगा गुम्तेक्म।

6 परमप्रभु यावे, इन सक्ति ठेयब बाक्ब। इन सक्तिमी इन जोरी सत्रु आन कली थुम्पाइवतीनी।

7 इन जोरी सत्रुमी गे नु लडाइ पामेनु, गे इन ठेयब दुम्तीकेमी मेको आन कली ग्रातीनी। मिनु गाइशशा मेको आन कली मीम भूस चोशो खोदेशो पा थुम्पाइवतीनी।

8 इन नेमी मुइशशा, समुन्द्र डा ब्वाक्कु कली ग्येत्थ गे पोक्तीनी। समुन्द्र गारो बुदी सोजो पा ग्येत्थ गे बोक्शा, आ पुं चहिं सोत्रशो लां दुम्त। यसैया ५१:१०

9 आंइ जोरी सत्रुमी 'मेको आन कली खेदा पा, ब्रो ब्रु थित्नय। गो ग्येरशा, इं ग्राशो थोत्रक योक्मुइनय। इं तरवार शोइशशा, नेल्ल आन कली साइक्नय' देंतेक्म।

10 गे चहिं फश पपाइवतीनी। मिनु समुन्द्रमी मेको आन कली सुम्तीमी। मेकोपुकी फलाम खोदेशो पा ठेयब समुन्द्रम गुम्तेक्म।

11 परमप्रभु यावे, देवी देवता आन दातेमी इन खोदेशो ठेयब सुइ मबाक्नीम। इन खोदेशो सक्ति पाइशशो, ठेयब मान ताइब सुइ मबाक्नीम। इन ठेयब गेय हिंचा डा बाक्ब। गे छक लाक्चा डा गेय पाइब बाक्नीनी। प्रस्थान ८:६; प्रस्थान १८:११; भजन संग्रह ८६:८

12 इन ग्युरा गुइ दिंनिनु, रागीम मेको आन कली दावतु।

13 गे इन गुंइशो मुर आन कली गेना हना यो शिशी पा, लां कौंइताक्नी। मेको आन कली इन सक्तिमी इन आंम बाक्तीकेम खुल्तीनी।

14 जात जात डा मुरपुकी इन लोत्र नेशा शुश हितेक्म। पलिस्ती रागी डा मुरपुकी हिंशा, खिंखिं पाम्तेक्म। यहोसु २:९-११

15 मुल एदोम रागी डा ठेयब मुरपुकी हितेक्म। मोआब रागी डा ठेयब मुरपुकी हिंशा खिंखि पाम्तेक्म। कनान रागीम बाक्बपुकीम आन सक्ति साम्तेक्म।

16 परमप्रभु यावे, इजीप्त रागी रे इन गुंडशो मुरपुकी मजाक्दीम्मा सम्म मेको आन जोरी सत्रु इन सक्ति डा गेय तशा, हिंशा फुल्लु खोदेशो पा सिक्सी पा बाक्तेक्म। मोपा हिंशा मेको आन थुं लुकच लत।

17 गे इन मुर आन कली आन रागी ओइनीनी। मिनु इन आंम बाक्तीक डांडाम बाक्पाइक्नीनी। परमप्रभु यावे, मेको इन बाक्तीके आंमा सेलतीनी। इन आंम बाक्तीक खिं गे आंमा सेलतीनी। भजन संग्रह ७८:५४

18 परमप्रभु यावे गेना हना यो पिप बाक्ब” दे कुम्सो पाम्तेक्म। भजन संग्रह ९३:१

19 फाराओ आ बग्गी नु शारा डोइक्बपुकी समुन्द्र डा लां लाम्तेक्म। परमप्रभु यावेमी समुन्द्र डा ब्वाक्कु लेंशा लेप्पाइशशा, मेको नेल्ल आन कली योल्पाइक्तु। इस्राएली चहिं समुन्द्र डा सोव्रशो लां रे पा गाक्तेक्म। प्रस्थान १४:२२-२९

### मिरयामम यो कुम्सो पशो

20 हारून आ समी मिरयाम परमप्रभु आ लोव्र पाइब यो बाक्त। मेकोमी खैजडी ताप्शा, कुम्सो पथ लमेनु, अरु मीश मुरपुकी यो खैजडी ताप्शा, सिल पना पन मेको आ नोले खोइक्तेक्म। भजन संग्रह ६८:२६

21 मिरयामम मेको आन कली कुम्सो पा लोव्र लेशशा “परमप्रभु यावे कली कुम्सो पने। मारदे हना मेकोम ठेयब लडाइ पा ग्रात। शारा नु शारा डोइक्ब आन कली समुन्द्रम ताइक्ताक्व” दे कुम्सो पाप्तु।

मारा डा कशो ब्वाक्कु

22 मिनु मोसामी इस्राएली आन कली लल समुन्द्र रे शुर माइशो गोरशो रागी कोंइताक्व। मिनु मेको गोरशो रागीमी नाक्त सां सम्म गाक्मानु, ब्वाक्कु मथिदेम। उत्पत्ती २०:१

23 माराह माइशोमी जाक्दीशशा, मेक डा ब्वाक्कु तूने मचबेम। मारदे हना मेको ब्वाक्कु कशो बाक्त। मोपतीके मेको कली माराह नें वोइक्तेक्म। हिब्रू लोव्रमी मारा देशो कशो रुम्सीब।

24 मिनु मुरपुकीमी मोसा कली “मुल मार तूचा?” दे गन गन पाम्तेक्म। प्रस्थान १६:२

25 मोसामी चहिं परमप्रभु यावे कली पुंडस डा पुंडस बाक्त। मिनु परमप्रभु यावेमी मोसा कली रवा आ शी का कोंइताक्व। मिनु मोसामी मेको शी ब्वाक्कुम ब्वारताक्व। मिनु मेको ब्वाक्कु मकशो ब्रोव्रशो दुम्त। मेकेर इस्राएली आन कली आ फुल्लुम मुशा ब्रेक्शो नु आन पतीक लोव्र गेशो बाक्त। मोपा मेको आन कली नाक्ताक्व। उत्पत्ती २२:१

26 मिनु मेकोमी “गे परमप्रभु यावे, इन परमप्रभु आं लोव्र नेंशा, आं डोंइती ठीक पाइतीनी हना, आं शेंशो लोव्र नेंशा, टिशा, आं अरेशो लोव्र टीतीनी हना, गो इजीप्त रागी डा मुर आन कली पपाइशो रोइ इन कली मपपाइक्नुड। मारदे हना गो इन कली सापाइक्ब परमप्रभु यावे नड” देंत। ब्यवस्था ७:१५; उत्पत्ती २०:१७; ब्यवस्था ३२:३९; भजन संग्रह ३०:३; यसैया ५७:१८

### एलीम रागीमी जाक्दीशो

27 मिनु इस्राएली मेकेर रे लशा, एलीममी जाक्दीत्तेक्म। मेकेर १२ ओटा धारा नु ७० ओटा रवा बाक्तेक्म। मेकोपुकी मेको ब्वाक्कु आ नेक्था बाक्तेक्म।

## 16

इस्राएलीपुकीम गन गन पशो

1 मिनु इस्राएली नेल्ल एलीम रे लशा, सीन माइशो गोरशो रागी जाकदीत्तेक्म। सीन माइशो गोरशो रागी एलीम नु सीनै डांडा आस दातेमी बाक्ब। इजीप्त रागी रे गाक्शा नोले मेकेर आबीब आ नोले डा महिना डा १५ नाक्तीम जाकदीत्तेक्म।

2 मिनु इस्राएली नेल्ल मोसा नु हारून आस कली तशा गाइशशा, प्रस्थान १७:२-३

3 “इजीप्त रागी उइ परमप्रभु यावेमी आंड कली सद हना, रिम्शो दुम वा। मेकेर श्ये नु शोब्ले शुश बाक्त। गे आंड कली जचा मगेथु, साइक्चा कली एको गोरशो रागीमी चाक्तीसी” दे गन गन पाम्तेक्म। प्रस्थान १४:११

4 मिनु परमप्रभु यावेमी मोसा कली “नेनो, गो इन कली रेउ यिशो खोदेशो पा सरीड रे शोब्ले यिपाइक्नुड। मिनु मुरपुकीम नाक्त किंत किंत गुप्चा माल्नीम। खेयप का गुप्मेनु, नाक्त का कली ला गुप्चा माल्नीमी। आं अरेशो लोव्र पाइबाक्मा कों, मपाइबाक्मा, गो मेको आन कली नाक्नुड। प्रस्थान १६:१५; उत्पत्ती २२:१

5 मुरुमी सुक्रबार आन गुप्शो शोब्ले नाक्त का कली ठीक पाम्तेक्म हना, नाक्त का कली गुप्शो यो, नाक्त निक्शी कली ठीक दुम्ब” देंत।

6 मिनु मोसा नु हारूनम इस्राएली आन कली “परमप्रभु यावेमी इन कली इजीप्त रागी रे प्रोंइता, दे आपो नाक्दो लेंशा मिम्पाइक्ब।

7 सुनी कना गे परमप्रभु यावे आ छेडछेड गूशो ताइनीनी। मारदे हना मेकोमी इन परमप्रभु यावे कली गन गन पशो तुइक्ताक्व। गो निक्शी सु नस्कु डा? गे आंस पर्वम गाइक्नीनी?” देंताक्स।

8 मिनु मोसामी इस्राएली आन कली “परमप्रभु यावेमी आपो नाक्दो इन कली श्ये गेब, सुनी कना रूथ्री शोब्ले गेब, इन गन गन पशो लोव्र नेंतु, दे तुइक्तीन। गो निक्शी सु नस्कु डा? इन गन गन पशो आंस कली ममाइ, परमप्रभु यावे नु कका गाइक्ताक्नी दे तुइक्तीन” देंत।

9 मिनु मोसामी हारून कली “गे मुर नेल्ल आन कली ‘परमप्रभु

यावे आ डोंडती जाक्कीन। मारदे हना मेकोमी इन गन गन पशो नेंतु' देंचा माल्नेवे" देंत।

10 मिनु हारूनमी इस्राएली नेल्ल आन कली लोव्र पवानु, मेकोपुकी गोरशो रागी गे कोव्रतेक्म। मिनु मेकेर गोस्सुमी परमप्रभु यावे आ छेडछेड गूशो ताम्तेक्म। गन्ती १२:५; गन्ती १४:१०; गन्ती १६:१९

11 मिनु परमप्रभु यावेमी मोसा कली

12 "गो इस्राएली आन गन गन पा पशो लोव्र नेंता। गे मेको आन कली 'आपो नाक्दो श्ये ब्वाइनीनी। मिनु सुनी कना रूथ्री शोब्ले जाइनीनी। गो परमप्रभु यावे, इन परमप्रभु नड, दे गे तुइक्नीनी' दे माइक्मी" देंत।

### बटटाइ चिक्ब नु मन्ना शोब्ले गेशो

13 मिनु नाक्दो बटटाइ गूमा बाक्त। मिनु इस्राएली आन बाक्तीक नेल्ल सुम्मे बाक्त। मिनु सुनी कना आन बाक्तीकेमी शुश सीत यिशो बाक्माक्त। गन्ती ११:३१

14 मिनु सुनी कना सीत मजाम्म सम्म गोरशो रागी डा खपीम फुरश खोदेशो पा आइक्च गेडा बाक्त।

15 इस्राएलीपुकीमी मेको तशा "मार में?" देंमुम्तेक्म। मारदे हना मार बाक्मे, मतुइक्तम। मिनु मोसामी मेको आन कली "परमप्रभु यावेमी इन कली गेशो मन्ना शोब्ले एकोन बाक्ब। प्रस्थान १६:४; ब्यवस्था ८:३; यूहन्ना ६:३१; १कोरिन्थी १०:३

16 परमप्रभु यावे आ अरेशो लोव्र मार बाक्ब देंशा हना, इन मुर नेल्लेमी गिश जने चाप्नीमी, मिश गुपीन। इन ताम्बुमी गिश जना मुर बाक्नीमी, मिश गोमेर गुप्चा माल्नीनी" दे इस्राएली आन कली देंत। गोमेर का २ लिटर कि ४ माना खोदेशो बाक्ब।

17 मोसामी इस्राएली आन कली दोदेशो देंमे, मोदेशो पाम्तेक्म। का निक्शीमी शुश, का निक्शीमी इक्कका ला गुप्तेक्म।

18 तन्न पुक्गमेनु, मेको शुश गुप्ब नु इच्चका ला गुप्ब नेल्ल आन के उइक्थ उइक्थ दुम्माक्त। नेल्लेमी गिश जचा दाक्तमे, मिश गुप्तेक्म। २कोरिन्थी ८:१५

19 मिनु मोसामी मेको आन कली “दीसा सुनी सम्म सुइमी मारेइ हेंचा मदुम्ब” दे माइक्तीमी। प्रस्थान १६:४; मत्ती ६:३४; लूका ११:३

20 तन्न मेकोपुकीमी मोसा आ देशो मटीम। मिनु का निक्शीमी मेको मन्ना सुनी सम्म हेंदमे बाक्त। मिनु लुस्पु जोल्शा, शुश रिना पाइक्तु। मिनु मोसा शुश गाइक्ताक्व।

21 मिनु गिश माल्दमे, सुनी सुनी गुप्तेक्म। नां चोक्तानु, मेको यत।

### नाइक्तीक नाक्त कली मन्ना गुप्शो

22 मिनु सुक्रबार नाक्ती मुरपुकीम मुर का कली गोमेर निक्निक्शी मन्ना गुप्तेक्म। इस्राएली आन कली कोत्रब मुरपुकीमी मो पाम्तेक्म दे मोसा कली देंतेक्म। गोमेर का २ लिटर कि ४ माना खोदेशो बाक्ब।

23 मिनु मेकोमी “परमप्रभु यावेमी इन कली गे मार पचा माल्नीनी, मेको शेंशो बाक्ब। मारदे हना दीसा परमप्रभु यावे कली मिम्शा नाइक्तीक नाक्ती बाक्ब। मोपतीके मुलाक्त माल्शो जचा थोत्रक क्येने चोने। लीशो चहिं दीसा सुनी सम्म हेंचा दुम्ब” देंत। उत्पत्ती २:२-३

24 मिनु मोसा आ देशो खोदेशो पा आ दीसा सम्म हेंताक्म। मिनु मेको रिना मपाइक्थु, लुस्पु यो मजोल।

25 मिनु मोसामी “गे मुलाक्ती जने। मारदे हना परमप्रभु यावे आ नाइक्तीक नाक्ती बाक्ब। मुलाक्ती लाडगाम मारेइ मथिंसीब।

26 गे ६ नाक्त गुप्चा माल्नीनी। ६ नाक्त आ दीसा डा नाक्त मारेइ मथिंसीब। मारदे हना नाइक्तीक नाक्त बाक्ब” देंत।

27 मिनु सन्चरबार नाइक्तीक नाक्त का निक्शी मुर मन्ना गुप्थ लाडगा गूमानु, मारेइ मथिदेम।

28 मिनु परमप्रभु यावेमी मोसा कली “गेपुकी आं शेंशो नु आं अरेशो गेना सम्म मटीनीनी?

29 नोफा दाइशशा नेनीन “परमप्रभु यावेमी इन कली सन्चरबार नाइक्तीक नाक्ती गेपु। मोपतीके सुक्रबार इन कली नाक्त निक्शी कली जचा थोव्रक गेब। मिनु नाइक्तीक नाक्ती इन बाक्तीक बाक्तीकेमी बाक्कीन। इन खिं रे लाडगा मलने’ दे मुर आन कली देनो” देत।

30 मिनु मुरपुकी सन्चरबार नाक्ती नांइसाकम।

31 मिनु इस्राएलीपुकीम मेको गेडा कली मन्ना दे नें वोइक्तेकम। मेको बुश धन्या वांचेर खोदेशो बाक्त। मेको खुदोमी सेल्शो शोब्ले खोदेशो पा ब्रोव्रमाक्त।

### मन्ना हेंशो

32 मिनु मोसामी “परमप्रभु यावे आ अरेशो लोव्र मार बाक्त देंशा हना, मेकोमी ‘मेको जचा थोव्रक गोमेर का हेंचा माल्नीनी। इन कली इजीप्त रागी रे प्रोइशा, चाक्गानु, गोरशो रागीमी गेशो जचा थोव्रक मेको बाक्ब दे शुश पाला डा मुर आन कली कोइचा कली हेंदो। गो इन कली इजीप्त रे गोरशो रागीमी चाक्शा, दोपा थुलु, मेको नेल्लेमी तामेक्ल’ देत” देत। गोमेर का इस्राएली आन अन्न पुक्तीके का बाक्त। मेको २ लिटर रिक्ब बाक्त। मिनु ओमेर का ४ माना खोदेशो बाक्ब।

33 मिनु मोसामी हारून कली “बोस का लतो। मिनु ओमेर का मन्ना मेकेर कुर पावो। मेको नेल्ल पाला डा मुरपुकीम तचा डा पा परमप्रभु यावे आ डोंइती वोतो” देत। हिब्रू ९:४

34 परमप्रभु यावेमी मोसा कली दोपा देंमे, मोपा हारूनमी कबल पशो सन्दोस आ डोंइती वोइक्तु।

35 मिनु इस्राएलीपुकीमी ४० बर्स सम्म मन्ना जाम्तेकम। मुर बाक्तीक कनान रागी डा सांद मजाक्मा सम्म मेको जाम्तेकम। यहोसु ५:१२

36 गोमेर का एफाह डा १० भाग बाक्ब। एफाह का ठेयब पुक्तीके बाक्ब।

## 17

इस्राएली मस्साह नु मेरीबा जाक्शो

1 मिनु इस्राएली नेल्ल सीन माइश्शो गोरशो रागी रे गाक्शा, परमप्रभु यावे आ देशो बिश्शा, रेफीदीम माइश्शोमी बाक्तेक्म। मेकेर चहिं तूचा ब्वाक्कु मथिदम। गन्ती ३३:१२-१४

2 मोपतीके “मोसामी आंइ कली मरिम्शो लां कोंइब” दे गाइश्शा, मोसा कली “आंइ कली तूचा ब्वाक्कु गेकी” दे जिचा पोक्तेक्म। मिनु मोसामी मेको आन कली “गे आं कली मारदे जिचा तोइनीनी? मारदे परमप्रभु यावे सक्ति पाइश्शो बाक्ब, दे थमा मसुइक्नीनी?” देंत। ब्यवस्था ६:१६

3 मिनु मुरपुकी ब्वाक्कु तूतू दाक्शा, गाइक्ताक्म। मेकोपुकीमी मोसा कली “गे मारदे आंइ कली इजीप्त रागी प्रोंइपाइय्यीकी? आंइ कली, आंइ आल आन कली, आंइ बस्तु भाव आन कली तूचा ब्वाक्कु मबा, आंइ कली बेक्पाइक्चा कली इजीप्त प्रोंइपाइय्यीकी?” देंतेक्म। प्रस्थान १५:२४; प्रस्थान १६:२; गन्ती १४:-; गन्ती १७:६-२८

4 मो देंमानु, मोसामी परमप्रभु यावे कली “गो एको मुर आन कली मार पाइनुडा? आं कली फुल्लु आप्शा, साइक्चा चिक्तायीमी। मुल मार पड?” देंत। गन्ती १४:१०

5 मिनु परमप्रभु यावेमी मोसा कली “इस्राएल डा खाल्पा आन कली लाइश्शा, इस्राएली आन डोंइती गाक्को। नील खोला तुप्शो कोक्के यो लाइश्शा लावो। प्रस्थान ७:२०

6 गो होरेब माइश्शो डांडा आ नेक्था सेरथे फुल्लु तार इ डोंइती बाक्नुड। मिनु गे मेको सेरथे फुल्लु तुप्चा माल्नेवे। मिनु, सेरथे फुल्लु रे ब्वाक्कु यीब। मिनु मुरपुकीम तूने चाप्नीम” देंत।

मिनु इस्राएली आन खाल्पा आन डोंइती मोसाम मो पाप्तु। गन्ती २०:११; १कोरिन्थी १०:४

7 मिनु मोसामी मेको सेरथे फुल्लु बाक्तीक कली मास्साह नु मेरीबा नें वोइक्तु। मारदे हना इस्राएलीपुकीमी परमप्रभु यावे कली नाक्शा गाइश्शा “परमप्रभु यावे आंइ दातेमी बाक्ब” दे थमा मसुदम। भजन संग्रह ९५:८-९; मीका ३:११

अमालेकी नु लडाइ पा ग्राशो

8 मिनु अमालेकी रेफीदीमम जाक्शा, इस्राएली नु लडाइ पाम्तेक्म। उत्पत्ती ३६:१२-१६

9 मिनु मोसामी यहोसु कली “इं मुरपुकी रे योव्रशा, अमालेकी नु लडाइ पथ लावो। गो परमप्रभु आ कोक्के शेशा, दीसा मेको डांडा तार राप्शा बाक्नुड” देंत। गन्ती १३:८,१६

10 मिनु यहोसुमी मोसाम देशो खोदेशो पा अमालेकी नु लडाइ पाप्तु। मोसा, हारून नु हुर चहिं मेको डांडा डोंइसाक्म। प्रस्थान २४:१४

11 मोसामी आ गुइ पोक्गानु, इस्राएलीपुकी ग्रातेक्म। आ गुइ तोक्गानु, अमालेकीपुकी ग्रातेक्म।

12 मिनु मोसा आ गुइ योक्तीके हारून नु हुरमी फुल्लु का थांइशा, मेको तारी निप्पाइक्ताक्स। मिनु मोसा आ गुइ तिक्शा, वोइक्ताक्स। मोदेशो पा का ग्युरा गे, का पेरा गे बाक्शा, नां मपेरदा सम्म गुइ पोक्स डा पोक्स बाक्ताक्स।

13 मिनु यहोसु नु आ मुरुमी अमालेक नु आ मुर आन कली ग्राशा, तरवारम साइक्तेक्म।

14 मिनु परमप्रभु यावेमी मोसा कली “एको लडाइ गेना हना यो मिम्चा कली किताबम ब्रेक्तो। गो अमालेकी आन कली रागी रागी रे क्याम्नुडमी, दे यहोसु कली मिम्पतो” देंत। ब्यवस्था २५:१७-१९; १सामुएल १५:२-३

15 मिनु मोसामी चढ़ेतीक का सेल्शा “परमप्रभु यावे आं छेदर बाक्ब” दे नें वोइक्तु।

16 मिनु मेकोमी “यावे आ नित्तीक गे इन गुइ पोक्कीन! मारदे हना परमप्रभु यावेमी ‘अमालेकी नेल्ल आन पालामी मेकोपुकी नु लडाइ पाइनुड’ दे डोंइती देशो बाक्ब” देंत। येरमीया ३:१७

## 18

यित्रो मोसा कली गुम्थ जाक्शो

1 मिनु मिदयान रागी डा नाक्सो मोसा आ शिउ यित्रोमी परमप्रभुमी मोसा नु इस्त्राएली आन पर्बम मार मार पवा नु परमप्रभु यावेमी मेको आन कली इजीप्त रागी रे दोपा गुंइदा, मेको नेल्ल नेना बाक्त। प्रस्थान ३:१

2 डोंइती मोसामी आ मीश नु आ तौ निक्शी आस कली आ माइत सोइश्शो बाक्माक्त। मुल यित्रोम मेको आन कली मोसा आ बाक्तीक चाक्तीमी। प्रस्थान ४:२०

3 मोसामी आ तौ का आ नें गेरशोम वोइश्शो बाक्त। मारदे हना मेकोमी “गो मतुइश्शो रागी डा मुर आन दातेमी अर्को रागी डा मुर दुम्ती” देंत। प्रस्थान २:२२

4 मिनु अर्को कली एलीएजर नें वोइक्तु। मारदे हना मेकोमी “आं आफ आ परमप्रभुमी आं कली फाराओ आ तरवार रे प्रोंइशा, वारच पाइक्ती” देशो बाक्त। १इतिहास २३:१५-१७

5 मिनु मोसा आ शिउ यित्रो, मोसा आ मीश नु आ तौ निक्शी गोरशो रागीमी मोसा कली गुम्थ जाक्तेक्म। मेना मोसामी आ ताम्बु परमप्रभु आ डांडा आ पुंमी कीतु।

6 मिनु यित्रोमी मोसा कली “इ शिउ यित्रो, इ मीश नु इ तौ निक्शी इ कली गुम्थ जाक्तक” दे लोव्र सोइक्ताक्व।

7 मिनु मोसा आ शिउ गुम्थ जाक्शा, सेउ पशा, पुक्पु पशा “दोपा बाक्नी” दे ताम्बुम ओंइताक्व।

8 मिनु मोसामी परमप्रभु यावेमी इजीप्त डा फाराओ कली नु आ मुर आन कली मार मार पवा, लांमी मार मार श्येत जामे, दोपा

परमप्रभु यावेमी मेको नेल्ल रे प्रोना, मेको नेल्ल आ शिउ कली शेंताक्व।

यित्रो थमा सुइक्ब दुम्शो

9 मिनु यित्रोमी परमप्रभु यावेमी इस्राएली आन कली गिश रिम्शो पवा नु इजीप्त डा मुर आन गुइ रे दोपा प्रोना मेको नेल्ल नेंशा, शुश ग्येरसाक्व।

10 मिनु मेकोमी “इन कली इजीप्त डा मुरपुकी नु फाराओ आ गुइ रे प्रोंडब परमप्रभु यावे कली ठेयब सेल्य।

11 देवी देवता आन क्येडा परमप्रभु यावे ला ठेयब बाक्ब, दे गो मुल तुइक्ताक्ड। आ मुर आन कली इजीप्त डा मुर आन गुइ रे प्रोंडतु। मारदे हना इजीप्तीपुकीमी मेको आन कली ठेयब लेशशा दिप्शो बाक्तेक्म” देंत। नेहेम्याह ९:१०; येरमीया ५०:२९

12 मिनु मोसा आ शिउमी परमप्रभु कली चोशा चढेतीक नु अरु चढेतीक यो चढेप्टु। मिनु हारून नु इस्राएल डा मुर आन खाल्पा नेल्ल मोसा आ शिउ नु परमप्रभु कली मान पा ठेयब सेलशा जाम्तेक्म। उत्पती ३१:५४

यित्रोम मोसा कली अर्ती गेशो

13 मिनु मोसा सुनी कना बोक्शा, मुर आन कली निसाफ पचा कली निस्साक्व। मुरपुकी सुनी रे जाक्शा, नाक्दो सम्म मोसा आ डोंडती बाक्तेक्म।

14 मिनु मोसा आ शिउ मी मोसा कली मोदेशो पा मुर आन कली निसाफ पशो तशा “गे मुर आन कली मार पाइनेवे? गे मारदे इ का ला गेय पना पन बाक्नेवे? मुरपुकी सुनी रे नाक्दो सम्म जाक्शा, बाक्शो बाक्नीमी” देंत।

15 मिनु मोसामी आ शिउ कली “मुरपुकीमी परमप्रभु आ देशो तुइक्चा दाक्नीम, मोपतीके जाक्नीम।

16 मेको आन दातेमी मार मार निसाफ पाचा माल्शो बाक्मे, मेको गो गारपाइक्नुड। मोपा गो निसाफ पचा माल्नुड। मिनु मेको आन



26 मेको मुरपुकीमी मुर आन कली निसाफ पची ना, निसाफ पाइनीम। मिनु ठेयब मुददा बाक्त हना, मोसा कली ब्रेत्ताकम। आइक्च मुददा चहिं आंमा निसाफ पांतेकम।

27 मिनु मोसामी आ शिउ कली लचा गेपु। मिनु मेको आ रागी लेत्त।

## 19

### सीनै डांडा जाकदीशो

1 मिनु इस्राएलीपुकी इजीप्त रागी रे गूशा महिना सां नोले सीनै माइशो गोरशो रागीमी जाक्तेकम।

2 डोंइती रेफीदीम माइशो रे लशा, सीनै माइशो डांडा आ डोंइती आन ताम्बु कीतेकम। मेको डांडा आ डोंइती बाक्शो बाक्तेकम।

3 मिनु मोसा परमप्रभु नु लोत्र पचा कली डांडा डोंइसाक्व। मिनु डांडा रे परमप्रभु यावेमी मोसा कली “इ किकी पिपी याकूब आ खिं डा मुर, इस्राएली आन कली

4 ‘गो इजीप्त डा मुर आन कली मार मार पडा, मेको ताइतीनी। ककाकुली आ फ्रां तार कुरशो खोदेशो पा इन कली आं नेक्था वोइक्तन्नी। ब्यवस्था ३२:११

5 गे आं देशो लोत्र पाइतीनी नु आं कबल पशो टीतीनी हना, गे नेल्ल जात जात डा मुर आन दातेमी आं योत्रशो मुर दुम्नीनी। मारदे हना रागी नेल्ल आं केन बाक्ब। ब्यवस्था ५:२; ब्यवस्था ७:६

6 गे आं कली चढेब आन राज्य नु आं योत्रशो जात डा मुर दुम्चा माल्नीनी’ दे मेको लोत्र इस्राएली आन कली देंचा माल्नेवे” दे माइक्तु। यसैया ६१:६; १ पत्रुस २:९; प्रकाश १:६; लेवी १९:२

7 मिनु मोसामी इस्राएल आ थर डा मुर आन खाल्पा आन कली ब्रेशशा, परमप्रभु यावेमी देशो लोत्र मेको आन कली माइक्तीमी।

8 मिनु मुर नेल्ल का दुम्शा “परमप्रभु यावे आ देशो नेल्ल पाइनीकी” दैतेक्म। मिनु मोसामी मेको मुर आन देशो लोव्र परमप्रभु यावे कली दैत। प्रस्थान २४:३-८

9 परमप्रभु यावेमी मोसा कली “लो, गो मारेइ मतांइसीचा डा गोस्सुमी इ कली ग्रुम्थ जाक्नुड। मोपा गो मुर आन कली, गे नु लोव्र पशा नंपाइक्नुडमी। मिनु इ कली गेना हना यो थमा सुइक्नीम” दैत। मोसामी मुर नेल्ल आन देशो यो परमप्रभु यावे कली दैत। प्रस्थान १६:१०; प्रस्थान ३४:५; भजन संग्रह १८:१२; प्रस्थान १४:३१

10 मिनु परमप्रभु यावेमी मोसा कली “मुलाक्ती नु दीसा इस्राएली आन कली गो नु गुम्पाइक्चा ठीक पावो। आन फेक्शो वा मुरपतो। लेवी ११:४४; यहोसु ३:५; अय्युब १:५

11 नित्थ नाक्त आं कली गुम्चा कली ठीक दुम्चा माल्नीमी। मारदे हना नित्थ नाक्ती गो सीनै डांडाम मुर नेल्ल आन डोंइती जाक्नुड।

12 मिनु गे डांडा आ एर ओंथ थरपु हिरचा माल्नेवे। गेमी मुर आन कली ‘डांडा मडोइक्चा, मथिचा डा पा थरपु हिरचा माल्नेवे। होस पा बाक्कीन! सुम डांडा आ पुं थीबा, मेको थमा पा साइक्चा पुंइसीब। प्रस्थान ३४:३

13 मुर आन गुइमी थरपु थिचा मदुम्ब। मेको थरपु थीबा बस्तु भाव बाक्तेक्म हना यो, मुर बाक्तेक्म हना यो, मेको कली फुल्लु आप्शा हना यो ब्रा आप्शा हना यो साइक्चा माल्नीनी’ दे इस्राएली आन कली शेंचा माल्नेवे। तुराही आ ठेयब सेंदा नेंशा नोले ला, मेकोपुकी डांडा डोइक्चा माल्नीमी” दैत। हिब्रू १२:१८-२०

14 मिनु मोसा डांडा रे मुर आन बाक्तीके तोइश्शा, मेको आन कली परमप्रभु नु गुम्पाइक्चा कली ठीक पाप्तु। मिनु मेकोपुकीमी आन फेक्शो वा मुरतेक्म।

15 मिनु मोसामी वोंइश मुर आन कली “नित्थ नाक्त ठीक दुम्शा बाक्कीने। मीश मुर नु मबाक्कीन” दैत। १सामुएल २१:४-

५; १कोरिन्थी ७:५

परमप्रभु यावे गूशो

16 मिनु मेको आ नित्थ नाक्ती डांडा तार बुंबु पा, चिला पा, ठेयब गोस्स का गूत। मिनु तुराही का थम ठेयब सेंदा पा ग्रीत। मेको नेंशा, इस्राएलीपुकी हिंशा, डोन लशा, बाक्तेक्म।

17 मिनु मोसामी इस्राएली आन कली परमप्रभु कली गुमथ जाक्कीन, दे आन बाक्तीक रे गुंइताक्व। मेकोपुकी डांडा आ पुंमी राप्शा बाक्शो बाक्तेक्म।

18 मिनु सीनै डांडा कुनै कुन दुम्त। मारदे हना परमप्रभु यावे मेकेर मीम तोंइसाक्व। मेको मार मार चोशो खोदेशो पा ठेयब कुन गूत। मिनु डांडामी ठेयब खिनु कुत। उत्पत्ती १५:१७

19 तुराही आ सेंदा शुश ठेयब दुम्मेनु, मोसामी परमप्रभु नु लोव्र पाप्तु। मिनु परमप्रभुम बुंबु पशो खोदेशो पा मोसा कली लोव्र लेत्ताक्व। प्रस्थान ३३:११; प्रेरित ७:३८

20 मिनु परमप्रभु यावे सीनै डांडा तारी जाक्त। मिनु परमप्रभु यावेमी मोसा कली “डांडा तार डोंइसो” दे ब्रेत्त। मिनु मोसा डोंइसाक्व।

21 मिनु परमप्रभु यावेमी मोसा कली “तोंइसो। मुर आन कली ‘होस पा मेकेर बाक्कीने। परमप्रभु यावे गे मलने’ दे अरेवो। आं कली कोव्रथ कुम्तेक्म हना, शुश मुर बेक्नीम।

22 आं कली गुमथ कुइब चढ़ेबपुकी यो आंम कली चिक्शा ठीक दुम्चा माल्नीम। मो मपाम्तेक्म हना, गो मेको आन कली यो साइक्नुडमी” देंत।

23 मिनु मोसामी परमप्रभु यावे कली “मुरपुकी सीनै डांडा डोइक्ने मचाप्नीम, मारदे हना गे आं कली ‘एर ओंथ थरपु हिरशा, इन के सेल्चा’ दे अरेतीनी” देंत।

24 मिनु परमप्रभु यावेमी मोसा कली “लावो, हारून कली डोइक्पतो। तन्न चढ़ेबपुकी नु मुर आन कली चहिं मचाक्को।

परमप्रभु यावे आ बाक्तीके कुम्तेक्म हना, गो मेको आन कली साइक्नुडमी” देंत। प्रस्थान २४:९-११

25 मिनु मोसा मुर आन बाक्तीके तोइश्शा, मेको लोव्र नेल्ल मुर आन कली माइक्तीमी।

## 20

परमप्रभु आ अरेशो १० ओटा लोव्र

ब्यवस्था ५:६-१८

1 मिनु परमप्रभुमी मार लोव्र पाप्तु देंशा हना मत्ती ५:१७-२८

2 “गो परमप्रभु यावे, इन परमप्रभु नड। गो इन कली वाइलीम वाइल दुम्शो इजीप्त रागी रे गुंडताक्न्नी। न्यायाधीस ६:८; येरमीया ३४:१३

3 गे आं कली ला बाप्शा सेउ पने, देवी देवता आन कली बाप्शा सेउ मपने। ब्यवस्था ६:४-५; यसैया ४५:५-६; १कोरिन्थी ८:५-६

4 मूर्ति मसेलीन। सरीडम बाक्ब, रागीम बाक्ब नु ब्वाक्कु गाम बाक्ब तेकोइ जन्तु आन मूर्ति मसेलीने। ब्यवस्था ४:१५-१९; ब्यवस्था २७:१५; यसैया ४०:१८-२६; रोमी १:२३

5 मेको आन कली बाप्शा सेउ मपने। मेको आन कली ठेयब मसेलीने। मारदे हना गो परमप्रभु यावे, इन परमप्रभु नड। गो रुश पाइब परमप्रभु नड। आं कली काइ मदाक्ब नु आ अरेशो मटीब मुर आन आल, चच, युइ नु युइ आन युइ आन पाला सम्म यो सजाइ गेब परमप्रभु नड। प्रस्थान ३४:१४; ब्यवस्था ४:२४; ब्यवस्था ५:९; ब्यवस्था ६:१५; अय्युब २१:१९; येरमीया ३१:२९-३१; इजीकीएल १८:२५

6 तन्न सु सुमी आं कली दाक्नीमी, आं शेंशो लोव्र टीनीमी, मेको आन आल, चच युइ नु युइ आन युइ आन पाला सम्म कली ला ममाइ, हजार हजार पाला सम्म गेना हना यो शिशी पाइक्नुडमी। प्रस्थान ३४:७; ब्यवस्था ७:९

7 गे परमप्रभु यावे, इन परमप्रभु आं नें, मो मथिने। मारदे हना सुम परमप्रभु यावे आं नें मो थीबा, मेको कली सजाइ मगेथु, मप्रोंइब। लेवी १९:१२; लेवी २४:१६

8 सन्चरबार नाइक्तीक नाक्ती आं नाक्त बाक्ब। मानेचा माल्नीनी। प्रस्थान १६:२५-२९

9 गे ६ नाक्त इन गेय नेल्ल पचा माल्नीनी।

10 तन्न मेको आ नोले डा नाक्त परमप्रभु यावे, इन परमप्रभु आ नाइक्तीक नाक्त बाक्ब। मेको नाक्ती गेपुकी काइ गेय मपने। इन तमी तौ, इन वाइलीम वाइल, इन बस्तु भाव, इन रागीम बाक्शो अर्को रागी डा मुर आन कली यो काइ गेय मपपतीन। प्रस्थान ३१:१३-१७; इजीकीएल २०:१२; मर्कूस २:२७-२८; कलस्सी २:१६-१७

11 मारदे हना परमप्रभु यावेमी ६ नाक्तीमी सरीड नु रागी, ठेयब समुन्द्र नु ठेयब समुन्द्रमी बाक्शो नेल्ल आन कली सेल्लु। मिनु नोले डा नाक्त नांइसाक्ब। मोपतीके परमप्रभु यावेमी 'मेको आं नाक्त बाक्ब' दे मेको नाक्त कली आसीक गेशो बाक्ब। उत्पत्ती २:२-३

12 इन आम आफ आन कली मान पने। मो पाइतीनी हना, परमप्रभु यावेमी, इन परमप्रभु इन कली गेशो रागीम शुश ब्रोंइचा गेब। प्रस्थान २१:१७; ब्यवस्था २७:१६; मत्ती १५:४-६; एफिसी ६:२-३

13 मुर मसतीन। प्रस्थान २१:१२; उत्पत्ती ९:५-६; याकूब २:१०-११

14 मुर आन मीश वोंइश नु मइपीन। लेवी २०:१०; मत्ती १५:१९

15 खुइ मपने। प्रस्थान २१:१६; लेवी १९:११; एफिसी ४:२८

16 जोल पा सांकछी मबाक्कीन। प्रस्थान २३:१; ब्यवस्था १९:१८-१९; एफिसी ४:२५

17 इन नेक्था बाक्ब मुर आ खिं, आ मीश आ वाइलीम वाइल, आ बी ब्यफ नु आ गधा, मेको के मार बाक्त हना यो, मेको तशा मबाल्दीन। एको परमप्रभु यावे आ अरेशो लोव बाक्ब" दे मोसामी इस्राएली आन कली देंत। रोमी ७:७; रोमी १३:९

परमप्रभु कली मान पा हिंशो

18 मिनु मुरपुकी डोन बाक्मानु, बुंबु पशो नेंशा नु चिला पशो तशा, तुराही ताप्शो नेंशा, डांडा रे कुशो कुन तशा, डोन लशा हिंशा खिंखि पा, कोत्रशा बाक्तेक्म।

19 मिनु मेकोपुकीमी मोसा कली “गे आंइ कली लोत्र पाइतीनी हना, गो नेंनीकी। तन्न परमप्रभुमी आंइ कली लोत्र पाप्तु हना, बेक्नीकी” देंतेक्म।

20 मिनु मोसामी “महिनीन। परमप्रभु इन कली नाक्थ जाक्त। गे परमप्रभु कली मान पा हिंचा डा बाक्ब, दे मिम्ताक्नी हना, पाप मपाइनीनी” देंत। उत्पत्ती २२:१

21 मुरपुकी डोन बाक्शो बाक्तेक्म। मोसा चहिं परमप्रभु आ नेक्था क्येर गोस्सुम लत। १राजा ८:१२

22 मिनु परमप्रभु यावेमी मोसा कली “गे इस्राएली आन कली ‘आं कली सरीड रे लोत्र पशो नेंतीनी।

23 गे गो नु देवी देवता मसेलीन। गे आंम कली सुन नु चांदी के देवी देवता मसेलीने।

24 गे आं कली खप के चढ़ेतीके सेल्चा माल्नीनी। मेको तारी चोशा चढ़ेतीक चढ़ेचा माल्नीनी। इन दुशा बाक्चा आ पर्बम चढ़ेतीक चढ़ेन। भेडा, ब्यफ चढ़ेचा माल्नीनी। गो ते ते इन कली आं नें मिम्पाइक्नुडा, मेक मेक इन कली आसीक गेनुड। प्रस्थान १७:१५; प्रस्थान २७:१-८; ब्यवस्था १२:५

25 गे आं कली फुल्लु के चढ़ेतीके सेल्चा दाक्ताक्नी हना, मप्रोल्शो फुल्लु के सेल्चा माल्नीनी। मेको फुल्लु फलामम प्रोल्तीनी हना, मेको आं कली मदुम्ब। ब्यवस्था २७:५; यहोसु ८:३१

26 आं कली चढ़ेतीकेम थेंका मडोंइसीने। इन मुने दोक्तीक मतांइसेक्ल’ दे माइक्मी” देंमाक्त।

## 21

हिब्रू वाइलीम वाइल

1 मिनु परमप्रभुमी लेंशा “मेको निसाफ पतीक लोत्र मुर आन कली शेंचा माल्नेवें।

2 ‘गेपुकीमी हिब्रू वाइल ग्याप्तीनी हना, ६ बर्स इन गेय पपाइश्शा, नोले डा बर्स मो लचा गेचा माल्नीनी। लेवी २५:३९-४१; ब्यवस्था १५:१२-१७; येरमीया ३४:१४

3 मेको वाइल आ का जाक्त हना, आ का लचा माल्ब। ग्युंवे पा जाक्त हना, आ मीश लाइश्शा लचा माल्ब।

4 आ होत्रपम आ वाइल कली ग्युंवे पपाइक्तु हना, मेकोमी तमी तौ थित हना, मेको मीश मुर नु आलपुकी मेको होत्रप केन दुम्नीम। मेको वाइल आ का ला लचा माल्ब।

5 तन्न मेको वाइलम “आं होत्रप, मीश नु आं आल आन कली दाक्नुड, गो प्रोंइशा मलाइनुड” देंत हना,

6 आ होत्रपम आ वाइली कली परमप्रभु आ डोंइती लाइक्चा माल्ब। मिनु लाप्चो डा शीम आ नोफा ख्रित्चा कली राप्पाइक्चा माल्ब। मिनु आ होत्रपम लूजेमी आ वाइली आ नोफा ख्रित्चा माल्ब। मिनु मेको गेना हना यो वाइल दुम्शा बाक्ब। ब्यवस्था १:१७; भजन संग्रह ८२:१

7 सुइमी आ तमी कली वाइलीमी सेल्शा, लेयतु हना, मेको प्रोंइचा मपुंइसीब।

8 मेको होत्रपमी आंम कली चाक्गा नोले मेको कली मदाक्ताक्व हना, मेको कली क्येट ताक्शा प्रोंइचा माल्ब। आ होत्रपमी मेको वाइलीम कली अर्को रागी डा मुर आन कली लेयने मचाप्ब। मारदे हना मेको मीश मुर मरिम्शो पचा पुंइसीशो बाक्ब।

9 मिनु मेको होत्रपमी मेको ग्याप्शो मीश आल आ तौ कली गेप्टु हना, आ तमी खोदेंशो पचा माल्ब।

10 मेकोमी अर्को मीश यो चाक्तु हना, डोंइती डा कली जचा, फेक्चा नु ग्युंवे पशो मीश मुर आन माल्शो नेल्ल गेचा माल्ब।

11 तन्न मेको आ माल्शो नेल्ल मगेप्टु हना, मो लचा गेचा माल्ब’ देनो” देंत।

### साइक्चा नु तुम्मुचा आ पर्वम लोव्र

12 मिनु “सुमी मुर कली मबेक्म सम्म तुप्बा, मेको मुर थमा पा साइक्चा पुंडसीब। प्रस्थान २०:१३; उत्पत्ती ९:६; मत्ती ५:२१-२२

13 मुरुमी अरु कली खेदा मपथु, साइक्चा ममाल्शो बाक्त, तन्न परमप्रभुमी मेको मोदेशो दुम्पाइक्तु, गो इन कली मोदेशो मुर कली प्रोक्शा बाक्तीक का कोइनुड। गन्ती ३५:६-२९; ब्यवस्था १९:४-१३

14 तन्न मुर कामी अरु कली ‘गो साइक्नुड’ दे मेको कली साइक्तु हना, मेको मुर कली आं चढेतीक रे लाइश्शा, साइक्चा माल्ब। १राजा २:२९-३०

15 सुम आ आम आफ आस कली तुप्बा, मेको थमा पा साइक्चा पुंडसीब।

16 सुमी मुर कली लेयचा कली खुइ पाइबा, मिनु मेको आ खुइ पशो मुर कली आ खिंम थित्तेक्म हना, मेको मुर थमा पा साइक्चा पुंडसीब। ब्यवस्था २४:७; १तिमोथी १:१०

17 सुमी आ आम आफ आस कली सराप पाइबा, मेको थमा पा साइक्चा पुंडसीब।

18 मिनु मुरपुकी जिशा कामी अर्को कली फुल्लु आप्तु हना, आ गुइमी तुप्तु हना, तन्न मेको मुर मबेक्थु, आ बाक्तीकेम इप्शा,

19 बोक्मेनु, कोक्के तिव्शा, गाक्ने चाप्ब दुम्त हना, मेको तुप्बमी मेको तुप्चा पुंडसीब नु गारचा माल्ब। तुप्चा पुंडसीब आ गेय मपशो डा ला थाप्चा ममाइ, मेको कली ठीक पा मसाम सम्म थाप्चा माल्ब।

20 मिनु सुइमी आ वाइलीम वाइल कली कोक्केमी तुप्तु हना, तुबानु बेक्त हना, मेको मुर थमा पा सजाइ ताइब।

21 तन्न मेको तुप्चा पुंडसीशो मुर का निक्शी नाक्त सम्म ब्रोंइत हना, मेको तुप्ब मुर सजाइ गेचा मपुंडसीब। मारदे हना आंम आ क्येटीम ग्याप्शो बाक्ब।

22 मिनु वोंइश मुर जिशा, राम्शी पा आन नेक्था बाक्शो कोव्रज

कुरशो मीश मुर कली चुशा चिप्शा, मेको मीश मुरुम आ कोव्रज डा आल शाम्ताक्व हना, तन्न आ चहिं मारेइ मरिम्शो मदुम्त हना, आ वोंइशेमी देंशो खोदेंशो पा मेको डी डा चुशा चिप्ब मुरुम सजाइ ताइब। निसाफ पाइबमी गिश थाप्चा माल्ब देंबा, मिश थाप्चा माल्ब।

23 तन्न मेको मीश मुर नोले बेक्त हना, चुशा चिप्ब मुर साइक्चा पुंइसीब। लेवी २४:१९-२०; ब्यवस्था १९:२१; मत्ती ५:३८

24 सुइमी अरु आ मिक्ची का पुक्ताक्व हना, मेको यो आ मिक्च पुक्चा पुंइसीब। सुइमी अरु आ खुइ का जिक्ताक्व हना, मेको यो आ खुइ जिक्चा पुंइसीब। सुइमी अरु आ गुइ जिक्ताक्व हना, मेको यो आ गुइ जिक्चा पुंइसीब। सुइमी अरु आ खोइली का जिक्ताक्व हना, मेको यो आ खोइली जिक्चा पुंइसीब।

25 सुइमी अरु कली मीम चोशा, गार सेल्लु हना, मेको कली यो मीम चोशा गार सेल्चा माल्ब। सुइमी अरु कली तुप्तु हना, मेको तुप्ब यो तुप्चा पुंइसीब। सुइमी अरु कली क्योरशा गार सेल्लु हना, मेको यो क्योरशा गार सेल्चा पुंइसीब।

26 मिनु होव्रप कामी आ वाइलीम वाइल आन मिक्चीम तुप्तु हना, मेको मिक्च बुक्त हना, मेको होव्रपमी मेको मिक्च आ पर्बम मेको कली मोशा प्रोंइचा माल्ब।

27 आ वाइलीम वाइल कली तुप्शा, आ खुइ जिक्ताक्व हना, मेको होव्रपमी मेको खुइ आ पर्बम मोशा प्रोंइचा माल्ब।

28 मिनु ब्यफ कामी वोंइश मुर, मीश मुर, सुइ कली खुशा साइक्तु हना, मेको ब्यफ कली थमा पा फुल्लु आप्शा साइक्चा माल्नीनी। आ श्ये व्वचा मदुम्ब। मेको ब्यफ आ होव्रप चहिं सजाइ मताइब। उत्पत्ती ९:५; गन्ती ३५:३३

29 तन्न मेको ब्यफ डोंइती रे खुइब बाक्त हना, मिनु आ होव्रपमी तुइश्शा यो, आ ब्यफ कली रिम्शो पा मवोइक्तु हना, मेको ब्यफोमी वोंइश मुर, मीश मुर, सुइ कली साइक्तु हना, मेको ब्यफ कली फुल्लु आप्शा, साइक्चा माल्ब। मिनु आ होव्रप कली यो साइक्चा माल्ब।

30 मसाइक्चा, दे क्येट पुंडतेक्म हना, दोशो पुन्मे मोशो गेचा माल्ब।

31 ब्यफोमी तमी तौ खुप्तु हना, मेको मोदेंशोन पचा माल्ब।

32 ब्यफोम सुइ आन वाइलीम वाइल आन कली खुप्तु हना, मेको ब्यफ आ होत्रपमी वाइलीम वाइल आन होत्रप कली ३० शेकेल चांदी गेचा माल्ब। मिनु ब्यफ कली चहिं फुल्लु आप्शा साइक्चा माल्ब” देनो। शेकेल का ११.५ ग्राम, तोला खोदेंशो बाक्ब। ३० शेकेल चांदी ३४५ ग्राम बाक्ब।

बस्तु भाव आन पबर्म अरेशो

33 मिनु “सुइमी लाइशो इनार रोक्तु हना, इनार दोप्तु हना, मिनु मेको मसुमथु लत हना, नु ब्यफ हना यो गधा हना यो बिक्त हना, लेवी ७:२४; लेवी १७:१५

34 मेको इनार आ होत्रपमी मेको गारपाइक्चा माल्ब। मेकोमी बस्तु भाव आ होत्रप कली क्येट गेचा माल्ब। मेको बेक्शो बस्तु चहिं इनार आ होत्रप के दुम्ब।

35 मिनु मुर का आ ब्यफोमी अरु मुर आन ब्यफ कली खुशा साइक्तु हना, मेको सेस ब्यफ कली लेयचा माल्ब। मेको ताक्शो क्येट मेको आस दातेमी योक्शा, बेक्शो ब्यफ यो आस दातेमी योक्चा माल्नीस।

36 तन्न मेको ब्यफ डोंइती रे खुइब बाक्ब, दे तुइशशा यो, आ होत्रपमी मेको ब्यफ कली रिम्शो पा मवोइक्तु हना, मेको बेक्शो ब्यफ कली थमा पा थाप्या माल्ब। मिनु बेक्शो ब्यफ मेको के दुम्ब” देनो।

## 22

खुइ आ पबर्म अरेशो

1 सुइमी ब्यफ, भेडा खुइ पशा, क्योरशा ब्वाप्तु हना यो, लेयतु हना यो, मेको मुरुमी ब्यफ का के ५ ओटा ब्यफ थाप्या माल्ब। भेडा

का के ४ ओटा भेडा थाप्चा माल्ब। रसामुएल १२:६; हितोपदेस ६:३१; लूका १९:८

2 मिनु खुइ कली खुइ पना पन थित्तेक्म हना, मेको कली तुप्शा साइक्तेक्म हना, साइक्ब साइक्चा डा सजाइ गेचा मपुंडसीनीम।

3 तन्न नां दाप्शा नोले सम्म तुप्शा साइक्तु हना, मेको साइक्ब साइक्चा डा सजाइ ताइब। खुइ पाइब आ खुइ पशो नेल्ल लेत्चा माल्ब। थाप्ने मचाप्तु हना, वाइल सेल्चा पुंडसीब।

4 मेको खुइ आ खुइ पशो ब्यफ, गधा, भेडा आ बाक्तीकेम सेल थित्तेक्म हना, मार बाक्त हना यो का के निक्शी थाप्पाइक्चा माल्ब।

रू आ पर्बम अरेशो

5 मिनु “सुइमी आ बी ब्यफ, क्यारश भेडामी अरु मुर आन शोकशो रू नेक्पाइक्तु हना, अङ्गुर रू डा अङ्गुर नेक्पाइक्तु हना, मेकोमी आ आंम रू डा नेल्ल क्येडा रिम्शो फल थाप्चा माल्ब।

6 सुइमी मी मुइक्तानु, मेको मीम चू नु रूमी बाक्शो मारेइ नेक्तु हना, मेको मी मुइक्बमी मीम नेक्शो नेल्ल थाप्चा माल्ब” देनो।

वोइक्चा गेशो आ पर्बम अरेशो

7 मिनु “सुइमी आ नेक्था डा मुर कली आ क्येट, अरु मारेइ वोइक्चा कली गेप्तु हना, वोइक्ब मुर आ खिं रे खुइ दुम्त हना, नु खुइ कली थित्तेक्म हना, मेको खुइमी का के निक्शी थाप्चा माल्ब।

8 खुइ मथित्तेक्म हना, मेको खिं डा ठेयब मुरुमी आंम नेक्था डा मुर आ मार मार खुइ पवा कों, दे परमप्रभु आ डोंइती राप्पाइक्चा माल्ब।

9 मिनु बी ब्यफ, गधा, भेडा नु वासी मार मार वोइक्बमी नु वोइक्चा गेब, निम्फामी ‘आं के बाक्ब’ देंताक्स हना, मेको निक्शी परमप्रभु आ डोंइती जाक्चा माल्नीस। परमप्रभुमी सुम खुइ सुइक्बा, मेकोमी का डा निक्शी थाप्चा माल्ब।

10 मिनु सुइमी आ नेक्था डा मुर कली गधा, ब्यफ, भेडा नु अरु बस्तु भाव वोइक्चा कली गेप्तु हना, मेको बस्तु भाव बेक्तेक्म हना,

तुष्शा बिग्रेम्तेकम हना, सुइम मतचा डा पा मुरुम खुइ पा लाइशो बाक्तेकम हना, १राजा ८:३१-३२

11 मेको वोइकबम आ नेक्था डा मुर आ बस्तु भाव 'खुइ मपड' दे परमप्रभु यावे आ डोंइती कसम जचा माल्ब। मिनु बस्तु भाव आ होत्रपम मेको थमा सुदानु, वोइकब मुरुमी मारेइ थाप्चा ममाल्ब।

12 तन्न आ खिं रे खुइ पशो बाक्त हना, मेको वोइकबमी मेको थाप्चा माल्ब।

13 ब्वाकी डा जन्तुम मेको बस्तु कली ग्याइशशा साइशो बाक्त हना, मेको वोइकबम मेको साइशो बस्तु दसी चाक्चा माल्ब। मेको ब्वाकी डा जन्तुमी साइशो कली थाप्चा ममाल्ब। उत्पत्ती ३१:३९

14 मिनु सुइमी आ नेक्था डा मुर रे ब्यफ का परमा पचा कली पुंइतु हना, बस्तु आ होत्रप मबाक्थु, मेको ब्यफ खजा दुम्त हना, बेक्त हना, मेको थमा पा थाप्चा माल्ब।

15 तन्न आ होत्रप यो बाक्त हना, मेको मारेइ थाप्चा ममाल्ब। मारदे हना गेय पचा कली क्येट गेशो बाक्ब” देनो।

### मीश आल आ पर्बम अरेशो

16 मिनु “वोंइश मुर कामी कन्ने मीश आल नु मिलो शिलो पा, मेको नु इप्त हना, मेको कली थमा पा ग्युंबे पा आ आफ कली मार मार थाप्चा माल्ब। ब्यवस्था २२:२८-२९

17 तन्न मीश आल आ आफोमी आ तमी मगेप्टु हना, मेको वोंइश मुरुम कन्ने ग्युंबे पशो खोदेशो पा, क्येट थाप्चा माल्ब।

### थमा पा साइक्चा पुंइसीब मुर

18 टुना मुना पाइब कली ब्रोंइचा मगेचा। लेवी २०:६, २७; लेवी १९:३१; ब्यवस्था १८:१०; १सामुएल २९:९; मलाकी ३:५

19 सु बस्तु नु इप्बा, मेको कली थमा पा साइक्चा माल्नीनी। लेवी १८:२३; ब्यवस्था २७:२१

20 सुमी देवी देवता कली पूजा पाइबा, मेको मुर थमा पा साइक्चा पुंइसीब। परमप्रभु यावे कली ला चढेचा माल्ब। प्रस्थान २०:३-५; ब्यवस्था १३:७-१९; ब्यवस्था १७:२-७

### महिकसीशो मुर आन पर्वम अरेशो

21 अर्को रागी डा मुर आन कली श्येत मगेचा, मदिप्चा। मारदे हना गे यो इजीप्त रागीमी अर्को रागी डा मुर दुम्शा बाक्तीनी। लेवी १९:३३-३४; ब्यवस्था १०:१८, १९

22 आ वोंइश बेक्शो मीश मुर नु रोम रोइक्च आन कली श्येत मगेचा। ब्यवस्था २७:१९; यसैया १:१७; जकरिया ७:१०

23 गेपुकीमी श्येत गेतीनी हना, मेकोपुकीमी आं कली लोव्र पाम्तेक्म हना, गो थमा पा आन पुंइशो गेनुड।

24 मिनु गो गाइश्शा, इन कली तरवारमी साइक्नन्नी। मिनु इन मीश वोंइश बेक्शो मीश दुम्ब। इन आलपुकी आफ बेक्शो आल दुम्नीम।

25 गेपुकीमी आं मुर आन दाते डा प्रुडग आन कली क्येट जेर गेतीनी हना, गे क्येट चेम्चा कली चाइक्ब ताक्ब मुर खोदेशो मदुमीन। लेवी २५:३६; ब्यवस्था २३:२०; हितोपदेस २८:८

26 मिनु गेपुकीमी मेको आन सुम्तीक वासी क्येट आ पा डा लाइक्तीनी हना, नां पेरची ना मेको लेत्या माल्नीनी। ब्यवस्था २४:१०-१३

27 मारदे हना मेको आन रां डा सुम्तीक का ला बाक्ब। इप्ची ना दोपा सुम्सीनीमी? आं कली ब्रेत्तेक्म हना, गो आन पुंइशो गेनुड। मारदे हना गो शिशी पाइब नड।

### परमप्रभु कली मान पा हिंचा

28 परमप्रभु आ पर्वम मरिम्शो लोव्र मपचा। इन कली सासन पाइब कली सराप मपचा। लेवी २४:१४-१६; प्रेरित २३:५

29 गे इन रू डा डोंइती मीशो मारेइ मारेइ नु अडगुर रस चढेचा मरिम्दीन। मिनु इन डोंइती जरमेशो तौपुकी आं कली गेचा माल्नीनी। प्रस्थान २३:१९; ब्यवस्था १८:४; हितोपदेस ३:९-१०; प्रेरित १३:२, १३

30 इन बी ब्यफ नु इन भेडा रे यो मोदेशो पचा माल्नीनी। ७ नाक्त आन ममा नु बाक्चा माल्नीमी। मेको नोले डा नाक्ती आं कली गेचा माल्नीनी।

31 गेपुकी आं मुर ला दुम्चा माल्नीनी। गे ब्वाकी डा जन्तुपुकीम साइशो मब्बने। मेको कुचुम कली ब्बचा गेन” देनो। लेवी १९:२; १पत्रुस १:१५; लेवी ७:२४; ब्यवस्था १४:२१; इजीकीएल ४:१४; इजीकीएल ४४:३१

## 23

### ठीक पतीके आ पर्वम अरेशो

1 “गेपुकी जोल लोत्र मब्रपतीने। मरिम्शो पाइब कली वारच मपने। जोल पा सांकछी मबाक्कीन। प्रस्थान २०:१६; लेवी १९:१६; भजन संग्रह १५:३; हितोपदेस १९:९

2 मिनु ठेयब हुल का मरिम्शो पाइब बाक्तेकम हना, मेको आन नोले मखोतीन। निसाफ पाइब आ डोंइती ‘ठेयब हुल डा मुर ठीक बाक्नीम’ मदेनीन। मोपा आं ठीक पतीके रे डोन मलने।

3 दूली पाइब मुर प्रुडग बाक्त हना यो मेको कली वारच मपतीन। लेवी १९:१५

4 मिनु गे इन जोरी सत्रु आन ब्यफ, गधा लां जाम्शा, हिरशो ताइतीनी हना, मेको कली वारच पा, लेशशा आ खिं चोत्रदीत्वा माल्नीनी। अय्युब ३१:२९; हितोपदेस २५:२१-२२; लूका ६:२७

5 गे नु मदुइब मुर आ गधा आ भारीम चिप्शो थित्तीनी हना, गे मेको पोक्ने मचाप्शो मुर ताइतीनी हना, मेको कली महेरदीन। मेको कली वारच पा मेको कली पोक्कीन।

6 मिनु प्रुडग मुर का पित हना, मेको कली प्रुडग बाक्त हना यो, ठीक निसाफ पने। ब्यवस्था २५:१९; भजन संग्रह ८२:२-४; उपदेसक ५:७; यसैया १:१७

7 जोल पा सांकछी माल्ब आन क्येडा डोन बाक्कीन। दोस मताइब नु ठीक पाइब कली मसतीन। मारदे हना गो मरिम्शो पाइब आ पर्वम ठीक पाइब बाक्ब मदेनुड।

8 गेपुकी खुइश्शा मारेइ मताक्कीन। मारदे हना मेकोमी मिक्च सिल्ब। मिनु खुइश्शा ताक्शोमी ठीक पाइब आ मुददा लोकब। ब्यवस्था २७:२५; १सामुएल ८:३; हितोपदेस १७:२३

9 मिनु अर्को रागी डा मुर आन कली मदिपीन। मारदे हना गेपुकी यो इजीप्त रागीम अर्को रागी डा मुर दुम्शा, अर्को रागी डा मुर आन थुं तुइक्नीनी। प्रस्थान २२:२०

### नाइक्तीक नाक्त नु बर्स

10 मिनु ६ बर्स सम्म इन रूमी खुम्शा, सेक्शा खुप्तीन। लेवी २५:१-१७, १८-२४

11 मिनु मेको आ नोले डा बर्स चहिं मारेइ मशोक्थु, मो वोतीन। इन रागी डा प्रुडगपुकीमी मेको आंमा वाशो जामेक्ल। लीत हना, जन्तुपुकीम जामेक्ल। इन अडगुर रू नु इन तेल रवापुकी यो मेको खोदेशोन पने।

12 गेपुकी ६ नाक्त गेय पचा माल्नीनी। मेको आ नोले डा नाक्ती चहिं नांइसीन। मोपा इन ब्यफ नु गधा यो नाइक्ने चाप्नीम। मिनु इन वाइलीम आ तौ नु इन खिंम बाक्शो अर्को रागी डा मुर यो नाइक्चा ताइनीम। प्रस्थान २०:८-११

13 आं अरेशो नेल्ल पने। देवी देवता आन कली मारेइ मपुंइचा आन नें यो मथिचा। यहोसु २३:७; जकरिया १३:२

### बर्स डा चाड सां

14 बर्सम आं पर्बम खेयप सां चाड मानेचा माल्नीनी। प्रस्थान ३४:१८-२६; लेवी २३:४-४४; ब्यवस्था १६:१-१७

15 गो इन कली देशो खोदेशो पा, बोरब ओरुक्ती मसुप्शो शोब्ले डा चाड मानेचा माल्नीनी। गेपुकी ७ नाक्त सम्म बोरब ओरुक्ती मसुप्शो शोब्ले जचा माल्नीनी। मेको आबीब महिनामी पचा माल्नीनी। मारदे हना गेपुकी आबीब महिनामी इजीप्त रागी रे गूतीनी। आं डोंइती श्येत्थ गुइ मजाक्कीन। प्रस्थान १२:१५-२०

16 मिनु इन रूम खुम्शो डोंइती डा मीशो मारेइ मारेइ डा चाड मानेचा माल्नीनी। बर्स नुप्ची ना नेल्ल रिक्शा, खुप्शा, ओइने थुम्शो डा चाड मानेचा माल्नीनी। प्रस्थान ३४:२२

17 वोंइश मुर नेल्ल परमप्रभु, परमप्रभु यावे आ डोंइती बर्समी खेयप सां जाक्चा माल्नीनी।

18 गेपुकीमी चढेनीनु, चढेशो आ हुश नु बोरब ओरुत्ती सुप्शो मारेइ मारेइ कालेमी मचढेन। मेको चढेशो श्ये आ बोंसो सुनी सम्म महेंचा। प्रस्थान १२:७-१०; प्रस्थान ३४:२५

19 मिनु इन रू डा डोंइती मीशो नेल्ल क्येडा रिम्शो फल फुल नु अन्न परमप्रभु यावे, इन परमप्रभु आ बाक्तीकेम चाक्चा माल्नीनी। गेपुकीमी पाठा कली आ ममा आ दूधम लोप्शा मक्येने, देनो” दे परमप्रभु मोसा कली देंत। उत्पत्ती ४:४; ब्यवस्था २६:१-११; नेहेन्याह १०:३६; ब्यवस्था १४:२१

परमप्रभु आ अरेशो नु गेशो लोव

20 मिनु परमप्रभुमी “नेनीन, गो इन डोंइती आं स्वर्ग डा गेय पाइब का सोइक्नुड। मेकोमी लांमी इन कली कोव्रशा नु आं देंशो बाक्तीकेम चोव्रदीब। प्रस्थान १४:१९

21 गेपुकी होस पा बाक्शा, आं देंशो टिने। गेपुकी मेको कली मगाइक्पतीन। मारदे हना आं नें मेको नु बाक्ब। मिनु मेकोमी इन हेंथे पतीक मक्याम्ब। यसैया ६३:१०

22 गेपुकी आ देंशो नेनीन। आं देंशो नेल्ल पाइतीनी हना, गो इन जोरी सत्रु आन जोरी सत्रु दुम्नुड। इन कली खेदा पाइब आन कली खेदा पाइब दुम्नुड।

23 आं स्वर्ग डा गेय पाइब थमा पा इन डोंइती लाइब। मिनु इन कली एमोरी, हिक्ती परिज्जी, नानी, हिक्वी नु यबुसी कनानी आन रागी चोव्रदीब। मिनु गो मेको नेल्ल आन कली क्याम्नुड।

24 गेपुकी मेको आन खोदेंशो मपने। मेको आन देवी देवता आन डोंइती बाप्शा सेउ मपने। मेको आन कली गेय मपने। तन्न मेको

आन मूर्ति जिकशा प्रोल्ला ताइक्तीन। प्रस्थान २०:५; ब्यवस्था १२:३०; लेवी १८:३

25 गे परमप्रभु यावे, इन परमप्रभु कली गेय पाइतीनी हना, गो इन जचा तूचा थोव्रक कली आसीक गेनुड। मिनु इन कली रोइ नेल्ल रे प्रोइनुड। प्रस्थान १५:२६

26 इन रागीमी मीश मुरपुकी आल शाम्ब नु आल मथीब मदुम्नीम। मिनु गेपुकी खाल्पी खाल्पा दुम्या सम्म ब्रोंइनीनी।

27 गो इन डोंइडोंइती हिंच कोंइनुडमी। मिनु गे ते ते जाकदीत्तीनी, गो मेक डा जात जात डा मुर आन थुं लुकच लपाइक्नुड। मिनु इन जोरी सत्रु इन कली तशा प्रोक्नीम। उत्पत्ती ३५:५; यहोसु २:९-११; १सामुएल १४:१५

28 गो इन डोंइडोंइती हिकवा सोइश्शो खोदेशो पा हिंतीक सोइक्नुड। मिनु हिच्ची, कनानी नु हिती इन डोंइती रे प्रोक्पाइक्नुड। ब्यवस्था ७:२०; यहोसु २४:१२

29 तन्न बर्स कामी मेको आन कली मप्रोक्पाइक्नुडमी। मोपा प्रोक्पाइक्तामी हना, गोरशो रागी दुमशा, इन क्येडा ब्वाकी डा जन्तु शुश दुम्नीम।

30 गे शुश दुमशा, मेको रागी मब्रीनी सम्म, गो मेको आन कली इन डोंइती रे का का पा गुंइनुडमी। ब्यवस्था ७:२२

31 गो इन रागी लल समुन्द्र रे पलिस्ती आन ठेयब समुन्द्र सम्म नु गोरशो रागी रे युफ्रेटीस खोला सम्म दुम्पाइक्नुड। मिनु गो मेको रागी डा मुर इन कली जिम्मा गेनुड। मिनु गे मेको आन कली खेरनीनी। उत्पत्ती १५:१८

32 गे मेकोपुकी नु मेको आन देवी देवता नु कबल मपमुने। प्रस्थान ३४:१२

33 मेकोपुकीम इन कली पाप पपाइक्नीम। मोपतीके मेको आन कली इन रागीमी बाक्चा मगेने। गे मेको आन देवी देवता आन कली गेय पाइतीनी हना, आन ग्याइलीम रेट्चा पुंइसीनीनी” दे परमप्रभु यावेमी इस्राएली आन कली अरेवा बाक्त।

## 24

सीनै डांडाम कबल पशो

1 मिनु परमप्रभु यावेमी मोसा कली “गे, हारून, नादाब, अबीहु नु इस्राएली आन खाल्पा रे ७० जना मुर कुने। मिनु डोन रे आं कली सेउ पचा माल्नीनी। प्रस्थान २८:१; लेवी १०:१; गन्ती ११:१६

2 गे ला आं नेक्था जाकने चाप्नेवे। अरु चहिं नेक्था मजाक्थु, बाक्चा माल्नीमी। मिनु मुरपुकी गे नु डांडा डोइक्चा मदुम्नीम” दे परमप्रभु यावेमी देंत।

3 मिनु मोसा डांडा रे तोइश्शा, मुर आन कली परमप्रभु यावेमी देंशो नु अरेशो लोव्र नेल्ल नेंपाइक्तीमी। मिनु मुर नेल्लेमी मुर का खोदेंशो पा “परमप्रभु यावेमी देंशो लोव्र नेल्ल गो पाइनीकी” देंतेक्म। प्रस्थान १९:८

4 मिनु मोसामी परमप्रभु यावे आ देंशो लोव्र नेल्ल ब्रेक्ताक्व। मिनु सुनी कना बोक्शा, डांडा आ पुंमी चढेतीक का नु इस्राएल आ १२ थर मिन्चा कली १२ ओटा फुल्लु खुक्तु। प्रस्थान ३४:२७; यहोसु ४:२०

5 मिनु मोसामी इस्राएली ठिटा आन कली बोहोर क्योरशा, चोशा चढेतीक नु परमप्रभु यावे नु दुशा बाक्चा आ पर्बम चढेतीक चढेपपाइक्तु। न्यायाधीस १७:७

6 मिनु चढेशो बस्तु आन हुश आधा लाइश्शा, बोसपुकीम कुर पाप्तु। मिनु लीशो हुश चढेतीकेम ब्रुइक्ताक्व।

7 नोले कबल डा लोव्र ब्रेक्शो किताब मुर आन कली नेंपाइक्चा कली पढेप्तु। मिनु मेकोपुकीमी “परमप्रभु यावे आ देंशो नेल्ल पाइनीकी। आ लोव्र टीनीकी” देंतेक्म।

8 मिनु मोसामी बोस डा हुश लाइश्शा, मुर आन कली ब्रुइश्शा “नेनीन, परमप्रभु यावेमी गेपुकी नु कबल पाप्तु। मेको हुश परमप्रभु यावे आ कबल डा देंशो लोव्र आ छाप बाक्ब” देंत। हिब्रू ९:१९-२७; मर्कूस १४:२४

9 मिनु मोसा, हारून, नादाब, अबीहु नु इस्राएली आन खाल्पा रे ७० जना मुर डांडा डोइसाकम।

10 मिनु मेकोपुकीमी इस्राएली आन परमप्रभु कली ताम्तेकम। आ बाक्तीक बास साफीर माइश्शो हीरा खोदेशो दिंम का बाक्शो बाक्त। मेको हाक्शो सरीड खोदेशो नीलो बाक्त। इजीकीएल १:२६

11 मिनु परमप्रभुमी इस्राएली आन खाल्पा आन कली मारेइ मपव। मिनु मेकोपुकीमी परमप्रभु कली तशा, जशा तूशा बाक्तेकम। प्रस्थान १९:२१-२२; प्रस्थान ३३:२०-२३

### मोसामी परमप्रभु आ अरेशो टिशो

12 मिनु परमप्रभु यावेमी मोसा कली “गे डांडा डोइश्शा, आं नेक्था जाक्शा रिम्शा बाक्को। गो आं अरेशो लोव्र नु आं शेंशो लोव्र इस्राएली आन कली शेंचा कली फुल्लु निक्शीम मुशा ब्रेक्ताकड। गो मेको फुल्लु इ कली गेनन्न” देंत। प्रस्थान ३१:१८; २कोरिन्थी ३:६

13 मिनु मोसा आ गेय पाइब यहोसु लाइश्शा, परमप्रभु आ डांडा डोइसाकव। प्रस्थान ३३:११

14 तन्न डोंइती मोसामी इस्राएली आन खाल्पा आन कली “गो मलेस्कु सम्म, एकेर रिम्दीन। नेनीन, हारून नु हुर गेपुकी नु बाक्नीस। मार निसाफ पचा माल्नीनी, मेको निक्शीमी गारपाइक्नीस” देंत। प्रस्थान १७:१२

15 मिनु मोसा डांडा डोंइसाकव। मिनु गोस्सुम मेको डांडा सुम्तु।

16 मिनु परमप्रभु यावे आ छेडछेड सीनै डांडाम बाक्शो बाक्त। मेको गोस्सुम डांडा कली ६ नाक्त सम्म सुम्तु। मिनु नाक्त का नोले गोस्स आ दाते रे परमप्रभु यावेमी मोसा कली ब्रेत्ताकव। प्रस्थान १६:१०

17 मिनु परमप्रभु यावे आ छेडछेड इस्राएली आन कली डांडा तारी थम ठेयब ब्रशो मी खोदेशो पा तांइसाकव। ब्यवस्था ४:२४; ब्यवस्था ९:३; हिब्रू १२:२९

18 मिनु मोसा गोस्स आगा ओव्रशा, डांडा डोइशशा, ४० नाक्दो नु ४० नाक्ती बाक्त। प्रस्थान ३४:२८

## 25

ताम्बु सेल्चा कली शुश गेशो

1 मिनु परमप्रभु यावेमी मोसा कली

2 “इसाएली आन कली ‘आं कली मार मार गेचा मिम्नीनी, मेको गेने’ दे मतो। आन थुमी गेचा दाक्शो, नेल्ल आन चाक्शो गे नु इ कली वारच पाइबपुकीमी ताक्कीन। प्रस्थान ३५:४-७; १इतिहास २९:५; एज्रा २:६८,६९

3 आं कली मार मार ताक्चा माल्नीनी देंशा हना, सुन चांदी नु कांसा,

4 नीलो, प्याजी नु लल रड डा श्येले, रिम्शो पा किरशो सुती श्येले के प्रोव्रशो वा, क्यारश आ चां,

5 लल रड नुप्शो सांड आ कुशुल, नेल्ल क्येडा रिम्शो सेल्शो कुशुल, बोल्यो शी,

6 बत्ती दातीक तेल, लुक्तीक तेल नु धूप कली ब्रोव्रशो रिना पपाइक्ब थोव्रक,

7 निसाफ पतीके ऊरीम नु थुम्मीम वोइक्तीक झोला नु कुचु तार वोइक्तीक सेल्चा कली ओनीक्स माइशो हीरा नु अरु हीरा ताक्चा माल्नीनी।

8 मिनु गो मेको आन दातेमी बाक्चा कली आं बाक्तीक सेल्पतो। इजीकीएल ३७:२६-२८

9 गो इ कली कोंइशो खोदेंशो पा ताम्बु सेल्पाइक्चा माल्नेवे। आगाम मार मार वोइक्चा माल्नेवे, मेको आं कोंइशो खोदेंशो पा सेल्पतो। प्रस्थान २५:४०; प्रस्थान २६:३०; प्रस्थान २७:८

कबल पशो सन्दोस  
प्रस्थान ३७:१-९

10 मेकोपुकीमी बोल्यो शी के सन्दोस का सेल्चा माल्नीम। मेको आ पित्थ लाइश्शो कुबीत निक्शी नु आधा, आ ब्रेम्शो कुबीत का नु आधा नु आ ग्येत्थ लाइश्शो कुबीत का नु आधा डा सेल्चा माल्नीम। कुबीत का ०.५ मिटर खोदेशो बाक्ब।

11 मिनु गे मेको सन्दोस आ खिंडगा नु आ लाडगा नेल्ल क्येख सुनमी गिल्पाइक्चा माल्नेवे। मिनु एर ओंथ सुन के सुर सेल्पाइक्चा माल्नेवे।

12 मिनु सुन के ४ ओटा मुन्द्रा सेल्पाइक्चा माल्नेवे। का पटटी निक्शी नु अर्को पटटी निक्शी पा सन्दोस आ ४ सुरमी क्येप्चा माल्नीम।

13 मिनु बोल्यो शी के कुरतीक कोक्के निक्शी सेल्पाइश्शा, सुनमी गिल्पाइक्चा माल्नेवे। १राजा ८:८

14 मिनु मेको कुरतीक कोक्के निक्शी मेको मुन्द्राम शुइक्चा माल्नेवे। मो पा मेको सन्दोस कली कुरने चाप्नीम।

15 मेको कोक्के निक्शी सन्दोसम बाक्शो मुन्द्राम शुइक्चा माल्नीस। मेको आस कली मशोल्चा।

16 मिनु गो इ कली गेचा चिक्शो कबल पा अरेशो लोव्र मेको सन्दोसमी कुर पा वोइक्चा माल्नेवे।

### सन्दोस सुम्तीके

17 मिनु सन्दोस सुम्तीके क्येख सुन के चेम्शा सेल्चा माल्नेवे। मेकेर परमप्रभु आ शिशी बाक्ब। आ पित्थ लाइश्शो कुबीत निक्शी नु आधा नु आ ब्रेम्शो कुबीत का नु आधा बाक्चा माल्ब। कुबीत का ०.५ मिटर, कुबीत का खोदेशो बाक्ब। लेवी १६:१२-१५; हिब्रू ४:१६; हिब्रू ९:५

18 मिनु गे आं स्वर्ग डा गेय पाइब खोदेशो सुन के करूब निक्शी चेम्शा सेल्पाइक्चा माल्नेवे। मेको सुम्तीकेम आ निम्फा पटटी का का करूब चेम्शा सेल्चा माल्नेवे।

19 का पटटी करूब का, अर्को पटटी करूब का चेम्शा सेल्चा माल्नेवे। मेको सुम्तीके नु करूब निम्फा मख्रोंइसीशो सुन का केन चेम्शा सेल्चा माल्नेवे।

20 मेको करूबम आस फ्रां हाम्शा, सुम्तीके फारचा माल्नीस। आस कुल कोव्रमुशा, सन्दोस सुम्तीके गे कोव्रचा माल्नीसी।

21 मेको सुम्तीके मेको कबल पशो सन्दोस तार वोइक्चा माल्नेवे। मिनु गो इ कली गेचा चिक्शो कबल पा अरेशो लोव्र मेको कबल पशो सन्दोसम कुर पा वोइक्चा माल्नेवे। प्रस्थान ३४:२९; १राजा ८:९

22 मिनु गो मेको सन्दोस सुम्तीके शिशी बाक्तीकेम गे नु गुम्शा, लोव्र पाइनुड। मेको सुम्तीके आ तारी मेको करूब निक्शी आस दाते रे गो इस्राएली आन कली मार मार अरेचा माल्नुडा, मेको गो इ कली देंनुड। गन्ती ७:८९; २सामुएल ६:२

शोब्ले वोइक्तीके टेबल

प्रस्थान ३७:१०-१६

23 गे बोल्यो शी के टेबल का सेल्पाइक्चा माल्नेवे। मेको आ पित्थ लाइशो कुबीत निक्शी नु आ ब्रेम्शो कुबीत का नु आ ग्येत्थ लाइशो कुबीत का नु आधा दुम्चा माल्ब। कुबीत का ०.५ मिटर, खोदेशो बाक्ब।

24 मिनु मेको कली क्येख सुनमी गिल्पाइक्चा माल्नेवे। सिरपेच खोदेशो पा एर ओंथ नेल्ल सुन के सुर सेल्पाइक्चा माल्नेवे।

25 मेको एर ओंथ डा सुर नेल्ल ४ आंइची ब्रेम्शो दुम्चा माल्ब। मेको कली सिरपेच खोदेशो पा बुटा आप्पाइक्चा माल्नेवे।

26 मिनु ४ ओटा सुन के मुन्द्रा चेम्शा, मेको आ ४ ओटा खोइलीम टेबल आगाम क्येप्पाइक्चा माल्नेवे।

27 टेबल कुरचा कली मुन्द्रापुकी टेबल आ सुर आ नेक्था क्येप्पाइक्चा माल्नेवे।

28 मिनु बोल्यो शी के कोक्के निक्शी सेल्शा, सुनमी गिल्पाइक्चा माल्नेवे। मेको टेबलम बाक्शो मुन्द्राम शुइशशा कुरने चाप्नीम।

29 मिनु टेबलम वोइक्चा माल्शो थाल, लोटा नु बोस नेल्ल नु तूचा थोव्रक चढेतीक लुक्चा कली लोटा नेल्ल क्येख सुन के सेल्पाइक्चा माल्नेवे।

30 मिनु मेकेर गेना हना यो आं डोंइती कोंइतीक शोब्ले वोइक्चा माल्नेवे। लेवी २४:५-६

सुन के बत्ती दातीक

प्रस्थान ३७:१७-२४

31 गे क्येख सुन के बत्ती दातीक का चेम्शा सेल्पाइक्चा माल्नेवे। आ थाम, आ राशी, आ दियारी, आ डल्ला नु फूपुकी ठेयब सुन का केन दुम्चा माल्नीम।

32 मिनु मेको बत्ती दातीक आ थाम रे ६ ओटा राशी गूचा माल्नीम। का पटटी रे सां नु अर्को पटटी रे सां गूचा माल्नीम।

33 मिनु मेको राशी कामी देसी बदाम आ फू खोदेशो बुटा पाइश्शो फू सां गूचा माल्नीम। अर्को राशीपुकी यो नेल्ल मोदेशोन दुम्चा माल्नीम।

34 मेको बत्ती दातीक आ थामम चहिं ४ ओटा देसी बदाम आ फू खोदेशो बुटा पाइश्शो गूचा माल्नीम।

35 थाम आ डोंइती डा डल्ला, आ दाते डा डल्ला नु नोले डा डल्ला रे निम्फा पटटी गे राशी निक्निक्शी गूचा माल्नीम।

36 मेको आ राशी नु डल्ला नेल्ल ठेयब क्येख सुन का केन चेम्शो दुम्चा माल्नीम।

37 गे क्येख सुन के ७ ओटा दियारी सेल्पाइक्चा माल्नेवे। मिनु सल्दो वोइश्शा, नेल्ल तांइसीचा डा पा दाचा माल्नेवे। मेको ब्रशा, छेडछेड दुम्ल।

38 मिनु आ कांइची नु आइक्च बोस क्येख सुन के दुम्चा माल्नीम।

39 गे मेको नेल्ल टलेन्ट का क्येख सुन के सेल्पाइक्चा माल्नेवे।

40 गे मेको नेल्ल गो इ कली डांडाम कोंइशो खोदेशो पा सेल्पाइक्चा माल्नेवे। प्रस्थान २५:९; प्रस्थान २६:३०; प्रेरित ७:४४; हिब्रू ८:५

## 26

ताम्बु कली साप्तीके

प्रस्थान ३६:८-३८

1 आं बाक्तीके सेल्चा कली रिम्शो पा किरशो सुती श्येले के १० ओटा ताम्बु साप्तीके प्रोव्रपाइक्चा माल्नेवे। मेको सुती श्येले नीलो, प्याजी नु लल रडम नुप्शो बाक्चा माल्ब। मिनु मेको वामी करूब बुटा आप्शा, थाम्पा रिम्शो प्रोव्रस जोक्ब मुर आन कली प्रोव्रपाइक्चा माल्नेवे।

2 वा का आ लाइश्शो २८ कुबीत नु आ ब्रेम्शो ४ कुबीत दुम्चा माल्ब। मेको १० ओटा वा नेल्ल मोदेशोन दुम्चा माल्नीम। कुबीत का ०.५ मिटर, खोदेशो बाक्ब।

3 मिनु ५ ओटा वा बोइश्शा, का सेल्पाइक्चा माल्नेवे। मिनु अर्को ५ ओटा वा यो बोइश्शा, का सेल्पाइक्चा माल्नेवे।

4 मिनु वा आ सुर कली नीलो रड डा श्येले के बोइक्तीके यो सेल्पाइक्चा माल्नेवे। मोपा वा निक्शी बोइश्शा का सेल्पाइक्चा माल्ब।

5 मिनु गे का का पा ताम्बु साप्तीके ५० ओटा सेल्पाइक्चा माल्नेवे। मेकोपुकी गारपाइक्चा कली सेल्पाइक्चा माल्नेवे।

6 मिनु ५० ओटा सुन के ग्याइक्पाइक्तीके सेल्पतो। मोपा मेको वापुकी बोइश्शा, आं बाक्तीक ताम्बु आगा साप्तीक कान दुम्ब।

7 मिनु आं बाक्तीक ताम्बु साप्चा कली क्यारश आ चां के ११ ओटा टुक्रा सेल्पाइक्चा माल्नेवे।

8 का आ लाइश्शो ३० कुबीत नु आ ब्रेम्शो ४ कुबीत दुम्चा माल्ब। मिनु मेको ११ ओटा टुक्रा नेल्ल खाल का डा दुम्चा माल्नीम। कुबीत का ०.५ मिटर खोदेशो बाक्ब।

9 गे ५ ओटा टुक्रा बोइश्शा का नु ६ ओटा बोइश्शा, अर्को का सेल्पाइक्चा माल्नेवे। ६ ओटा बोइश्शा टुक्रा ताम्बु आ डोंइती आ सुर तोक्तीके फेके का मुक्शा तोक्चा माल्ब।

10 मेको टुक्रा का आ सुरमी ५० ओटा बोइक्तीक सेल्पाइक्चा माल्नेवे। मिनु अर्को टुक्रा आ सुरमी यो ५० ओटा बोइक्तीक सेल्पाइक्चा माल्नेवे।

11 मिनु गे कांसा के ५० ओटा ग्याइक्पाइक्तीके सेल्पतो। मेको ग्याइक्पाइक्तीक बोइक्तीकेमी वोइश्शा, टुक्रा निक्शी के का दुम्चा माल्ब। मोपा टुक्रापुकी बोइश्शा, ताम्बु साप्तीक का दुम्ब।

12 ताम्बु आ साप्तीके आ दी गे आइदी सम्म तोक्चा डा पा साप्पाइक्चा माल्नेवे।

13 निम्फा पटटी साप्पाइक्चा कली कुबीत का का आइदी सम्म तोक्चा डा पा साप्पाइक्चा माल्नेवे। कुबीत का ०.५ मिटर खोदेशो बाक्ब।

14 ताम्बु आ साप्तीके निक्शी आस तारी लल रडम नुप्शो बोका आ कुशुल के सेल्पाइक्चा माल्नेवे। मिनु मेको आ तार अर्को साप्तीके नेल्ल क्येडा रिम्शो कुशुल के सेल्पाइक्चा माल्नेवे।

### ताम्बु कली फलेक सेल्शो

15 गे आं बाक्तीक ताम्बु आ एर ओंथ थारचा कली फलेक सेल्पाइक्चा माल्नेवे। मेको फलेकपुकी बोल्यो शी के सेल्पाइक्चा माल्नेवे।

16 फलेक नेल्ल १० कुबीत ग्येत्थ लाइश्शो नु कुबीत का नु आधा ब्रेम्शो दुम्चा माल्नीम। कुबीत का ०.५ मिटर खोदेशो बाक्ब।

17 फलेक नेल्लेमी गुक्तीक निक्निक्शी आ पुं गे एर ओंथ पा सेल्पतो। आं बाक्तीक डा फलेक नेल्ल मोदेशो पा सेल्पाइक्चा माल्नेवे।

18 आं बाक्तीक कली मोदेशो फलेक सेल्पाइक्चा माल्नेवे। २० ओटा फलेक दक्खिन गे थारचा कली सेल्पाइक्चा माल्नेवे।

19 मिनु गे २० ओटा फलेक आन कली ४० ओटा चांदी के राप्पाइक्तीके सेल्पाइक्चा माल्नेवे। फलेक का कली गुक्तीक निक्शी गारचा डा पा ग्याइक्पाइक्तीक निक्शी माल्ब। अर्को

फलेक आन कली यो गारचा डा पा ग्रुक्तीक नु राप्पाइक्तीके निक्निक्शी सेल्पाइक्चा माल्नेवे।

20 मोदेशो पा उत्तर गे यो २० ओटा फलेक बाक्चा माल्नीम।

21 मिनु ४० ओटा राप्पाइक्तीक सेल्शा, फलेक कामी राप्पाइक्तीक निक्शी ग्रुक्पाइक्चा माल्नेवे। फलेक नेल्ल मोदेशो पा सेल्चा माल्नेवे।

22 मिनु आं बाक्तीक ताम्बु आ नोले पटटी, पच्छिम गे ६ ओटा फलेक सेल्पाइक्चा माल्नेवे।

23 नोले पटटी डा सुर निक्शी कली फलेक निक्शी सेल्पाइक्चा माल्नेवे।

24 मेको सुर डा फलेक आइक्था नु उइ अर्को फलेक नु गारचा डा दुम्चा माल्नीस।

25 नोले पटटी डा फलेक नु सुर डा फलेक नेल्ल पा ८ ओटा दुम्नीम। मेको फलेक नेल्ल आन कली १६ ओटा चांदी के राप्पाइक्तीके सेल्पाइक्चा माल्नेवे। फलेक का कली निक्शी माल्ब। फलेक नेल्ल मोदेशो पा सेल्चा माल्नेवे।

26 मिनु का पटटी डा फलेक आन कली बोल्यो शी के ५ ओटा लाइशो कोक्के,

27 अर्को पटटी कली यो ५ ओटा लाइशो कोक्के सेल्पाइक्चा माल्नेवे। मिनु पच्छिम गे नोले पटटी कली ५ ओटा लाइशो कोक्के सेल्पाइक्चा माल्नेवे।

28 मिनु फलेक ग्येत्थ आ दातेमी सुर का रे अर्को सुर सम्म लाइशो कोक्के बाक्चा माल्नीम।

29 मिनु गे मेको फलेकपुकी सुनम गिल्पाइक्चा माल्नेवे। मेको कोक्के शुइक्तीक मुन्द्रा सुन के सेल्पाइक्चा माल्नेवे। मेको लाइशो कोक्केपुकी यो सुनमी गिल्पाइक्चा माल्नेवे।

30 गो इ कली डांडामी कोइशो खोदेशो पा आं बाक्तीक ताम्बु सेल्पाइक्चा माल्नेवे। प्रस्थान २५:९

ताम्बु कली फारतीक

31 मिनु गे फारतीक सेल्चा कली नीलो प्याजी नु लल रड डा श्येले नु रिम्शो पा किरशो सुती श्येले के वा प्रोत्रपाइक्चा माल्नेवे। मेको वा करूब बुटा आप्शा थाम्पा रिम्शो प्रोत्रस जोक्ब मुर आन कली प्रोत्रपाइक्चा माल्नेवे। २इतिहास ३:१४

32 मेको फारतीके बोल्यो शी के सेल्शो सुनम गिल्शो सुन के हेक्तीक पाइश्शो नु चांदी के राप्पाइक्तीक पाइश्शो ४ ओटा थामम क्युक्पाइक्चा माल्नेवे।

33 मिनु मेको फारतीके हेक्तीकेम हेक्पाइक्चा माल्नेवे। मिनु गे मेको आं अरेशो लोत्र आगाम वोइश्शो सन्दोस मेको फारतीके आगा गे वोइक्पाइक्चा माल्नेवे। मोपा मेको फारतीके चोत्रखो नु नेल्ल क्येडा चोत्रखो बाक्तीक कली फारब दुम्ब। मत्ती २७:५१; हिब्रू ९:३; प्रस्थान २६:६, ११

34 मिनु गे मेको सुम्तीक अरेशो लोत्र आगाम वोइश्शो सन्दोस तारी वोइश्शा, मेको फारतीक आ आगा गे नेल्ल क्येडा चोत्रखो बाक्तीकेमी वोइक्पाइक्चा माल्नेवे। प्रस्थान २५:२१

35 कांइतीक शोब्ले वोइक्तीक टेबल चोत्रखो बाक्तीके उत्तर गे वोइक्पाइक्चा माल्नेवे। बत्ती दातीक चहिं दक्खिन गे वोइक्पाइक्चा माल्नेवे। प्रस्थान २५:२३-३०; प्रस्थान ४०:४२

36 मिनु ताम्बु ओत्रतीक कली नीलो प्याजी नु लल रड डा श्येले नु रिम्शो पा किरशो सुती श्येले के प्रोत्रशो वा, बुटा आप्शा ठेयब फारतीक सेल्पाइक्चा माल्नेवे।

37 मेको फारतीके हेक्चा कली ५ ओटा बोल्यो शी के थाम सेल्पाइक्चा माल्नेवे। मेको थाम सुनम गिल्पाइक्चा माल्नेवे। मेको थामम सुन के हेक्तीके यो सेल्पाइक्चा माल्नेवे। मेको थाम राप्पाइक्तीके ५ ओटा कांसा के सेल्पाइक्चा माल्नेवे।

## 27

चढेतीक सेल्शो  
प्रस्थान ३८:१-७

1 मिनु बोल्यो शी के चढेतीक का सेल्चा माल्नेवे। मेको ५ कुबीत लाइशो नु ५ कुबीत ब्रेम्शो दुम्चा माल्ब। ४ पाटे नु कुबीत सां ग्येत्थ लाइशो दुम्चा माल्ब। कुबीत का ०.५ मिटर देंशो बाक्ब।

2 आ ४ सुरमी ४ ओटा ग्रोव्र गूपाइक्चा माल्नेवे। ग्रोव्र नु चढेतीक सेल्चा कली फलेक का केन दुम्चा माल्ब। मेको नेल्ल कांसाम गिल्पाइक्चा माल्नेवे। लेवी १६:१८; १राजा १:५; भजन संग्रह ११८:२७

3 चढेतीके कली माल्शो मारेइ मारेइ कांसा के सेल्पाइक्चा माल्नेवे। पुलु वोइक्तीक बोसपुकी, पुलु ताप्तीकपुकी, ब्रुइक्तीक बोसपुकी, श्ये गुंडतीक कांटापुकी नु मी कोइला कुर पतीकपुकी सेल्पाइक्चा माल्नेवे।

4 मिनु गे मी तिकतीक कांसा के जाली सेल्पाइक्चा माल्नेवे। मिनु जाली आ ४ सुरमी ४ ओटा मुन्द्रा सेल्पाइक्चा माल्नेवे।

5 मेको जाली चढेतीक उइ गे नु इर गे आ दातेम वोइक्पाइक्चा माल्नेवे।

6 मिनु चढेतीक कली यो बोल्यो शी के कांसाम गिल्शो कुरतीक कोक्के निक्शी सेल्पाइक्चा माल्नेवे।

7 मेको चढेतीक आ निम्फा पटटी डा मुन्द्रामी कोक्के शुइशशा, कुरने चाप्नीम।

8 मेको चढेतीक फलेक के सेल्पाइक्चा माल्नेवे। पुं नु सुम्तीके मपाइशो सन्दोस खोदेंशो पा सेल्पाइक्चा माल्नेवे। डांडामी इ कली कोइशो खोदेंशो पा सेल्पाइक्चा माल्नेवे। प्रस्थान २६:३०;

ताम्बु आ लाडगा  
प्रस्थान ३८:१-२०

9 मिनु ताम्बु आ लाडगा थरपु हिरचा कली रिम्शो पा किरशो सुती श्येले के फारतीके प्रोव्रपाइक्चा माल्नेवे। मेको फारतीके दक्खिन गे सहे का कुबीत लाइशो दुम्चा माल्ब। कुबीत का ०.५ मिटर खोदेंशो बाक्ब।

10 मेको फारतीक ग्याइक्पाइक्चा कली खाल का डा थाम, खाल का डा कांसा के राप्पाइक्तीके, मुन्द्रापुकी नु कोक्केपुकी चहिं चांदी के सेल्पाइक्चा माल्नेवे।

11 मिनु मोदेशो पा उत्तर गे यो सहे का कुबीत लाइश्शो फारतीक प्रोव्रपाइक्चा माल्नेवे। मेको कली २० ओटा थाम, २० ओटा कांसा के राप्पाइक्तीके, मेको मुन्द्रापुकी नु कोक्केपुकी चहिं चांदी के सेल्पाइक्चा माल्नेवे।

12 लाङगा डा पच्छिम गे ब्रेम्शो कली ५० कुबीत लाइश्शो फारतीक माल्ब। आ थाम नु आ राप्पाइक्तीक १०, १० ओटा दुम्चा माल्नीम। कुबीत का ०.५ मिटर खोदेशो बाक्ब।

13 लाङगा आ पूरब, नां दाप्तीके गे फारचा कली यो ५० कुबीत ब्रेम्शो दुम्चा माल्ब।

14 मिनु ओव्रतीक डा पटटी का कली १५ कुबीत डा फारतीक दुम्चा माल्ब। थाम नु आ राप्पाइक्तीके सां सां दुम्चा माल्नीम।

15 मिनु अर्को पटटी यो मोदेशो पा १५ कुबीत डा फारतीक, थाम नु राप्पाइक्तीके सां सां दुम्चा माल्नीम।

16 मिनु लाङगा ओव्रतीके कली २० कुबीत डा नीलो, प्याजी, श्येले नु रिम्शो पा किरशो सुती श्येले के प्रोव्रशो फारतीक माल्ब। मेको फारतीक कली लूजेम बुटा आप्पाइक्चा माल्नेवे। ओव्रतीके कली थाम नु राप्पाइक्तीके ४, ४ ओटा दुम्चा माल्नीम।

17 लाङगा एर ओंथ डा थाम नेल्ल चांदीमी गिल्शो कोक्केमी ग्याइक्पाइश्शो दुम्चा माल्नीम। मुन्द्रा चांदी के नु आन राप्पाइक्तीक कांसा के दुम्चा माल्नीम।

18 मेको लाङगा आ पित्थ लाइश्शो सहे का कुबीत, आ ब्रेम्शो ५० कुबीत नु आ फारतीके ग्येत्थ ५ कुबीत दुम्चा माल्ब। मिनु फारतीक वा नेल्ल रिम्शो पा किरशो सुती श्येले के प्रोव्रशो वा के दुम्चा माल्ब। थाम आन राप्पाइक्तीके कांसा के दुम्चा माल्नीम।

19 मिनु ताम्बु डा नाक्त किंत किंत गेय पचा कली माल्शो मारेइ मारेइ कांसा के दुम्चा माल्नीम। किलापुकी नु लाडगा डा किला नेल्ल यो कांसा के दुम्चा माल्नीम।

### बत्ती कली तेल

20 मिनु गे इस्राएली आन कली 'गे नेल्ल क्येडा रिम्शो तेल रवा आ फल के खाक्शो तेल चाक्कीन। मेको बत्ती गेना हना यो ब्रशा बाक्ल' दे माइक्मी। लेवी २४:२-४

21 मिनु गुम्तीक ताम्बु आगामी, कबल डा सन्दोस बाक्शो नेल्ल क्येडा चोव्रखो कोठा फारतीक आ डोंइती हारून नु आ तौपुकीमी नाक्दो रे सुनी सम्म मेको बत्ती दातीक परमप्रभु यावे आ डोंइती ब्रशा बाक्ल, दे ठीक सेल्चा माल्नीम। मेको इस्राएली आन चच युइ आन कली गेना हना यो पतीके लीचा माल्ब। मेको गेना हना यो पचा माल्नीम।

## 28

### चढेब आन वासी

प्रस्थान ३९:१-३१

1 मिनु इस्राएली आन दाते रे योव्रशा, इ लोकब हारून नु आ तौपुकी इ डोंइती राप्पाइक्चा माल्नेवे। मारदे हना हारून नु आ तौ नादाब, अबीहु, एलाजर नु इथामार आं कली चढेब दुम्चा माल्नीमी। १इतिहास २३:१३; प्रस्थान ६:२३

2 मिनु गे इ लोकब हारून कली आं गेय पची ना ला फेक्चा कली फेक्तीक वा फेरपाइक्चा माल्नेवे। मेको हारून कली ग्योम्शा दारपाइक्चा कली बाक्ब।

3 मिनु सु सुमी फेरस जोक्नीमी, मेको नु लोव्र पावो। मारदे हना गो मेको आन कली जोक्ब नु तुइक्ब सोक्तीम प्रिंताक्डमी। मेकोपुकीमी हारूनमी आं कली चढेतीक गेय पचा कली वासी फेरचा माल्नीम। प्रस्थान ३१:५

4 मेकोपुकीमी मार वासी फेरचा माल्नीम देंशा हना, कुचु तार वोइक्तीके, निसाफ पतीके ऊरीम नु थुम्मीम वोइक्तीक झोला, आ तार फेक्तीके नु आगा फेक्तीक वा फेरचा माल्नीम। पियाम गुप्तीक नु किप्शुर यो सेल्चा माल्नीम। मेको आं कली गेय पची ना फेक्तीक बाक्ब। इ लोकब हारून नु आ तौपुकीमी आं कली गेय पामेनु, मेको वा फेक्चा माल्नीम।

5 फेरबपुकीमी सुन, नीलो, प्याजी नु लल रड डा श्येले नु रिम्शो पा किरशो सुती श्येले के प्रोव्रशो वा के सेल्चा माल्नीमी। प्रस्थान २६:१

### चढेब आ कुचु तार वोइक्तीके

6 कुचु तार वोइक्तीके सुन के, नीलो, प्याजी नु लल रड डा श्येले नु रिम्शो पा किरशो सुती श्येले के प्रोव्रशो नु बुटा आप्शो वा के सेल्पाइक्चा माल्नेवे।

7 मेको आ बला सुम्तीके निक्शी निम्फा पटटी बोइश्शो दुम्चा माल्ब।

8 मिनु आ पाइक्तीके मेको कुचु तार वोइक्तीके का रेन दुम्चा माल्ब। मिनु खाल का डा रिम्शो गेयम सेल्शो दुम्चा माल्ब। मेको पाइक्तीके सुन, नीलो, प्याजी नु लल रड डा श्येले नु रिम्शो पा किरशो सुती श्येले के प्रोव्रशो वा दुम्चा माल्ब।

9 मिनु गे ओनीक्स हीरा निक्शी चाक्शा, इस्राएल आ १२ जना तौ आन नें मेको आस तारी मुशा ब्रेक्पाइक्चा माल्नेवे। प्रस्थान २५:७

10 गे आन जरमेशो खोदेंशो पा हीरा का तारी ६ जना आन नें नु अर्को हीरा तारी ६ जना आन नें मुशा ब्रेक्पाइक्चा माल्नेवे।

11 छाप सेल्बपुकीमी दोदेंशो पा मुशा छाप सेल्नीमी, मोदेंशो पा मुशा इस्राएल आ तौ आन नें ब्रेक्पाइक्चा माल्नेवे। मिनु मेको हीरा निक्शी सुनमी क्येप्पाइक्चा माल्नेवे।

12 मेको कुचु तार वोइक्तीक आ बला डा टुक्रा तारी क्येप्शा फेरपाइक्चा माल्नेवे। मिनु मेको हीरा कोव्रशा इस्राएली इन कली

मिम्नुड, दे कोइतीक बाक्ब। हारूनम आं डोंइती मेको आन नें बलाम कुरानु, गो मेको आन कली मिम्नुड।

13 मिनु हीरा वोइक्चा कली गे सुन के क्येप्तीक सेल्पाइक्चा माल्नेवे।

14 मिनु गे क्येख सुन के डोरी खोदेशो पा सिक्री निकशी चेम्पाइश्शा, हीरा क्येप्पाइश्शोमी बोइक्पाइक्चा माल्नेवे।

### निसाफ पतीक झोला

15 गे निसाफ पतीक झोला सेल्पाइक्चा माल्नेवे। मेको कुचु तार वोइक्तीके खोदेशो पा, सेल्पाइक्चा माल्नेवे। सुन, नीलो, प्याजी, लल श्येले नु रिम्शो पा किरशो सुती श्येले के प्रोत्रपाइक्चा माल्नेवे।

16 मेको खेयप का मुक्शोनु, स्पान का लाइश्शो नु स्पान का ब्रेम्शो ४ पाटे दुम्चा माल्ब। स्पान का २३ सेन्ती मिटर खोदेशो बाक्ब। बित्ता खोदेशो बाक्ब को?

17 मिनु ४ लस्कर हीरा सुनम का का पा क्येप्पाइक्चा माल्नेवे। डोंइती डा लस्कर लल मानीक माइश्शो हीरा, हाव पुशपराज माइश्शो हीरा नु गिगी बेरूज माइश्शो हीरा वोइक्पाइक्चा माल्नेवे।

18 मेको आ नोले डा लस्कर लल फिरोजा माइश्शो हीरा, बुश नीर माइश्शो हीरा नु बुश नु नीलो पन्ना माइश्शो हीरा वोइक्पाइक्चा माल्नेवे।

19 मेको आ नोले डा लस्कर गिगी नु नीलो रड ब्वाइश्शो रिम्शो टल्केशो नीलमनी माइश्शो हीरा, गिगी हाकीक माइश्शो हीरा नु प्याजी रड डा कटेला माइश्शो हीरा वोइक्पाइक्चा माल्नेवे।

20 मिनु नेल्ल क्येडा नोले डा लस्कर पीतमनी माइश्शो हीरा, लल रड डा ओनीक्स नु नीलो बिलौरा माइश्शो हीरा वोइक्पाइक्चा माल्नेवे। मोपा हीरा नेल्ल आन कली सुनम क्येप्पाइक्चा माल्नेवे।

21 मेको हीरा १२ ओटा दुम्चा माल्नीम। मिनु इस्राएल आ तौ आन नें का का पा मेको आन तार छाप थोक्शो खोदेशो पा मुशा ब्रेक्पाइक्चा माल्नेवे। हीरा का आ तारी थर का आ नें दुम्चा माल्ब।

२२ गे मेको निसाफ पतीक झोला कली क्येख सुन के डोरी किरशो खोदेशो पा सिक्री निक्शी चेम्पाइक्चा माल्नेवे।

२३ मिनु गे मेको निसाफ पतीक झोला कली सुन के मुन्द्रा निक्शी चेम्पाइक्चा माल्नेवे। मिनु मेको मुन्द्रा निसाफ पतीक झोला आ सुर निक्शीमी वोइक्पाइक्चा माल्नेवे।

२४ मेको सुन के सिक्री निक्शी निसाफ पतीक झोला आ सुरम वोइश्शो मुन्द्रा निक्शीमी लिक्पाइक्चा माल्नेवे।

२५ मेको सिक्री चढेब आ कुचु तार वोइश्शो वा आ बला डा हीरा क्येप्शो सुनम हेक्पाइक्चा माल्नेवे।

२६ मिनु गे लेंशा सुन के मुन्द्रा निक्शी सेल्पाइक्चा माल्नेवे। मेको निक्शी निसाफ पतीक ऊरीम नु थुम्मीम वोइक्तीक झोला आ उइ आगा गे पाइक्चा माल्नेवे। मोपा कुचु तार वोइक्तीक वा आ तार बाक्ब।

२७ मिनु गे लेंशा सुन के मुन्द्रा निक्शी सेल्पाइक्चा माल्नेवे। मेको कुचु तार वोइक्तीक आ बाला सुम्तीके उइ डा सुरम वोइक्चा माल्नेवे। मिनु दारपाइश्शो पाइक्तीके आ तारी क्येप्पाइक्चा माल्नेवे।

२८ मिनु मेको निसाफ पतीक ऊरीम नु थुम्मीम वोइक्तीक झोला आ मुन्द्रामी नीलो डोरीम लिक्शा, कुचु तार वोइक्तीक वामी पाइक्पाइक्चा माल्नेवे। मोपा मेको निसाफ पतीक झोला दारपाइश्शो पाइक्तीक तार बाक्शा कुचु वोइक्तीक वा रे एर ओंथ मयाक्सीब।

२९ मिनु मोदेशो पा हारून परमप्रभु यावे आ बाक्तीक ओव्रमेनु, इस्राएल आ तौ आन नें ब्रेक्शो निसाफ पतीक झोला आ कुचु तारी कुरचा माल्ब। मेको परमप्रभु यावेमी गेना हना यो मिन्चा कली बाक्ब।

३० मेको निसाफ पतीके झोलामी मेको ऊरीम नु थुम्मीम निक्शी कुर पचा माल्नेवे। हारून परमप्रभु यावे आ डोंइती लमेनु, इस्राएली आन निसाफ पतीके गेना हना यो आ कुचु तारी बाक्चा माल्ब। लेवी ८:८; गन्ती २७:२१; ब्यवस्था ३३:८

### आगा डा फेक्तीक वा

31 मिनु मेको कुचु तार वोइक्तीके आगा फेक्तीके नेल्ल नीलो प्याजी रड डा वा के फेरपाइक्चा माल्नेवे।

32 मिनु पिया ख्रीतीक पोत्रला वोइक्पाइक्चा माल्नेवे। मेको एर ओंथ मगाक्चा डा पा आ सुर थम बोल्यो पा प्रोत्रपाइक्चा माल्नेवे।

33 मेको फेक्तीके आ उइ डा सुर एर ओंथ गे नीलो, लल नु प्याजी रड डा श्येले के सेल्शो दारीम सेल्पाइक्चा माल्नेवे। मेको आन दातेम सुन के आइक्च आइक्च किडगो क्युकपाइक्चा माल्नेवे।

34 किडगो का, दारीम का, किडगो का दारीम का पा मेको फेक्तीक नेल्ल आ एर ओंथ क्युकचा माल्नीम।

35 मिनु हारूनमी मेको वा गेय पची ना फेक्चा माल्ब। मोपा परमप्रभु यावे आ नेल्ल क्येडा चोत्रखो बाक्तीके ओत्रमेनु, किडगो आ रेयके नेंपाइक्चा माल्ब। हारून मबेक्ल, दे मोदेशो दुम्चा माल्ब। प्रस्थान ३०:२१; लेवी १६:२,१३

### कुप्फीम पांडतीके नु फेक्तीके वा

36 गे कुप्फीम पांडतीके क्येख सुन के फू खोदेशो पा चेम्पाइक्चा माल्नेवे। मेकेर छाप थोकशो खोदेशो पा 'परमप्रभु यावे कली ला' दे मुशा ब्रेक्पाइक्चा माल्नेवे। जकरिया १४:२०; प्रस्थान ३९:३०

37 पियाम गुक्तीकेम आ डोंइती गे वोइक्चा कली नीलो प्याजी डोरीम फ्रेंपाइक्चा माल्नेवे।

38 मोपा मेको हारून आ कुप्फीम बाक्चा माल्ब। आ कुप्फीम पाइशशा, इस्राएली आन मरिम्शो पशो कुरब। मिनु परमप्रभु कली चढ़ेशो रिम्शो दुम्नीम। परमप्रभु यावेमी आन चढ़ेशो ब्रवल, दे गेना हना यो आ कुप्फीम बाक्चा माल्ब।

39 नेल्ल क्येडा आगा फेक्तीके रिम्शो पा किरशो सुती श्येले के बुटा आप्शा प्रोत्रशो वा के सेल्पाइक्चा माल्नेवे। पियाम गुक्तीके रिम्शो पा किरशो सुती श्येले के प्रोत्रशो वा के सेल्पाइक्चा माल्नेवे। किप्तीके रड रड डा सेल्पाइक्चा माल्नेवे।

हारून आ तौ आन फेक्तीके

40 गे हारून आ तौ आन कली फेक्तीके किप्तीक नु आइक्च गुक्तीके सेल्पाइक्चा माल्नेवे। मेको हारून आ तौ आन कली ग्योम्शा दारपाइक्चा कली बाक्नीम। प्रस्थान २८:२

41 गे मेको इ लोकब हारून नु आ तौ आन कली फेक्तीमी। मिनु तेल लुक्शा, आं कली ला गेय पचा कली योव्रशा वोइक्मी। मोपा आं कली चढेब दुम्नीम। प्रस्थान २९:९, २९-३६; प्रस्थान २९:२४; लेवी ८:१२, २२-३१

42 गे मेको आन शिप्रा रां सुम्पाइक्चा कली सुती वा के कटटु फेरपाइक्चा माल्नेवे। मेको कम्बर रे पोक्च सम्म दुम्चा माल्ब।

43 मिनु हारून नु आ तौपुकी गुम्तीक ताम्बु ओव्रशा, चढेतीक आ नेक्था लमानु, मेको वा फेक्सीशो बाक्चा माल्नीम। मफेक्साक्म हना, दोस तशा बेक्नीम। हारून नु आ चच युइ आन पाला नेल्लेमी गेना हना यो मोदेशो पचा माल्नीम।

## 29

चढेब आन डोंइती डा पतीके

लेवी ८:-

1 गे हारून नु आ तौपुकी आं कली चढेब सेल्चा कली मार पचा माल्नेवे देशा हना, बोहोर का, मारेइ मदुम्शो थम रिम्शो सांड निक्शी चाक्को।

2 मिनु रिम्शो चेरब फस के बोरब ओख्ती मसुप्शो शोब्ले, तेल ब्वाइश्शो जिज शोब्ले नु तेल खेक्शो बोरब ओख्ती मसुप्शो शोब्ले सेल्पाइक्चा माल्नेवे।

3 मेको शोब्ले नेल्ल तोव्रलो कामी कुर पा, बोहोर नु सांड चाक्चा माल्नेवे।

4 मिनु हारून नु आ तौ आन कली गुम्तीक ताम्बु आ ओव्रतीकेमी चाक्चा नम। मिनु गे मेको आन कली चिक्चा माल्नेवे।

5 वासी चाक्शा, हारून कली आगा फेक्तीक वा, मेको आ तार डा फेक्तीके वा फेक्पाइश्शा, कुचु तार वोइक्तीक फेक्शा निसाफ पतीके ऊरीम नु थुम्मीम बाक्शो झोला रेल्ला माल्नेवे। मिनु मेको तारी बुटा आप्शो किप्तीके किप्पाइक्चा माल्नेवे।

6 आ पिया तारी गुक्तीके गुप्शा, मेको तारी 'परमप्रभु यावे कली ला' दे ब्रेक्शो कुप्फीम पांडतीके पांडपाइक्चा माल्नेवे। प्रस्थान २८:३६; प्रस्थान ३९:३०

7 मिनु लुक्तीक तेल लाइश्शा आ पियामी तेल लुक्तो। प्रस्थान ३०:२५

8 मिनु हारून आ तौ आन कली यो चाक्शा, वा फेक्चा माल्नेवे।

9 मिनु आ तौ आन कली किप्तीके किप्चा माल्नेवे। मिनु आन पियाम गुक्तीके गुप्चा माल्नेवे। मिनु मेकोपुकी गेना हना यो आं कली चढेब गेय पाइब दुम्नीम। मोपा हारून नु आ तौ आन कली आं कली चढेब सेल्मी। प्रस्थान २८:४१

10 मिनु मेको बोहोर गुम्तीक ताम्बु आ डोंइती चाक्शा, हारून नु आ तौ आन कली आन गुइ मेको बोहोर आ पिया तारी वोइक्पाइक्चा माल्नेवे।

11 मिनु मेको बोहोर कली परमप्रभु यावे आ डोंइती, गुम्तीक ताम्बु आ ओव्रतीकेम राप्पाइश्शा क्योरचा माल्नेवे। लेवी १:४

12 मिनु बोहोर आ हुश इच्का खोइ लाइश्शा इ ब्रेप्चोमी चढेतीक आ ग्रोव्रपुकीमी खेक्चा माल्नेवे। मिनु लीशो हुश नेल्ल चढेतीके आ पुंमी मोइक्चा माल्नेवे।

13 मिनु गे कयी गिल्शो बोंसो नेल्ल, आइदी तारी डा जाला, आ चिच निम्फा नु आ तार डा बोंसो नेल्ल चढेतीकेम चोचा माल्नेवे। लेवी ३:१६-१७

14 आ श्ये, आ कुशुल नु आ गोबर चहिं ताम्बु आ लाडगा रे गुंइशा, चोचा माल्नेवे। मेको पाप पशो आ पर्बम चढेशो बाक्ब। लेवी ४:११-१२

15 मिनु मेको सांड का चाक्शा, हारून नु आ तौ आन गुइ मेको आ पिया तार वोइक्पाइक्चा माल्नेवे।

16 मेको कली क्योरशा, मेको आ हुश चढ़ेतीक नेल्ल ब्रुइक्चा माल्नेवे।

17 मिनु मेको सांड आ श्ये कली टुक्रा टुक्रा पा चेक्शा, पिया नु वोइक्चा माल्नेवे। मिनु मेको आ क्यी नु आ खोइली नेल्ल मुरशा, मेको श्ये नु पियामी वोइक्चा माल्नेवे।

18 मोदेशो पा सांड नेल्ल चढ़ेतीक तारी चोचा माल्नेवे। मेको परमप्रभु यावे कली चोशा चढ़ेतीक बाक्ब। परमप्रभु यावे कली ब्रोत्रशो रिना पाइशशो मीम चोशा चढ़ेतीके बाक्ब। १सामुएल २:२८

19 मिनु मेको लीशो सांड चाक्चा माल्नेवे। मिनु हारून नु आ तौ आन गुइ मेको सांड आ पिया तार वोइक्पाइक्चा माल्नेवे।

20 मिनु मेको सांड क्योरशा, आ हुशेम हारून आ ग्युरा नोफा डा लोव्रतीम नु आ तौ आन ग्युरा नोफा डा लोव्रतीम खेक्चा माल्नेवे। मिनु मेको आन ग्युरा गुइ डा ठेयब ब्रेप्चोम नु आन ग्युरा खोइली डा ठेयब ब्रेप्चोम खेक्चा माल्नेवे। मिनु लीशो हुश चढ़ेतीक तार नु आ एर ओंथ ब्रुइक्चा माल्नेवे।

21 मिनु चढ़ेतीकेम बाक्शो हुश नु लुकतीक तेल लाइशशा, हारून नु आ वा नु आ तौ आन वा तारी ब्रुइक्चा माल्नेवे। मोपा हारून नु आ वा, आ तौ नु मेको आन वा नेल्ल परमप्रभु यावे कली ला गेय पचा कली दुम्नीम।

22 मिनु सांड आ बोंसो, आ बोंसो पाइशशो मीलु, आ क्यी गिल्शो बोंसो, आइदी तार डा जाला, आ चिच निम्फा, मेको तार डा बोंसो नु आ ग्युरा फिला लाइक्चा माल्नेवे। मारदे हना मेको चढ़ेब सेल्टीके सांड बाक्ब। लेवी ३:३-४

23 मिनु परमप्रभु यावे आ डोंइती वोइशशो बोरब ओरुत्ती मसुप्शो शोब्ले, तोव्रलो डा शोब्ले का, तेलम ब्वाइशशो जिज शोब्ले का नु तेल खेक्शो शोब्ले का लाइशशा,

24 मेको नेल्ल हारून नु आ तौ आन दाइशशो गुइ गुइमी गेचा माल्नेवे। मेको परमप्रभु यावे आ डोंइती ग्येत्थ लुकच पा हिम्शा चढेतीक चढेचा माल्नीम।

25 मिनु गे मेको आन गुइ रे ताक्शा, परमप्रभु यावे आ डोंइती ब्रोव्रशो रिना पाइब चढेतीके तारी चोशा चढेचा माल्नेवे। मेको परमप्रभु यावे कली मीम चोशा चढेतीक बाक्ब।

26 मिनु हारून कली चढेब सेल्ल्तीके सांड आ कुथु चाक्शा, परमप्रभु यावे आ डोंइती ग्येत्थ लुकच पा हिम्शा चढेचा माल्नेवे। मेको चहिं इ के दुम्ब।

27 मिनु मेको हारून नु आ तौ आन कली चढेब सेल्ल्शो सांड आ ग्येत्थ लुकच पा हिम्शा चढेशो कुथु नु क्युक्शा चढेशो फिला मेको आन कली गेचा माल्नीम। गन्ती १८:१८

28 मारदे हना इस्राएलीपुकीमी मेको हारून नु आ तौ आन कली गेना हना यो गेचा माल्शो भाग बाक्ब। मेको गेचा माल्शो चढेतीके बाक्ब। इस्राएलीपुकीमी आन परमप्रभु यावे नु दुशा बाक्चा आ पर्बम चढेतीके रे गेचा माल्शो मेकोन बाक्ब।

29 हारून आ चढेची ना फेक्तीक मेको आ नोले चढेब दुम्ब आ तौ के दुम्ब। मेको वा फेक्शा, तेल लुकशा, चढेब दुम्ब। प्रस्थान २८:४०-४१

30 हारून आ पा डा चढेब दुम्ब आ तौ गुम्तीक ताम्बु आगा परमप्रभु यावे आ बाक्तीकेम गेय पथ ओव्रमेनु, ७ नाक्त सम्म मेको वा फेक्चा माल्ब।

31 मिनु मेको चढेब सेल्ल्तीके सांड आ श्ये गुम्तीक ताम्बु आ लाडगाम क्येचा माल्नेवे।

32 मिनु नोले हारून नु आ तौपुकीमी मेको सांड आ श्ये नु तोव्रलो डा शोब्ले गुम्तीक ताम्बु आ ओव्रतीकेमी बाक्शा जचा माल्नीम।

33 मेको डोंइती आन पाप क्याम्चा कली चढेशो थोव्रक आंम कली परमप्रभु यावे कली ला गेय पाइब दुम्चा, दे जचा माल्नीम।

तन्न अरुमी मेको जचा मदुम्नीम। मारदे हना मेको परमप्रभु यावे के बाक्ब। लेवी १०:१७

34 चढ़ेब सेल्ची ना डा श्ये नु शोब्ले सुनी सम्म हेंत हना, मेको हेंशो नेल्ल चोचा माल्नेवे। मेको मजचा मब्बचा। मारदे हना मेको चढ़ेब सेल्ची ना डा बाक्ब।

35 गोम इ कली अरेशो खोदेंशो पा हारून नु आ तौ आन कली पाइक्मी। मेको आन कली ७ नाक्त सम्म मोदेंशो चढ़ेब सेल्तीक गेय पचा माल्नेवे।

36 मिनु गे नाक्त किंत किंत बोहोर का पाप पशो आ पर्बम चढ़ेचा माल्नेवे। मेको पाप क्याम्तीक गेय पचा कली चढ़ेशो बाक्ब। मिनु चढ़ेतीक परमप्रभु के दुम्त, दे हुश बुइश्शा, तेल लुक्या माल्नेवे।

37 गे ७ नाक्त सम्म चढ़ेतीकेमी मो पशा पाप क्याम्तीक गेय पचा माल्नेवे। मिनु मेको चढ़ेतीके परमप्रभु कली ला दुम्ब। मेको चढ़ेतीक कली मार मारम थीनीमी, मेको यो परमप्रभु केन दुम्नीम। प्रस्थान ३०:२९

नाक्त किंत किंत डा चढ़ेतीक

गन्ती २८:३-८

38 मिनु गे चढ़ेतीकेमी मार चढ़ेचा माल्नेवे देशा हना, नाक्त किंत किंत बर्स का दुम्शो सांड निक्शी चढ़ेचा माल्नेवे।

39 मेको का सुनी का चहिं नाक्दो चढ़ेचा माल्नेवे। २राजा १६:१५; भजन संग्रह १४१:२

40 डोंडती डा सांड नु रिम्शो चेरब फस १० भाग डा भाग का, ४ भाग डा हिन भाग का रिम्शो तेल मेको नु बुल्शा, ४ भाग डा हिन अडगुर शांबु भाग का तूचा थोव्रक चढ़ेचा माल्नेवे। चेरब फस एफाह का २२ लिटर खोदेंशो बाक्ब। मेको के १० भाग का २ लिटर खोदेंशो बाक्ब। हिन का ४ लिटर, ४ भाग डा भाग का लिटर का बाक्ब। प्रस्थान २७:२०

41 मिनु अर्को सांड नाक्दो चढ़ेचा माल्नेवे। मिनु मेको नु अन्न चढ़ेतीक नु आ तूचा थोव्रक चढ़ेतीक सुनी डा खोदेंशो पा नाक्दो यो

चढ़ेचा माल्नेवे। परमप्रभु यावे कली ब्रोव्रशो रिना पाइब मीम चोशा चढ़ेतीके मेकोन बाक्ब।

42 गे इ चच युइ आन पाला नेल्लेमी गेना हना यो परमप्रभु यावे आ डोंइती गुम्तीक ताम्बु आ ओव्रतीक आ नेक्था चोशा चढ़ेतीक चढ़ेचा माल्नीम। मेकेर गो गे नु लोव्र पचा कली गुम्नन। प्रस्थान ३३:७; प्रस्थान २५:२

43 मिनु गो इस्राएली आन कली मेकेर गुम्नुड। मिनु मेको ताम्बु आं छेडछेडम ब्रीशा आं के दुम्ब। प्रस्थान ३३:१०; प्रस्थान ४०:३४

44 गो गुम्तीक ताम्बु नु चढ़ेतीक आं के सेल्लुड। हारून नु आ तौ आन कली यो आं कली चढ़ेब दुम्शा, आं गेय पपाइक्चा कली आं के सेल्लुडमी।

45 गो इस्राएली आन दातेमी बाक्नुड। मिनु मेको आन परमप्रभु दुम्ती। प्रस्थान २५:८; जकरिया २:१४; लेवी २६:१२

46 गो मेको आन दातेमी बाक्चा कली मेको आन कली इजीप्त रे गुंडब मेको परमप्रभु यावे, आन परमप्रभु नड। गो मेको आन परमप्रभु यावे नड, दे मेकोपुकीम तुइक्चा माल्नीम। प्रस्थान २०:२

## 30

धूप चोशा चढ़ेतीके

प्रस्थान ३७:२५-२८

1 मिनु गे धूप चोचा कली बोल्यो शी के चढ़ेतीक का सेल्चा माल्नेवे।

2 मेको आ पित्थ लाइशो कुबीत का नु आ ब्रेमशो कुबीत का डा ४ पाटे दुम्चा माल्ब। मिनु आ ग्येत्थ लाइशो कुबीत निक्शी दुम्चा माल्ब। मेको ग्रोव्र पाइशो दुम्चा माल्ब। ग्रोव्र नेल्ल मख्रोंइसीशो शी का केन दुम्चा माल्नीम। कुबीत का ०.५ मिटर बाक्ब।

3 मेको नेल्ल क्येख सुनमी गिल्चा माल्ब। मिनु मेको कली सिरपेच के खोदेंशो पा सुन के सुर सेल्पाइक्चा माल्नेवे।

4 मिनु सुन के मुन्द्रा निकनिक्शी सेल्पाइक्चा माल्नेवे। मेको मुन्द्रा धूप चोतीके आ सिरपेच खोदेशो सुर आ दी निम्फा पटटी गो क्येप्पाइक्चा माल्नेवे। मेको कुरतीक कोक्के आन कली शुइक्तीक दुम्ब।

5 मिनु मेको कुरचा कली बोल्यो शी के कोक्के निकशी सेल्शा, सुनमी गिल्पाइक्चा माल्नेवे।

6 मिनु मेको परमप्रभु यावे आ अरेशो लोत्र वोइश्शो कबल पशो सन्दोस नु सुम्तीके फारतीक वा आ डोंइती वोइक्चा माल्नेवे। गो मेकेर इ कली गुम्नुड। प्रस्थान २५:२१-२२

7 मिनु हारूनमी सुनी कुस कुस बत्ती दाचा कली सादानु, ब्रोत्रशो रिना पाइब धूप चोचा माल्ब। भजन संग्रह १४१:२

8 नाक्दो हारूनमी बत्ती दाडानु यो धूप चोचा माल्ब। मेको परमप्रभु यावे आ डोंइती धूप चोतीक मेको आन चच युइ आन पालामी गेना हना यो पचा माल्नीम।

9 मेको धूप चोतीकेमी अरु धूप चोचा मदुम्ब। चोशा चढ़ेतीके नु जचा थोत्रक चढ़ेतीके मेकेर चढ़ेचा मदुम्ब। तूचा थोत्रक चढ़ेतीके यो मेकेर मोइक्चा मदुम्ब। लेवी १०:१-२

10 बर्सम खेयप का हारूनमी चढ़ेतीक आ ग्रोत्रम हुश खेक्शा पाप क्याम्तीक गेय पचा माल्ब। मेको हुश पाप आ पर्बम चढ़ेशो बस्तु आ हुश बाक्चा माल्ब। मेको गेना हना यो बर्समी खेयप का इन चच युइ आन पाला सम्म मेको पाप क्याम्तीक गेय चढ़ेतीके आ हुशेमी पचा माल्ब। मेको परमप्रभु यावे आ डोंइती नेल्ल क्येडा चोत्रखो सेल्लतीके बाक्ब” दे परमप्रभु यावेमी मोसा कली देंत। लेवी १६:१८

क्येट पोक्चा शेंशो

11 परमप्रभु यावेमी मोसा कली

12 “गे इस्राएली वोंइश मुर आन कली हिकगीनु, मेको आन कली मुर बेक्तीक रोइ मपामेक्ल, दे ब्रोंइचा कली नेल्लेमी परमप्रभु यावे

कली क्येट गेचा मालनीम। मिनु मेको आन कली हिक्शोनु, मारेइ मरिम्शो मदुम्ब। गन्ती १:३; २सामुएल २४:२-३

13 गिश जना वोंइश मुर हिक्सीनीमी, मिश जना ताम्बु डा नाक्तीके डा आधा शेकेल गेचा मालनीमी। शेकेल का २० गेराह चांदी बाक्नीम। मोपा परमप्रभु यावे कली गेशो क्येट आधा शेकेल गेचा माल्शो बाक्ब। शेकेल का ११.५ ग्राम खोदेशो बाक्ब। गेरा का ०.६ ग्राम बाक्ब। मत्ती १७:२७

14 वोंइश मुर गिश जना २० बर्स गाप्शो नु मेको क्येडा लाक्शो बाक्मा, मिश जनाम परमप्रभु यावे कली गेचा माल्शो चढेचा मालनीम।

15 इन पाप क्याम्तीक गेय पचा कली थीबमी आधा शेकेल, मथीबमी यो आधा शेकेल परमप्रभु यावे कली गेचा मालनीमी।

16 इस्राएली वोंइश मुरुमी आन गेशो प्रोंइतीक क्येट ताक्शा, गुम्तीक ताम्बु डा गेय पचा कली गेचा मालनेवे। मिनु मेको क्येट परमप्रभु यावे आ डोंइती इस्राएली आन कली प्रोंइशो मिम्तीक चिन्ड दुम्ब” देंत।

### चिक्तीक ठेयब बोस

17 मिनु लेंशा परमप्रभु यावेमी मोसा कली

18 “गे चिक्चा कली कांसा के ठेयब बोस का सेल्पतो। मेको आ निप्पाइक्तीके यो कांसा केन दुम्चा माल्ब। मेको गुम्तीक ताम्बु नु चढेतीक आस दातेमी वोइशशा, ब्वाक्कु कुर पपाइक्चा मालनेवे। प्रस्थान ३८:८

19 मेको ब्वाक्कुमी हारून नु आ तौपुकीमी आन गुइ खोइली चिक्सीचा मालनीम।

20 मेकोपुकी मबेक्कल, दे गुम्तीक ताम्बुम ओव्रचा क्येडा डोंइती चिक्सीचा मालनीम। मिनु चढेतीकेमी गेय पचा, दे परमप्रभु यावे आ डोंइती मीम चोशा चढेतीक चढेचा कली लमानु, मेको ब्वाक्कुम चिक्सीचा मालनीम। ब्वाक्कुम चिक्सीमानु, मेको मबेक्नीम।

21 मेकोपुकी नु आन चच युइ आन पाला नेल्लेमी गेना हना यो पतीके लोत्र बाक्ब” देंत।

### ताम्बु डा लुक्तीक तेल

22 मिनु लेंशा परमप्रभु यावेमी मोसा कली

23 “गेमी शुश क्येट लाइब ब्रोव्रशो रिना पाइब थोत्रक चाक्चा माल्नेवे। मार चाक्चा माल्नेवे देंशा हना, मूरे आ रस ५ सहे शेकेल, दाल चिनी सहे निक्शी ५० शेकेल नु ब्रोव्रशो रिना पाइब बोच सहे निक्शी ५० शेकेल चाक्चा माल्नेवे। शेकेल का ११.५ ग्राम चांदी के क्येट बाक्ब। ताम्बु डा शेकेल चहिं १२ ग्राम बाक्ब।

24 नु कस्सीया माइशो ब्रोव्रशो रिना पाइब फू ५ सहे शेकेल, ताम्बु डा नाक्तीकेमी नाक्शा, चाक्चा माल्नेवे। रिम्शो तेल हिन का यो चाक्चा माल्नेवे। हिन का ४ लिटर खोदेंशो बाक्ब।

25 मेको नेल्ल ब्वाइशशा थम रिम्शो लुक्तीक तेल सेल्पाइक्चा माल्नेवे। मेको परमप्रभु यावे कली ला बाक्ब। मेको ब्रोव्रशो रिना पाइब सेल्स जोक्ब मुर कली सेल्पाइक्चा माल्नेवे। मेको थम रिम्शो लुक्तीक तेल ताम्बु कली ला सेल्चा माल्ब। प्रस्थान ३७:२९

26 मिनु गे गुम्तीक ताम्बु नु कबल पशो सन्दोस,

27 टेबल नु मेकेर डा मार मार नेल्ल, बत्ती दातीके नु मेको आ मार मार नेल्ल नु धूप चोशा चढेतीके,

28 चोशा चढेतीके नु मेको आ मार मार नेल्ल नु चिक्तीके ठेयब बोस नु आ निप्पाइक्तीके नेल्ल खेक्पाइक्चा माल्नेवे। प्रस्थान ३०:१०

29 मोपा मेको मारेइ मारेइ नेल्ल खेक्तीनु, मेको ताम्बु डा गेय कली ला दुम्नीम। मेको कली मार मारम थीनीमी, मेको यो परमप्रभु कली दुम्नीम।

30 आं कली चढेब दुम्ब हारून नु आ तौ आन कली यो तेल खेक्शा, आं गेय पाइब सेल्चा माल्नेवे। प्रस्थान २९:७



- 1 मिनु परमप्रभु यावेमी मोसा कली प्रस्थान ३५:३०-३५
- 2 “नेनो, गो यहूदा आ थर डा हुर आ चच ऊरी आ तौ बेचालेल आ नें थिशा आं गेय पचा कली योव्रता।
- 3 गो मेको कली आं सोक्तीमी प्रिंशा, मार मार सेल्चा कली जोक्ब तुइक्ब सेल्ता। मिनु पने चाप्तीक सक्ति यो गेता।
- 4 मेकोमी नेल्ल मिम्शा, सुन, चांदी नु कांसा के मारेइ मारेइ चेम्ने चाप्ब।
- 5 हीरा खोइक्तीक नु सुनम क्येप्तीके, शी मुतीके नु मारेइ मारेइ सेल्स जोक्ब दुम्पाइक्ता।
- 6 गो दान आ थर डा अहीसामाक आ तौ ओहोली-आब कली बेचालेल नु गेय पचा कली योव्रता। गो इस्राएल डा जोक्ब रिम्शो गेय पाइब मेको आस कली वारच पाइब यो योव्रतामी। गो इ कली मार मार देंडा, मेको नेल्ल आन कली सेल्ने चाप्तीक सक्ति गेतामी।
- 7 गुम्तीक ताम्बु, कबल पशो सन्दोस, मेको आ तार डा सुम्तीके नु ताम्बु आ गा डा माल्शो मारेइ मारेइ, प्रस्थान ३५:११-१९
- 8 टेबल नु मेको आ मारेइ मारेइ, बत्ती दातीके नु आ मारेइ मारेइ, धूप चोशा चढेतीके,
- 9 चोशा चढेतीके नु आ मारेइ मारेइ, ठेयब चिक्तीक बोस नु आ राप्पाइक्तीके,
- 10 आं कली चढेब दुम्तीके रिम्शो प्रोव्रशो वा नेल्ल, चढेब हारून आ चढेची ना फेक्तीक वा नु आ तौ आन फेक्तीक वा,
- 11 लुक्तीक तेल नु ब्रोव्रशो रिना पाइब धूप गोम इ कली देंशो खोदेंशो पा मेकोपुकीमी आं बाक्तीक कली सेल्चा माल्नीम” देंत।

नाइक्तीक नाक्त आ पर्बम अरेशो  
प्रस्थान ३५:१-३

12 मिनु परमप्रभु यावेमी मोसा कली

13 “गे इस्राएली आन कली मार माइक्चा माल्नेवे देंशा हना ‘गेपुकीमी थमा पा आं नाइक्तीक नाक्ती मानेचा माल्नीनी। मारदे हना मेको गोपुकी नु इन चच युइ सम्म कली चिन्ड लीब। गो,

परमप्रभु यावेमी, इन कली आं मुर सेल्ता, दे गे तुइक्नीनी। प्रस्थान २०:८; इजीकीएल २०:१२

14 मोपतीके गेपुकीमी नाइक्तीक नाक्त मानेचा माल्नीनी। मारदे हना मेको परमप्रभु आ नाक्त बाक्ब। सु सुमी मेको नाक्ती ममानेथु, गेय पाइनीमी, मेको मुर आ जात डा मुर रे तिल्शा, साइक्चा पुंडसीनीम। गन्ती १५:३२-३५; येरमीया १७:२१-२३

15 मोपा ६ नाक्त सम्म गेय पामेक्ल, तन्न ७ नाक्त चहिं नाइक्तीक नाक्ती बाक्ब। मेको परमप्रभु यावे आ नाक्त बाक्ब। सु सुम मेको नाक्ती गेय पाइनीमी मेको थमा पा साइक्चा पुंडसीनीम।

16 मोपतीके इस्राएलीपुकीमी नाइक्तीक नाक्ती मानेचा माल्नीम। मेको नाक्ती गेना हना यो आन चच युइ सम्म कबल पतीके बाक्ब। मर्कूस २:२७-२८

17 गो नु इस्राएली इन दातेमी मेको गेना हना यो लीब चिन्ड बाक्ब। परमप्रभु यावेमी ६ नाक्तीमी सरीड नु रागी सेल्ने थुम्तु। ७ नाक्ती चहिं नाइसीशा, आ दशो सात' दे इस्राएली आन कली माइक्चा माल्नेवे" देंत। प्रस्थान १६:२३, २५; उत्पत्ती २:२

18 मिनु परमप्रभुमी मोसा नु सीनै डांडाम लोव्र पने थुम्शा, आ देशो फुल्लु निकशीमी मुशा आंम ब्रेक्शो लोव्र मोसा कली गेपु। प्रस्थान २४:१२; प्रस्थान ३२:१५-१६; प्रस्थान ३४:२८; ब्यवस्था ४:१३; ब्यवस्था ५:२२; ब्यवस्था ९:१०; ब्यवस्था १०:१-५

## 32

### इस्राएलीमी सुन के मूर्ति सेल्शो

1 मिनु इस्राएल डा मुरपुकीमी मोसा कली डांडा रे मयिशो तशा, हारून आ बाक्तीक जाक्शा, मेको कली "लो, इं डोंडोंइती गाक्शा लां कोंइब देवता सेलो। आंइ कली इजीप्त रागी रे गुंडशा, एक चाक्ब मोसा मार दुम्मे? मतुइक्तक" दे हारून कली देंमा बाक्त। ब्यवस्था ९:८-२१

2 मिनु हारूनमी मेको आन कली “इन मीश, इन तमी तौ आन पांइशो सुन पुइश्शा, आं बाक्तीके चाक्कीन” देंमाक्त।

3 मिनु मुर नेल्लेमी आन नोफामी पांइशो सुन पुइश्शा, हारून आ बाक्तीके चाक्गमे बाक्त।

4 मिनु हारूनमी मेको सुन आन गुइ रे ताक्शा, यपाइश्शा, बाछा का सेला बाक्त। मिनु इस्राएलीपुकीमी “इस्राएल डा मुरपुकी, एकोन इं देवता बाक्ब। एकोमी इं कली इजीप्त रागी रे गुंडताक्व” दे मुमा बाक्त। १राजा १२:२८; भजन संग्रह १०६:१९-२०; प्रेरित ७:४१

5 मिनु हारूनमी मेको आन कली तशा, बाछा आ डोंइती चढ़ेतीक का सेला बाक्त। मिनु ठेयब सेंदा पा “दीसा परमप्रभु यावे कली चाड का मानेचा माल्ब” देंमाक्त।

6 मिनु आ दीसा मेकोपुकी सुनी कना बोक्शा चोशा चढ़ेतीक नु दुशा बाक्चा आ पर्बम चढ़ेतीक चढ़ेमे बाक्त। मिनु मुरपुकी जचा तूचा कली निस्समा बाक्त। मिनु नोले जशा तूशा बोक्शा, आन दला दाक्स पामे बाक्त। १कोरिन्थी १०:७

7 मिनु परमप्रभु यावेमी मोसा कली “डांडा रे तोंइसो। इजीप्त रे गुंडशा चाक्शो इ मुरपुकीमी आन दला दाक्स पा पाप पाम्तेक्म।

8 मेकोपुकीमी आं शेंशो लोव्र थु था प्रोंइतेक्म। आम कली सुन के बाछा का सेल्शा, मेको कली पूजा पशा ‘इस्राएल डा मुरपुकी, एकोन इं कली इजीप्त रागी रे गुंडब परमप्रभु बाक्ब’ देंतेक्म” दे परमप्रभु यावेमी मोसा कली देंत। प्रस्थान २०:४,२३

9 मिनु लेंशा परमप्रभु यावेमी मोसा कली “गो मेको मुर आन कली ताता। काइ मटीब बाक्नीम, दे तुइक्ताक्ड। ब्यवस्था ९:६; यसैया ४८:४; प्रेरित ७:५१

10 मोपतीके आं कली मतेक्यी। मेको आन कली तशा गाइक्ताक्यी। गो मेको आन कली साइक्नुडमी। मिनु गो इ लां पा ठेयब जात का सेल्लुडमी” देंत। गन्ती १४:११-२०

11 मिनु मोसामी परमप्रभु यावे कली “परमप्रभु यावे, आं परमप्रभु, इन मुर आन पर्बम मारदे गाइक्तीनी? गेमी इन ठेयब सक्तिमी मेको

आन कली इजीप्त रागी रे गुंडताक्नी।

12 मो पाइतीनी हना इजीप्त रागी डा मुरपुकीमी 'परमप्रभुमी मेको आन कली पहाडमी साइशशा, रागी रे क्याम्चा कली एक रे गुंडताक्व' देनीम। मोपतीके इन ठेयब गाइक्तीक प्रोनीन। इन मुर आन कली मसतीन। ब्यवस्था ९:२८; यहोसु ७:९

13 इन गेय पाइब अब्राहाम, इसहाक नु याकूब मिम्तीने। मेको आन पर्वम इन नेमी 'गो इन कली सरीड डा सोरुल खोदेशो पा शुश सेलनुड। आं देशो रागी इन चच युइ आन कली गेनुडमी। मिनु एको रागी गेना हना यो मेको आन के दुम्ब' दे कसम जाइतीनी" देंत। उत्पत्ती १५:५; उत्पत्ती २२:१६-१७; उत्पत्ती २६:४

14 मिनु परमप्रभु यावेमी आ थुं लेशशा, आ मुर आन कली मसाइक्मी। भजन संग्रह ८५:-

### परमप्रभु आ ब्रेक्शो फुल्लु प्रोल्शो

15 मिनु मोसा परमप्रभु यावे आ देशो लोत्र ब्रेक्शो फुल्लु निक्शी कुरशा, डांडा रे ब्रुप्त। मेको फुल्लु निक्शी निम्फा पटटीम मुशा ब्रेक्शो बाक्त।

16 परमप्रभुमी मेको फुल्लु आंमा चेशशा सेल्शो बाक्माक्त। मिनु मुशा ब्रेक्शो बाक्त। प्रस्थान ३१:१८

17 मिनु यहोसुमी मुर आन कली रेयके पशो नेंशा, मोसा कली "इस्त्राएल डा मुर आन बाक्तीकेमी लडाइ पशो रेयके खोदेशो नेंसाक्व" देंत।

18 तन्न मोसामी "एको रेयके लडाइ ग्राब आन रेयके ममाइ, ब्रुइब आन रेयके यो ममाइ। गो कुम्सो पशो नेंता" देंत।

19 मिनु मोसा इस्त्राएली आन बाक्तीके आ नेक्था जाक्मेनु, बाछा नु बाछा आ एर ओथ मुरपुकी सिल पशो तशा, शुश गाइशशा, फुल्लु निम्फा ताइशशा, डांडा आ पुंम प्रोल्तु।

20 मिनु मोसामी इस्राएली आन सेल्शो बाछा लाइशशा, मीम हुम्शा, तुप्शा फस सेल्शा, ब्वाक्कुम फुइशशा, इस्राएली आन कली तूपाइक्तीमी।

21 मिनु नोले मोसामी हारून कली “एको मुरपुकीमी इ कली मार पामे डा? मारदे मेको आन कली ओदेशो ठेयब पाप पपाइक्मी?” दे हिल्लो पाप्तु।

22 मिनु हारूनमी “आं पर्बम मगाइक्तीन। गे एको मुर आन कली तुइक्नीनी। एकोपुकी दूली पाइब ला बाक्नीम।

23 आं कली ‘आंइ डोंइडोंइती गाक्शा लां कोंइब देवता सेलो। मारदे हना आंइ कली इजीप्त रे गुंइशा, एक चाक्ब मोसा कली मार दुम्मे, मतुइक्तक’ देतेक्म।

24 मिनु गो मेको आन कली ‘सु सु इन के सुन बाक्मे, मेको पुइशशा, एक चाक्कीन’ दे माइक्तामी। मिनु मेकोपुकीमी चाक्तेक्म। मिनु गो मेको सुन मीम हुम्ताक्ड। मिनु एको बाछा दुम्त” देत।

### इस्राएली आन कली सजाइ

25 मोसामी मुर आन कली आन दला दाक्स पशो ताप्तु। मारदे हना हारूनमी आन दला दाक्स पचा गेवा बाक्त। मिनु आन जोरी सत्रु नेल्ल ग्येरसमा बाक्त।

26 मिनु मोसामी इस्राएली आन बाक्तीक ओव्रतीकेम राप्शा “सु सु परमप्रभु यावे गे बाक्नी, मेकोपुकी आं गे पिने” देत। मिनु लेवी आ थर डा मुर नेल्ल मोसा गे लशा, आ एर ओंथ राप्तेक्म।

27 मिनु मोसामी मेको आन कली “परमप्रभु यावे, इस्राएली आन परमप्रभुमी ‘गे नेल्लेमी इन तरवार पिप्शा, मुर आन बाक्तीके लशा, इन लोक्ब, इन खिं डा मुर, इन वारच नु सु बाक्तेक्म हना यो, सतीन’ देत” देत।

28 मिनु लेवी आ थर डा मुरपुकीमी मोसा आ देशो खोदेशो पा पाम्तेक्म। मेको नाक्ती हजार सां मुर साइक्चा पुंइसाक्म।

29 मिनु मोसामी लेवी आ थर डा मुर आन कली “गेपुकीमी मुलाक्ती परमप्रभु यावे आ गेय पा, आंम आंम इन तौ नु आंम आंम इन लोकब आन कली मप्रोंइथु साइक्तीनी। मिनु मुलाक्ती गे आसीक राइनीनी” देंत। प्रस्थान २६:४१; गन्ती ३:६-१०; ब्यवस्था ३३:८-११

### मोसामी परमप्रभु नु लोत्र पशो

30 आ दीसा मोसामी मुर आन कली “गेपुकीमी ठेयब पाप पाइतीनी। मिनु गो परमप्रभु यावे आ बाक्तीक डोइश्शा, लाइनुड। गो इन पशो पाप क्याम्तीक गेय पने चाप्नुडा, को?” देंत।

31 मिनु मोसा परमप्रभु यावे आ बाक्तीक लशा मेको कली “मुरपुकीमी थमा पा ठेयब पाप पाम्तेक्म। आंम कली सुन के देवता सेल्तेक्म।

32 मो हना यो गे मेको आन पाप क्याम्दीन, दे पुंइनुड। मक्याम्ताक्नी हना, इन ब्रेक्शो किताब रे आं नें क्याम्दीने” देंत। भजन संग्रह ६९:२९; लूका १०:२०; रोमी ९:३

33 मिनु परमप्रभु यावेमी मोसा कली “सुमी आं देशो मटिथु पाप पाइबा, मेको आ नें आं ब्रेक्शो किताब रे क्याम्नुड।

34 तन्न मुल लावो। मेको मुर आन कली आं देशो रागी लाइक्मी। नेनो, आं स्वर्ग डा गेय पाइब इ डोंइडोंइती सोइक्नुड। तन्न काबु मेको आन कली पाप पशो आ पर्बम सजाइ गेनुड” देंत। प्रस्थान ३३:२, १४; गन्ती १४:२७-३०

35 मिनु परमप्रभु यावेमी इस्राएल डा मुर आन कली बेक्तीक रोइ पपाइक्तु। मारदे हना मेकोपुकीमी हारून कली मेको सुन के बाछा सेल्पाइश्शो बाक्तेक्म।

## 33

### परमप्रभु आ शिशी पुंइशो

1 मिनु परमप्रभु यावेमी मोसा कली “इजीप्त रे ग्रुंडशा, एक चाक्शो मुरपुकी नु आं देशो रागी लावो। मेको रागी आ पबर्म गो ‘इ चच युइ आन कली गेनुड’ दे अब्राहाम, इसहाक नु याकूब नु कसम जाता। उत्पत्ती १२:७

2 आं स्वर्ग डा गेय पाइब इन डोंडोंइती सोइक्नुड। मिनु गो कनानी, एमोरी, हित्ती, परिज्जी, हिब्वी नु यबुसी आन कली खेरनुडमी। प्रस्थान २३:२०

3 मेको रागीम दूध नु खुदो शुश बाक्ब। मारेइ मारेइ यो शुश ग्रेल्ब। गेपुकी काइ मटीब मुर बाक्नीनी। मोपतीके गो गेपुकी नु मगाक्नुड। गो गाक्ती हना, इन कली लांमीन साइक्नन्नी” देंत।। प्रस्थान ३२:९-१०

4 मिनु मुरपुकीमी मेको मरिम्शो लोत्र नेंशा, सुर्ता पाम्तेक्म। सुइमी आन सुन चांदी मारेइ मपांडिसम।

5 मारदे हना परमप्रभु यावेमी मोसा कली “इस्त्राएली आन कली ‘गेपुकी काइ मटीब मुर बाक्नीनी। गो याम का गे नु गाक्ती हना, नेल्ल इन कली साइक्नन्नी। मुल इन सुन चांदी नेल्ल प्रुतीन। मिनु इन कली मार पचा माल्नुडा, दे मिम्नुड’ ” देशो बाक्त। योएल २:१३

6 मोपतीके होरेब डांडाम बाक्मा रे इस्त्राएलीपुकीमी सुन चांदी मपांडिसम।। योना ३:६

### परमप्रभु नु लोत्र पतीक ताम्बु

7 मिनु मोसामी अरु आन बाक्तीक क्येडा डोन ताम्बु का कीशा वोइक्तु। मेको ताम्बु कली परमप्रभु नु लोत्र पतीक ताम्बु देंत। सु सु परमप्रभु यावे कली ग्रुम्चा दाक्तमे, मेको मुर आन बाक्तीक रे ग्रूशा, मेको परमप्रभु नु लोत्र पतीक ताम्बु लाइबाक्तेक्म। प्रस्थान २९:४२

8 मिनु मोसा मेको परमप्रभु नु लोत्र पतीक ताम्बु लमेनु, मुर नेल्ल बोक्शा, आन ताम्बु आ ओव्रतीकेम राप्शा, मोसा मेको ताम्बु मओव्रम सम्म, कोव्रशा बाक्तेक्म।

9 मिनु मोसा मेको ताम्बु आगा ओव्रमेनु, गोस्स के थाम यिशा, ताम्बु आ ओव्रतीकेम राप्शो ताम्तेक्म। मिनु परमप्रभु यावेमी मोसा नु लोव्र पाप्तु। गन्ती ११:२५; ब्यवस्था ३१:१५

10 मुर नेल्लेमी मेको गोस्स के थाम, ताम्बु आ ओव्रतीकेम राप्शो ताम्तेक्म। मिनु मुर नेल्ल बोक्शा आंम आंम ताम्बु आ ओव्रतीकेमी बाप्शा, परमप्रभु कली मान पा ठेयब सेल्लेक्म।

11 मिनु परमप्रभु यावे नु मोसा कोव्रमुशा, लोव्र पाम्ताक्स। दोदेशो पा मुर आन वारच नु बाक्शा, लोव्र पाइनीमी, मोदेशो पा लोव्र पाम्ताक्स। मिनु मोसा लेशशा, आ ताम्बुम लत। आ गेय पाइब ठिटा, नून आ तौ यहोसु चहिं ताम्बु उइ बाक्त। प्रस्थान ३३:२०; गन्ती १२:८; ब्यवस्था ३४:१०

### मोसाम परमप्रभु कली पुंइशो

12 मिनु मोसामी परमप्रभु यावे कली “कोव्रडीन, गे आं कली ‘एको मुर आन कली लतो’ देंतीनी, तन्न गो नु सु सु सोइक्नीनी, गे आं कली मतुइक्पाइय्यीनी। मो हना यो, गे आं कली ‘इ नें कली तुइक्नुड। मिनु इ कली दाक्नुड’ देंतीनी। प्रस्थान ३३:२, ३, १७

13 मोपतीके गे आं कली दाक्ताक्नी हना, आं कली इन लां कोइदीने। गो इन कली तुइक्ने चबुल। गो इन डोंइती शिशी तडल। एको जात डा मुरपुकी इन मुर नम, दे मिम्तीने” देंत। भजन संग्रह १०३:७

14 मिनु परमप्रभुमी “गो गे नु लाइनुड। मिनु इ थुं नाइक्चा गेनुड” देंत। यसैया ६३:९; यहोसु २१:४४; हिब्रू ४:९

15 मिनु मोसामी “गे गो नु मलाइतीनी हना, आंइ कली एक रे मसोइक्तीन।

16 गो नु इन मुरपुकीमी इन डोंइती शिशी तशो बाक्नीकी, दे गो दोपा तुइक्नीकी? गे गो नु लाइतीनी हना ला, तुइक्नीकी। मोपा ला गो नु इन मुरपुकी रागी डा मुरपुकी नु खाल का डा मदुम्नीकी” देंत। ब्यवस्था ४:६-८

17 मिनु परमप्रभु यावेमी मोसा कली “गो इ देशो पाइनुड। मारदे हना गो इ कली दाक्नुड। मिनु इ नें यो तुइक्नुड” देंत। प्रस्थान ३३:१२; यसैया ४३:१; रतिमोथी २:१९

मोसामी परमप्रभु कली तचा दाक्शो

18 मिनु मोसामी “गे आं कली इन छेडछेड तपाइय्यीनी” दे पुंडतु। यूहन्ना १:१४; २कोरिन्थी ३:१८

19 मिनु मेकोमी “गो इ डोंइती रे लाइनुड, आं गेना हना यो दाक्तीक कोइनन। इ डोंइती आं नें ‘यावे, देना देंन गाक्नुड’ सु सु आन कली शिशी पचा दाक्डा, मेको आन कली शिशी पाइनुड। सु सु आन कली दाक्चा दाक्डा, मेको आन कली दाक्नुड” देंत। रोमी ९:१५

20 मिनु मोसा कली “गे आं कुल कोवने मचाप्नेवे। मारदे हना आं कुल तामेनु, मुर बेक्नीमी” देंत। प्रस्थान २४:११; उत्पत्ती ३२:३१; न्यायाधीस ६:२२-२३; न्यायाधीस १३:२२-२३; यसैया ६:५; यसैया ३३:१४; १तिमोथी ६:१६

21 मिनु लेंशा परमप्रभु यावेमी मोसा कली “कोव्रडो, आं बाक्तीकेम सेरथे फुल्लु का बाक्ब, गे मेको तार रपो। १राजा १९:८-१३

22 आं छेडछेड मेकेर रे लमेनु, गो इ कली मेको सेरथे फुल्लु आ काक्पेमी खुइश्शा वोइक्नन। गो मलाक्गु सम्म इ कली आं गुइमी सुमशा वोइक्नन। प्रस्थान ३४:५-६; प्रस्थान २४:११;

23 नोले आं गुइ क्युक्नुड। मिनु गे आं ची ताइनेवे। आं कुल चहिं मताइनेवे” देंत।

## 34

परमप्रभु आ अरेशो लेंशा ब्रेक्शो

1 मिनु परमप्रभु यावेमी मोसा कली “डोंइती डा खोदेशो पा फुल्लु निक्शी खोतो। गो मेको फुल्लुमी इ डोंइती प्रोल्लो फुल्लु डा लोव्र ब्रेक्नुड। प्रस्थान ३२:१९

2 सुनी कना बोक्शा, सीनै डांडा डोइश्शा, आं डोंइती जाक्को।

3 गे नु सुइ डांडा डोइक्चा मदुम्नीम। बी ब्यफ, क्यारश भेडा यो डांडा गे जोचा मदुम्नीम” दे माइक्तु। प्रस्थान १९:१२-१३

4 मिनु मोसामी परमप्रभु यावेमी देशो खोदेशो पा डोंइती डा खोदेशो फुल्लु निक्शी खोइक्तु। मिनु सुनी कना बोक्शा, फुल्लु कुरशा सीनै डांडा डोंइसाक्व।

5 मिनु परमप्रभु यावे गोस्स आगाम बाक्शा, तोइसाक्व। मिनु मोसा नु राप्शा आ नें देंना देंन गाक्त।

6 मिनु परमप्रभु यावे मोसा आ नेक्था गाक्ना गाक्न “यावे, यावे, शिशी पाइब नु दाक्ब परमप्रभु बाक्ब। रीब पा मगाइक्ब। गेना हना यो शिशी पाइब नु आ दाक्चा मप्रोंइब बाक्ब। प्रस्थान ३३:१८-२६; गन्ती १४:१८; भजन संग्रह १०३:८; नहुम १:३; १यूहन्ना ४:१६

7 मिनु हजार हजार आन पाला सम्म गेना हना यो दाक्ब। मुर आन ठीक मपशो, आन हेंथे पशो नु पाप पशो क्याम्ब। तन्न सजाइ मगेथु मप्रोंइब। आम आफ आन मरिम्शो पशो आन तमी तौ, चच, युइ नु युइ आन युइ सम्म सजाइ ताइनीम” देंत। प्रस्थान २०:५-६; ब्यवस्था ३२:९; भजन संग्रह २८:९

8 मिनु मोसामी गु बाप्शा सेउ पा ठेयब सेल्लु।

9 मिनु “आं परमप्रभु, इन डोंइती शिशी तशो बाक्ती हना, गे परमप्रभु, गो नु गाक्कीन, दे पुंइनुड। एको काइ मटीब मुर बाक्तेक्म हना यो, आंइ ठीक मपशो नु पाप क्याम्दीन। आंइ कली आंम इन मुर सेल्शा ब्रकी” देंत।

10 मिनु मेकोमी “नेनो, गो कबल का पाइनुड। इ मुर नेल्ल आन डोंइती छक लाक्चा डा गेय पाइनुड। गो मोदेशो गेय रागी रागी आन दातेमी गेनायो मपड। मिनु गे नु बाक्ब मुर नेल्लेमी परमप्रभु यावे आ



20 डोंइती जरमेशो गधा आ बोहोर आ पा डा पाठा का गेशा प्रोंइचा माल्नीनी। मो मपाइनीनी हना, आ शुर जिकशा, साइक्चा माल्नीनी। इन डोंइती जरमेशो तौ आ पा डा क्येट गेशा प्रोंइचा माल्नीनी। आं डोंइती सुइ श्येत्थ गुइ मजाक्कीन। प्रस्थान १३:१२-१६

21 मिनु ६ नाक्त इन गेय नेल्ल पचा माल्नीनी। ७ नाक्त चहिं नाइक्चा माल्नीनी। ब्यफ वाक्ची नु बाली नाली रुप्ची ना यो नाइक्चा माल्नीनी।

22 गेपुकीमी हप्ता डा चाड मानेचा माल्नीनी। मेको डोंइती मीशो चेरब आ चाड बाक्ब। बाली नाली रुप्शा ओंइतीक डा चाड यो मानेचा माल्नीनी। मेको बर्स नुप्ची ना डा चाड बाक्ब। लेवी २३:१५-१६; ब्यवस्था १६:९-१०

23 इस्राएल डा वोंइश मुर नु वोंइश आल नेल्ल बर्सम खेयप सां परमप्रभु आ डोंइती, परमप्रभु यावे, इस्राएली आन परमप्रभु आ डोंइती जाक्चा माल्नीम।

24 गो रागी रागी डा मुर आन कली इन डोंइती रे खेरशा, इन बाक्तीक रागी बारपाइक्नुड। बर्सम खेयप सां परमप्रभु यावे इन परमप्रभु आ डोंइती जाक्कीन। मिनु सुइम इन रागी तशा मवाल्नीम।

25 आं कली चढेतीक हुश बोरब ओख्ती सुप्शो शोब्ले नु मचढेन। पास्सा चाड डा चढेशो श्ये सुनी सम्म मारेइ महेंचा।

26 इन रू डा डोंइती मीशो नेल्ल क्येडा रिम्शो थोत्रक परमप्रभु यावे, इन परमप्रभु आ खिंम चाक्चा माल्नीनी। क्यारश आ पाठा आ ममा आ दूधमी लोप्शा क्येचा मदुम्ब” दे मोसा कली देंत। प्रस्थान २३:१९

27 मिनु परमप्रभु यावेमी मोसा कली “गो, गे नु इस्राएली नेल्ल नु एको अरेशो लोत्र पा कबल पाता, मोपतीके ब्रेकतो” देंत। प्रस्थान २४:४

28 मिनु मोसा परमप्रभु यावे नु ४० नाक्दो नाक्ती बाक्त। मारेइ मजवो। ब्वाक्कु यो मतूड। मिनु कबल डा १० ओटा अरेशो लोत्र फुल्लुम ब्रेकताक्व। प्रस्थान २४:१८; मत्ती ४:२; प्रस्थान ३१:१८

### मोसा आ कुल छेडछेड दुम्शो

29 मिनु नोले मोसा मेको परमप्रभु यावे आ कबल डा लोत्र ब्रेकशो फुल्लु निक्शी कुरशा, सीनै डांडा रे तोंइसाक्व। मोसा परमप्रभु यावे नु लोत्र पतीके आ कुल परमप्रभु आ छेडछेडम छेडछेड दुम्शो बाक्ब, दे मतुइक्त।

30 मिनु हारून नु इस्राएली नेल्लेमी मोसा कली तामेनु, आ कुल छेडछेड दुम्शो ताम्तेक्म। मिनु आ नेक्था लचा हितेक्म। २कोरिन्थी ३:७-१८

31 मिनु मोसामी मेको आन कली ब्रेत्तीमीनु, हारून नु ठेयब मुर नेल्ल आ नेक्था जाक्तेक्म। मिनु मेकोपुकी नु लोत्र पाप्तु।

32 मिनु नोले इस्राएलीपुकी यो मोसा आ नेक्था जाक्तेक्म। सीनै डांडाम परमप्रभु यावेमी आ कली मार मार मदा, मेको नेल्ल आन कली अरेम्तीमी।

33 मोसामी मेकोपुकी नु लोत्र पने थुम्शा, आ कुल वामी सुम्साक्व।

34 मोसा परमप्रभु यावे नु लोत्र पथ आ डोंइती लमेनु, लाडगा मग्रूम सम्म आ कुल हुक्साक्व। मिनु नोले गूशा, आ कुल सुम्सीशा मेको लोत्र इस्राएली आन कली नेंपाइक्तीमी। प्रस्थान ३३:८-९

35 इस्राएलीमी मोसा आ कुल छेडछेड दुम्शो ततीके, मोसामी परमप्रभु यावे नु लोत्र पथ, आगा मओत्रम सम्म आ कुल सुम्साक्व।

## 35

### नाइक्तीक नाक्त आ पर्वम अरेशो

प्रस्थान ३१:१२-१७

1 मोसामी इस्राएली नेल्ल आन कली ब्रेशशा “परमप्रभु यावेमी शेंशो इन पचा माल्शो गेय, मार मार बाक्ब देंशा हना,

2 गे ६ नाक्त सम्म गेय पने। ७ नाक्ती चहिं परमप्रभु यावे आ नाक्त दुम्तीके, मेको नाक्ती नाइक्तीक नाक्त बाक्ब। सु सुमी मेको

नाक्ती गेय पाइनीमी, मेको साइक्चा पुंडसीनीम। प्रस्थान २०:८-११;  
प्रस्थान ३४:२१

3 नाइक्तीक नाक्ती इन खिं नेल्लेमी मी मुइक्चा यो मदुम्ब” दे  
माइक्तीमी।

ताम्बु सेल्चा कली मार मार पोक्शो

प्रस्थान २५:३-९; प्रस्थान ३१:७-११

4 मिनु नोले मोसामी इस्त्राएली आन कली “परमप्रभु यावे आ शेंशो  
लोत्र मार बाक्ब, देशा हना

5 ‘परमप्रभु यावे कली गुम्तीक ताम्बु सेल्चा कली चढेतीक मार  
मार पोक्चा माल्नीनी। सु सुम ग्येरशा गेनीनी, मेकोमी परमप्रभु यावे  
कली मार चाक्चा माल्नीनी देशा हना, सुन, चांदी, कांसा, प्रस्थान  
२५:२

6 नीलो, प्याजी नु लल श्येले नु रिम्शो पा किरशो सुती श्येले के  
प्रोत्रशो वा नु क्यारश आ चां,

7 लल रड नुप्शो बोका आ कुशुल, नेल्ल क्येडा रिम्शो कुशुल नु  
बोल्यो शी,

8 बत्ती दाचा कली तेल, लुक्तीक तेल कली ब्वाइक्तीक नु धूप  
कली ब्वाइक्तीक,

9 निसाफ पतीके ऊरीम नु थुम्मीम वोइक्तीक झोला नु कुचु तार  
वोइक्तीक सेल्चा कली ओनीक्स माइश्शो हीरा नु अरु हीरा चाक्चा  
माल्नीनी” ” देंत।

10 मिनु मोसामी “इन दातेम सु सु जोक्ब बाक्नी, मेको नेल्ल  
जाक्शा, परमप्रभु यावे आ देशो थोत्रक नेल्ल सेल्चा माल्नीनी।

11 गुम्तीक ताम्बु नु ताम्बु कली सुम्तीक, ग्याइक्पाइक्तीकपुकी,  
फलेक नु लाइश्शो कोक्केपुकी, थामपुकी नु राप्पाइक्तीकपुकी,

12 कबल पशो सन्दोस नु आ कुरतीक कोक्के निक्शी, सन्दोस  
आ सुम्तीके, फारतीके,

13 टेबल नु आ कुरतीक कोक्के, ग्योंब नेल्ल नु कोइतीक शोब्ले,

14 बत्ती दातीक नु मेको आ दियारीपुकी, बत्ती कली ठीक सेल्टीक थोव्रक नु बत्ती कली तेल,

15 धूप चोशा चढ़ेतीके नु मेको आ कुरतीक कोक्के, लुक्चा कली तेल नु ब्रोव्रशो रिना पाइश्शो धूप, ताम्बु ओव्रतीक डा फारतीक वा,

16 चोशा चढ़ेतीके नु आ एर ओंथ डा कांसा के थरपु, कुरतीक कोक्के नु आ मार मार, चिक्तीक ठेयब बोस नु मेको आ निप्पाइक्तीके,

17 ताम्बु आ लाडगा डा फारतीक वा, आ थामपुकी नु मेको आन राप्पाइक्तीकपुकी, ओव्रतीक डा फारतीक वा,

18 ताम्बु आ किला नु लाडगा थरपु डा किलापुकी नु डोरीपुकी,

19 नु हारून नु आ तौ परमप्रभु कली चढ़ेब दुम्चा कली फेक्तीक वासी सेल्चा माल्नीनी” दे मुर आन कली माइक्तीमी।

### ताम्बु कली मार मार चाक्शो

20 मिनु नोले इस्राएली नेल्ल मोसा आ डोंइती रे लाम्तेक्म।

21 सु सु आन थुंमी “गो चाक्नुड” देंमा, मेकोपुकीमी गुम्तीक ताम्बु सेल्चा कली नु मेकेर डा गेय पचा कली मार मार थोव्रक नु फेक्तीक वा कली मार मार माल्दा, मेको परमप्रभु यावे कली गेचा, दे चाक्तेक्म। १इतिहास २९:५-९; २कोरिन्थी ९:७

22 मीश मुर, वोंइश मुर नेल्लेमी मार मार चाक्तेक्म देंशा हना, मुन्द्री, मारवाडी, औंठी, सुन के चुरा नु अरु सुन के थोव्रकपुकी परमप्रभु यावे कली चाक्तेक्म।

23 सु सु नु नीलो, प्याजी नु लल श्येले नु रिम्शो पा किरशो सुती श्येले के प्रोव्रशो वा, क्यारश आ चां, लल रड नुप्शो सांड आन कुशुल, नेल्ल क्येडा रिम्शो सेल्शो कुशुल बाक्मे, मेको चाक्तेक्म।

24 सु सु आन के चांदी नु कांसा बाक्मे, मेकोमी परमप्रभु यावे कली चाक्तेक्म। सु सु नु गेय पचा कली ठीक पशो बोल्यो शी बाक्मे, मेको चाक्तेक्म।



देंशा हना, दारशो मार मार गेय पाइब, मिम्शा ब्रेक्स ब्रेक्शा, नीलो प्याजी नु लल श्येले बुटा प्रोव्रचा नु रिम्शो पा किरशो सुती श्येले के प्रोव्रशो वामी बुटा आप्चा कली जोक्ब तुइक्ब सेल्शो बाक्ब।

## 36

परमप्रभु आ बाक्तीक सेल्चशो  
प्रस्थान २६:-

1 मिनु परमप्रभु यावेमी बेचालेल, ओहोली-आब नु अरु आन कली आ बाक्तीक सेल्चा, दे जोक्ब तुइक्ब नु रुप्तीक थुं गेशो मुर नेल्लेमी, परमप्रभु यावेमी देंशो खोदेंशो पा गेय पचा माल्नीम” दे मोसामी इस्त्राएली आन कली देंत।

2 मिनु मोसामी, बेचालेल, ओहोली-आब नु परमप्रभुमी जोक्ब तुइक्ब सेल्शो मुर नेल्ल आन कली ब्रेत्ताक्नमी। सु सु आन थुंमी “गो यो मेको गेय पाइनुड” दे मिम्शो बाक्मा, मेको आन कली यो ब्रेत्ताक्नमी।

3 इस्त्राएलीपुकीमी परमप्रभु यावे आ बाक्तीक सेल्चा कली मार मार चाक्शो बाक्मा, आन थुंमी ग्येरशा गेशो नेल्ल मोसा आ गुइ रे ताक्तेक्म। मेना सम्म मुरपुकीमी सुनी कुस कुस मार मार चाक्स डा चाक्स बाक्तेक्म।

4 मिनु परमप्रभु यावे आ बाक्तीक सेल्ब जोक्ब तुइक्बपुकीमी आन गेय प्रोंइशा, मोसा आ बाक्तीक जाक्तेक्म।

5 मिनु मेकोपुकीमी मोसा कली “परमप्रभु यावेमी अरेशो सेल्चा कली माल्शो क्येडा यो शुश चाक्ना चाक्न बाक्नीम” देंतेक्म।

6 मिनु मोसामी “मुल रे परमप्रभु यावे आ बाक्तीक डा गेय कली सुइम मारेइ मचाक्कीन” दे मुर आन बाक्तीक बाक्तीकेमी नेंपाइक्थ मुर सोइक्ताक्मी। मोपा मारेइ मचाक्कीन, दे आन चाक्चा नाइक्पाइक्तेक्म।

7 मारदे हना आन चाक्शो मारेइ मारेइ गाप्शा, शुश दुम्शो बाक्त।

ताम्बु सेल्तीक गेय

8 मिनु जोक्ब गेय पाइब नेल्लेमी परमप्रभु यावे आ बाक्तीक कली १० ओटा सुम्तीक वा सेल्लेक्म। रिम्शो पा किरशो सुती श्येले के प्रोत्रशो वा के नु नीलो, प्याजी नु लल रड डा श्येलेमी शुश रिम्शो करूबपुकी बुटा आप्शा सेल्लेक्म।

9 मेको सुम्तीक वा का का पा २८ कुबीत दुइशो नु ४ कुबीत ब्रेम्शो, खाल का डा पा सेल्लेक्म। कुबीत का ०.५ मिटर खोदेशो बाक्ब।

10 मेकोपुकीमी ५ ओटा सुम्तीक वा बोइशशा, का सेल्लेक्म। मिनु अर्को ५ ओटा बोइशशा, अर्को का सेल्लेक्म।

11 सुम्तीक वा का आ एर सुर गे नीलो रड डा ५० ओटा बोइक्तीके सेल्लेक्म। अर्को सुम्तीक वा के यो ओथ सुर गे ५० ओटा नीलो बोइक्तीक सेल्लेक्म।

12 सुम्तीक वा कामी ५० ओटा बोइक्तीके नु अर्को सुम्तीक वा कली यो ५० ओटा बोइक्तीके सेल्शा, निक्शी कली का सेल्चा कली ठीक पा वोइक्तेक्म।

13 मिनु मेकोपुकीमी ५० ओटा सुन के ग्याइक्पाइक्तीके सेल्शा, डोंइती डा नु नोले डा सुम्तीक वा आस कली बोइशशा, का सेल्लेक्म।

14 परमप्रभु यावे आ बाक्तीक साप्चा कली यो क्यारश आ चां के ११ ओटा सुम्तीके सेल्लेक्म।

15 मेको सुम्तीके का का पा ३० कुबीत लाइशो नु ४ कुबीत ब्रेम्शो खाल का डा पा सेल्लेक्म। कुबीत का ०.५ मिटर खोदेशो बाक्ब।

16 मेकोपुकीमी का सेल्चा कली ५ ओटा सुम्तीके बोइशशा का नु ६ ओटा सुम्तीके बोइशशा अर्को का सेल्लेक्म।

17 डोंइती डा सुम्तीके आ एर सुर गे ५० ओटा बोइक्तीक सेल्लेक्म। मिनु अर्को सुम्तीके आ ओथ सुर गे यो ५० ओटा बोइक्तीक सेल्लेक्म।

18 मिनु ताम्बु सुम्तीके का सेल्चा कली कांसा के ५० ओटा

ग्याइक्पाइक्तीक सेल्लेक्म।

19 मेकोपुकीमी ताम्बु सुम्चा कली लल रड नुप्शो सांड आ कुशुल के सुम्तीक का सेल्लेक्म। मेको आ तारी नेल्ल क्येडा रिम्शो सेल्लो कुशुल के अर्को सुम्तीक का सेल्लेक्म।

20 मिनु नोले मेकोपुकीमी परमप्रभु यावे आ बाक्तीक सेल्ल्या कली बोल्यो शी के फलेक सेल्ल्या, थारतेक्म।

21 फलेक का का पा १० कुबीत लाइशो नु कुबीत का आधा ब्रेम्शो सेल्लेक्म। कुबीत का ०.५ मिटर, हात का खोदेशो बाक्ब।

22 फलेक का कामी, राप्पाइक्चा कली किला निक्शी गारपाइशशा, सेल्लेक्म।। परमप्रभु यावे आ बाक्तीक सेल्ल्या कली फलेक नेल्ल मोदेशो पा सेल्लेक्म।

23 मिनु बाक्तीके आ दक्खिन गे कली २० ओटा फलेक सेल्लेक्म।

24 मिनु मेको २० ओटा फलेक आन पुं गे, ४० ओटा चांदी के राप्पाइक्तीके, फलेक का कली राप्पाइक्तीके निक्शी सेल्लेक्म।

25 उत्तर गे कली २० ओटा फलेक सेल्लेक्म।

26 मेको आन कली ४० ओटा चांदी के राप्पाइक्तीके, फलेक का कली राप्पाइक्तीके निक्शी सेल्लेक्म।

27 बाक्तीके आ पच्छिम गे कली ६ ओटा फलेक सेल्लेक्म।

28 पच्छिम डा सुर निक्शी कली, फलेक निक्शी सेल्लेक्म।

29 मेकोपुकीम उइ रे ममाइ, इर गे मुन्द्रामी ग्याइक्पाइक्तेक्म।

30 मोपा मेको नेल्ल ८ ओटा फलेक दुम्तेक्म। मिनु १६ ओटा चांदी के राप्पाइक्तीके, फलेक का कली राप्पाइक्तीक निक्शी दुम्त। प्रस्थान २६:-

31 बोल्यो शी के लाइशो कोक्के सेल्लेक्म। परमप्रभु यावे आ बाक्तीक का पटटी कली फलेक ग्याइक्पाइक्चा कली ५ ओटा लाइशो कोक्के सेल्लेक्म।

32 अर्को पटटी कली यो फलेक ग्याइक्पाइक्चा कली ५ ओटा लाइशो कोक्के सेल्लेक्म। आ नोले पच्छिम गे कली ५ ओटा लाइशो कोक्के सेल्लेक्म।

33 मिनु फलेक ग्येत्थ आ दातेमी सुर कारे अर्को सुर सम्म कली लाइशो कोक्के सेल्लेक्म।

34 मिनु फलेक नु लाइशो कोक्के आन कली सुनम गिल्लेक्म। मिनु लाइशो कोक्के शुइक्चा कली सुन के मुन्द्रापुकी सेल्लेक्म।

35 मिनु नीलो, प्याजी नु लल श्येले नु रिम्शो पा किरशो सुती श्येले के प्रोव्रशो वा के नेल्ल क्येडा चोव्रखो कोठा फारतीक का सेल्शा, रिम्शो पा करूब बुटा आप्तेक्म।

36 मेकोमी मेको फारतीक कली बोल्यो शी के ४ ओटा थाम सेल्शा, सुनम गिल्लेक्म। मेको आन ग्याइक्तीके सुन के सेल्लेक्म। मेको आन कली ४ ओटा चांदी के राप्पाइक्तीके सेल्लेक्म।

37 मिनु नीलो, प्याजी नु लल श्येले नु रिम्शो पा किरशो सुती श्येले के प्रोव्रशो वा दारशो बुटा आप्शो ताम्बु आ ओव्रतीके कली फारतीक का सेल्लेक्म।

38 मेको फारतीक ब्वेक्चा कली ५ ओटा थाम सेल्लेक्म। मेको आन पिया, ब्वेक्तीक नु हाम्तीक कोक्के सुनम गिल्लेक्म। मेको ५ ओटा थाम आन राप्पाइक्तीके चहिं कांसा के सेल्लेक्म।

## 37

कबल पशो सन्दोस सेल्शो  
प्रस्थान २५:१०-२२

1 मिनु बेचालेलमी बोल्यो शी के सन्दोस का सेल्लु। मेको आ लाइशो कुबीत निक्शी नु आधा, आ ब्रेम्शो कुबीत का नु आधा नु आ ग्येत्थ लाइशो कुबीत का नु आधा डा पा सेल्लु। कुबीत का ०.५ मिटर, हात का खोदेशो बाक्ब।

2 मिनु मेको आ खिंडगा नु आ लाडगा नेल्ल क्येख सुनमी गिल्लु। मिनु एर ओंथ नेल्ल सुन के सुर सेल्लु।

3 मिनु सुन के ४ ओटा मुन्द्रा सेल्लु। का पटटी निक्शी नु अर्को पटटी निक्शी पा सन्दोस आ ४ सुरमी क्येप्ताक्व।

4 मिनु बोल्यो शी के कुरतीक कोक्के निक्शी सेल्शा, सुनमी गिल्लु।

5 मिनु मेको कुरतीक कोक्के निक्शी मुन्द्रामी शुइश्शा, सन्दोस कुरने चाप्तेक्म।

### सन्दोस सुम्तीक सेल्शो

6 मिनु मेकोमी क्येख सुन के चेम्शा, सन्दोस सुम्तीके सेल्लु। मेको आ पित्थ लाइश्शो कुबीत निक्शी नु आधा नु आ ब्रेम्शो कुबीत का नु आधा सेल्लु। कुबीत का ०.५ मिटर, हात का खोदेशो बाक्ब।

7 मिनु परमप्रभु यावे आ स्वर्ग डा गेय पाइब खोदेशो सुन के करूब निक्शी चेम्शा सेल्लु। मेको सुम्तीके आ निम्फा पटटी डा का का चेम्शा सेल्लु।

8 का पटटी करूब का, अर्को पटटी करूब का चेम्शा सेला बाक्त। मेको सुम्तीके नु करूब निम्फा मख्वाइसीशो सुन का रेन चेम्शा सेल्लु।

9 करूब आस फ्रां हाम्शा, सुम्तीके फारपाइश्शा, खाल का डा पा सन्दोस सुम्तीके गे कोव्रपाइश्शा चेम्शा सेल्लु।

### शोब्ले वोइक्तीक टेबल सेल्शो प्रस्थान २५:२३-३०

10 बोल्यो शी के टेबल का सेल्लु। मेको आ पित्थ लाइश्शो कुबीत निक्शी नु आ ब्रेम्शो कुबीत का नु आ ग्येत्य लाइश्शो कुबीत का नु आधा डा पा सेल्लु। कुबीत का ०.५ मिटर खोदेशो बाक्ब।

11 मिनु मेको कली क्येख सुनमी गिल्शा, आ एर ओंथ नेल्ल सिरपेच खोदेशो पा सुन के सुर सेल्लु।

12 मेको आ एर ओंथ डा सुर नेल्ल ४ गुइ ब्रेम्शो सेल्शा, सिरपेच खोदेशो पा बुटा आप्शा सेल्लु। गुइ का ८ सेन्ती मिटर कि ३ आइची खोदेशो बाक्ब।

13 मिनु ४ ओटा सुन के मुन्द्रा चेम्शा, मेको आ ४ ओटा खोइलीम टेबल आगाम क्येप्ताक्व।

14 टेबल कुरचा कली मुन्द्रापुकी टेबल आ सुर आ नेक्था क्येप्ताक्व।

15 मिनु टेबल कुरचा कली बोल्यो शी के कुरतीक कोक्के सेल्शा, सुनमी गिल्तु।

16 मिनु टेबलम वोइक्चा माल्शो थाल, लोटा नु बोस नेल्ल नु तूचा थोत्रक चढ़ेतीक लुक्चा कली लोटा नेल्ल क्येख सुन के सेल्लु।

सुन के बत्ती दातीक सेल्शो

प्रस्थान २५:३१-४०

17 मेकोमी क्येख सुन के बत्ती दातीक का चेम्शा सेल्लु। आ थाम, आ राशी, आ दियारी, आ डल्ला नु फूपुकी ठेयब सुन का केन सेल्लु।

18 मिनु मेको बत्ती दातीक आ थाम रे ६ ओटा राशी गुंडशा, का पटटी रे सां नु अर्को पटटी रे सां राशी चेम्शा सेल्लु।

19 मिनु मेको राशी कामी देसी बदाम आ फू खोदेशो फू सां नु डल्ला सां रे गुंडशो सेल्लु। अर्को राशीपुकी यो नेल्ल मोदेशो पा सेल्लु।

20 मेको बत्ती दातीक आ थामम चहिं ४ ओटा देसी बदाम आ फू खोदेशो आन डल्ला रे गूशो सेल्लु।

21 थाम आ डोंइती डा डल्ला रे, आ दाते डा डल्ला रे नु नोले डा डल्ला रे निम्फा पटटी गे राशी निक्निक्शी गूशो सेल्लु।

22 मेको आ राशी नु डल्ला नेल्ल ठेयब क्येख सुन का केन चेम्शा सेल्लु।

23 बत्ती दातीक ७ ओटा दियारी, आ कांइची नु आइक्च बोस नेल्ल क्येख सुन के चेम्शा सेल्लु।

24 मेको नेल्ल टलेन्ट का क्येख सुन के चेम्शा सेल्लु।

धूप चोशा चढ़ेतीक सेल्शो

प्रस्थान ३०:१-५, २२-३८

25 धूप चोशा चढ़ेतीके बोल्यो शी के कुबीत का लाइशो नु कुबीत का ब्रेम्शो ४ पाटे पा सेल्लु। आ ग्येत्थ लाइशो कुबीत

निक्शी डा सेल्लु। मेको नु मेको आ ग्रोव्र नेल्ल मख्रोंइसीशो शी का केन सेल्लु। कुबीत का ०.५ मिटर, हात का खोदेशो बाक्ब।

26 मिनु मेको नेल्ल क्येख सुनमी गिल्शा, सिरपेच के खोदेशो पा सुन के सुर सेल्लु।

27 मेको आ सुर आगा निम्फा पटटी कली सुन के मुन्द्रा निक्निक्शी सेल्शा, आ सिरपेच खोदेशो सुर आ दी निम्फा पटटी गे क्येप्ताक्व। मिनु मेको कुरतीक कोक्के शुइक्तीक दुम्त

28 मिनु मेको कुरचा कली बोल्यो शी के कुरतीक कोक्के निक्शी सेल्शा, सुनम गिल्लु।

29 मिनु मेकोमी ताम्बु डा लुक्तीक तेल नु ब्रोव्रशो रिना पाइब धूप जोक्ब मुरुम सेल्शो खोदेशो पा सेल्लु।

## 38

चोशा चढेतीके सेल्शो

प्रस्थान २७:१-८; प्रस्थान ३०:१८-२१

1 मिनु बेचालेलमी बोल्यो शी के चोशा चढेतीके सेल्लु। मेको ५ कुबीत लाइशो नु ५ कुबीत ब्रेम्शो, ४ पाटे नु कुबीत सां ग्येत्थ लाइशो पा सेल्लु।

2 आ ४ सुरमी ग्रोव्र सेल्लु। मेको ग्रोव्रपुकी मेको चढेतीक फलेक का केन सेल्शा, कांसामी गिल्लु।

3 चढेतीके कली माल्शो मारेइ मारेइ कांसा के सेल्लु। पुलु वोइक्तीक बोसपुकी, पुलु ताप्तीकपुकी, ब्रुइक्तीक बोसपुकी, श्ये गुंडतीक कांटापुकी नु मी कोइला कुर पतीकपुकी सेल्लु।

4 चोशा चढेतीक कली कुबीत का नु आधा डा पा ग्येत्थ पा मी तिकतीक कांसा के जाली सेल्लु। कुबीत का ०.५ मिटर, हात का खोदेशो बाक्ब।

5 कुरतीक कोक्के शुइक्चा कली, ४ ओटा मुन्द्रा सेल्शा, आ ४ सुरमी क्येप्ताक्व।

- 6 बोल्यो शी के कुरतीक कोक्के निक्शी सेल्शा, कांसामी गिल्तु।  
 7 चढ़ेतीक कुरचा कली मेको कोक्के मुन्द्राम शुइक्ताक्व।  
 फलेक के सेल्शो चोशा चढ़ेतीके आगाम श्येत्थ बाक्शो बाक्त।

चिक्तीके ठेयब बोस सेल्शो

- 8 बेचालेलमी कांसा के चिक्तीक ठेयब बोस नु आ निप्पाइक्तीके सेल्लु। मेको गुम्तीक ताम्बु ओव्रतीकेम गेय पाइब मीश मु्र आन कांसा के ऐना के सेल्लु।

ताम्बु आ लाडगा

प्रस्थान २७:९-१९

- 9 मिनु बेचालेलमी ताम्बु आ लाडगा थरपु हिरचा कली रिम्शो पा किरशो सुती श्येले के वा प्रोव्रपाइक्तु। मेको फारतीक दक्खिन गे सहे का कुबीत लाइशो पा सेल्लु। कुबीत का ०.५ मिटर खोदेंशो बाक्ब।

- 10 मेको फारतीक ग्याइक्पाइक्चा कली खाल का डा थाम नु खाल का डा कांसा के राप्पाइक्तीके के सेल्लु। मुन्द्रापुकी नु कोक्केपुकी चहिं चांदी के सेल्लु।

- 11 मिनु मोदेंशो पा उत्तर गे यो सहे का कुबीत लाइशो फारतीक प्रोव्रपाइक्तु। मेको कली २० ओटा थाम, २० ओटा कांसा के राप्पाइक्तीके सेल्लु। मुन्द्रापुकी नु कोक्केपुकी चहिं चांदी के सेल्लु। सहे का कुबीत ५० मिटर बाक्ब।

- 12 पच्छिम गे ५० कुबीत डा फारतीक सेल्लु। मेको कली १० ओटा थाम नु १० ओटा राप्पाइक्तीके सेल्लु। आन मुन्द्रा नु कोक्केपुकी चहिं चांदी के सेल्लु।

- 13 मिनु लाडगा आ डोंइती पूर्व गे कली ५० कुबीत डा फारतीक वा सेल्लु।

- 14 ओव्रतीके पटटी का कली १५ कुबीत डा फारतीक वा सेल्लु। थाम नु राप्पाइक्तीके सां सां सेल्लु।

15 मिनु ओव्रतीके डा अर्को पटटी कली यो १५ कुबीत डा फारतीक वा सेल्लु। थाम नु राप्पाइक्तीके सां सां सेल्लु।

16 लाडगा डा एर ओंथ नेल्ल डा फारतीक रिम्शो पा किरशो सुती श्येले के प्रोव्रशो वा के सेल्लु।

17 मेको थाम आन राप्पाइक्तीक कांसा के बाक्तेक्म। थाम आन मुन्द्रा नु कोक्केपुकी चहिं चांदी के बाक्तेक्म। थाम आन पिया चांदीम गिलशो बाक्तेक्म। थाम आन फ्रेंतीके नेल्ल चांदी के बाक्तेक्म।

18 मेको लाडगा डा ओव्रतीके डा फारतीक नीलो, प्याजी नु लल श्येले नु रिम्शो पा किरशो सुती श्येले के प्रोव्रशो वाम दारशो बुटा आप्शा सेल्लु। मेको आ लाइशो २० कुबीत नु आ ग्येत्थ ५ कुबीत डा पा अर्को फारतीक नु उइक्थ उइक्थ पा सेल्लु। कुबीत का ०.५ मिटर, हात का खोदेंशो बाक्ब।

19 मिनु ओव्रतीक डा ४ ओटा थाम नु आन ४ ओटा राप्पाइक्तीके कांसा के बाक्तेक्म। मेको फारतीक कली ब्वेक्तीक, थाम आन पिया नु फ्रेंतीके चांदी के बाक्तेक्म।

20 मिनु परमप्रभु यावे आ बाक्तीके नु लाडगा डा किला नेल्ल कांसा के बाक्तेक्म।

### सुन चांदी नु कांसा नाक्शो

21 परमप्रभु यावे आ बाक्तीक सेल्चा कली मार मार माल्दा, मेको ब्रेक्शो बाक्त। मेको बाक्तीके कबल पशो सन्दोस चोइक्तीके बाक्त। मोसामी “मेको नेल्ल ब्रेक्चा माल्ब” दे अरेशो बाक्त। चढेब हारून आ तौ इथामार लेवी आन कली गेय पपाइक्ब बाक्त। गन्ती ४:२८

22 परमप्रभु यावेमी मोसा कली शेंशो खोदेंशो पा, यहूदा आ थर डा हुर आ चच, ऊरी आ तौ बेचालेलमी मारेइ मारेइ सेल्लु। प्रस्थान ३१:१-११

23 मेको नु दान आ थर डा अहीसामाक आ तौ ओहोली-आब यो बाक्त। मेको मार मार मुशा सेल्लिक गेय जोक्ब, ब्रेक्स ब्रेक्शा

सेल्चा जोक्ब नु नीलो, प्याजी नु लल रड डा रिम्शो पा किरशो सुती श्येलेम दारशो बुटा आप्तीक गेय यो जोक्ब बाक्त।

24 परमप्रभु यावे आ बाक्तीक नु मेकेर माल्शो मारेइ मारेइ सेल्चा कली मुर आन गेशो सुन गिश दुम्माक्त देंशा हना, २९ टलेन्ट नु ७ सहे ३० शेकेल दुम्त। नेल्ल नाक्शा, हजार का किलो खोदेंशो दुम्त। टलेन्ट का ३४ किलो बाक्ब। शेकेल का ११.५ ग्राम, तोला का खोदेंशो बाक्ब।

25 डोंइती हिक्शो वोंइश मुर आन रे पोक्शो चांदी सहे का टलेन्ट नु हजार का ७ सहे ७५ शेकेल दुम्त।

26 मिनु २० बर्स गाप्शो नु मेको क्येडा लाक्शो वोंइश मुर ६ लाख हजार सां ५ सहे ५० जना बाक्तेक्म। मेको आन के का का पा आधा आधा शेकेल पोक्तेक्म। प्रस्थान ३०:१२-१६; गन्ती १:४६

27 ताम्बु आन फलेक राप्पाइक्तीक नु नेल्ल क्येडा चोव्रखो कोठा कली फारतीक डा थाम आन राप्पाइक्तीक कली सहे का टलेन्ट माल्ताक्व। सहे का राप्पाइक्तीके कली सहे का टलेन्ट माल्ताक्व। का कली टलेन्ट का माल्ताक्व।

28 मेको हजार का ७ सहे ७५ शेकेल चांदीमी ब्वेक्तीक सेल्शा, थाम आन पिया गिल्तीक नु आन फ्रेंतीकपुकी सेल्लेक्म।

29 मुर आन चाक्शो कांसा ७० टलेन्ट नु हजार निक्शी ४ सहे शेकेल दुम्शो बाक्त।

30 मेको के गुम्तीक ताम्बु डा ओव्रतीके डा थाम आन राप्पाइक्तीके, कांसा के चोशा चढ़ेतीके, आ मी तिक्तीक जाली नु चढ़ेतीक आ मारेइ मारेइ सेल्पाइक्तु।

31 मिनु लाडगा डा थाम आन राप्पाइक्तीकपुकी, ठेयब ओव्रतीके डा थाम आन राप्पाइक्तीकपुकी, ताम्बु नु लाडगा डा किला नेल्ल सेल्पाइक्तु।

चढेब आन वा सेल्शो  
प्रस्थान २८:-

1 परमप्रभु यावेमी मोसा कली दोपा अरेवा, मोपा बेचालेल नु आ मुरपुकीमी हारून कली परमप्रभु यावे आ बाक्तीकेमी गेय पचा कली नीलो प्याजी नु लल रड डा श्येले के प्रोव्रशो फेक्तीक वा सेल्तेक्म।

चढेब आ कुचु तार वोइक्तीके

2 मेकोमी कुचु तार वोइक्तीके सुन के, नीलो, प्याजी नु लल रड डा श्येले नु रिम्शो पा किरशो सुती श्येले के प्रोव्रशो वा के सेल्तेक्म।

3 मिनु सुन तुप्शा, पात्लो सेल्शा, आइक्च पा खोइश्शा, श्येले खोदेशो सेल्तेक्म। मिनु नीलो, प्याजी नु लल श्येलेमी रिम्शो पा किरशो सुती श्येले के प्रोव्रशो वा दारशो बुटा आप्शा सेल्तेक्म।

4 मेको कुचु तार वोइक्तीकेमी बलाम सुम्तीके निक्शी सेल्शा, निम्फा पटटी बोइक्ताक्म।

5 मिनु आ पाइक्तीके मेको कुचु तार वोइक्तीके का रेन सेल्तेक्म। मेको खाल का डा पा रिम्शो पा सेल्तेक्म। मेको पाइक्तीके सुन, नीलो, प्याजी नु लल रड डा श्येले नु रिम्शो पा किरशो सुती श्येले के प्रोव्रशो वा के सेल्तेक्म। परमप्रभु यावेमी मोसा कली दोपा अरेवा, मोपा सेल्तेक्म।

6 मिनु मेकोमी ओनीक्स हीरा निक्शी चाक्शा, इस्राएल आ तौ आन नें छाप खोदेशो पा हीराम मुशा ब्रेक्शा सुनम क्येप्ताक्म।

7 मेको हीरा निक्शी कुचु तार वोइक्तीक आ बला डा टुक्रा तारी फेरतेक्म। मिनु मेको हीरा इस्राएल आ तौ आन कली मिन्चा कली बाक्ब। परमप्रभु यावेमी मोसा कली दोपा अरेवा, मोपा सेल्तेक्म। प्रस्थान २८:१२

निसाफ पतीक झोला

8 मेकोमी निसाफ पतीके ऊरीम नु थुम्मीम वोइक्तीक झोला सेल्पाइक्तु। कुचु तार वोइक्तीके खोदेशो पा सुन, नीलो, प्याजी

नु लल श्येले नु रिम्शो पा किरशो सुती के प्रोव्रशो वा के दारशो पा सेल्लेक्म।

9 मेको खेयप का मुक्शोनु, बित्ता का लाइशो नु बित्ता का ब्रेम्शो ४ पाटे पा सेल्लेक्म।

10 मिनु ४ लस्कर हीरा सुनम का का पा क्येप्ताक्म। डोंइती डा लस्कर लल मानीक माइशो हीरा, हाव पुशपराज माइशो हीरा नु गिगी बेरूज माइशो हीरा क्येप्ताक्म।

11 मेको आ नोले डा लस्कर लल फिरोजा माइशो हीरा, बुश नीर माइशो हीरा नु बुश नु नीलो पन्ना माइशो हीरा क्येप्ताक्म।

12 मेको आ नोले डा लस्कर गिगी नु नीलो रड ब्वाइशो रिम्शो टल्केशो नीलमनी माइशो हीरा, गिगी हाकीक माइशो हीरा नु प्याजी रड डा कटेला माइशो हीरा क्येप्ताक्म।

13 मिनु नेल्ल क्येडा नोले डा लस्कर पीतमनी माइशो हीरा, लल रड डा ओनीक्स नु नीलो बिलौरा माइशो हीरा क्येप्ताक्म। मोपा हीरा नेल्ल कली सुनम क्येप्ताक्म।

14 मेको हीरा १२ ओटा बाक्तेक्म। मिनु इस्राएल आ तौ आन नें का का पा मेको आन तार छाप थोक्शो खोदेशो पा मुशा ब्रेक्शो बाक्तेक्म। हीरा का आ तारी थर का आ नें ब्रेक्शो बाक्त।

15 मेको निसाफ पतीक झोला कली क्येख सुन के डोरी किरशो खोदेशो पा सिक्री सेल्लेक्म।

16 मेकोपुकीमी निसाफ पतीक झोला कली सुन के ग्याइक्तीक निक्शी नु मुन्द्रा निक्शी चेम्तेक्म। मिनु मेको मुन्द्रा निसाफ पतीक झोला आ सुर निक्शीमी वोइक्तेक्म।

17 मेकोपुकीम सुन के सिक्री निक्शी निसाफ पतीक झोला आ सुरम वोइशो मुन्द्रा निक्शीमी लिक्ताक्म।

18 मेको सिक्री निक्शी चढेब आ कुचु तार वोइशो वा आ बला डा हीरा क्येप्शो सुनम हेक्ताक्म।

19 मेकोपुकीमी सुन के मुन्द्रा निक्शी सेल्लेक्म। मेको निक्शी निसाफ पतीके ऊरीम नु थुम्मीम वोइक्तीक झोला आ उइ आगा

गे पाइक्ताक्म। मोपा मेको झोला कुचु तार वोइक्तीके वा आ तार बाक्त।

20 मेकोपुकीमी लेंशा सुन के मुन्द्रा निक्शी सेल्लेक्म। कुचु तार वोइक्तीके आ बला सुम्तीके उइ डा सुरम वोइक्तेक्म। दारपाइश्शो पाइक्तीके आ तारी क्येप्ताक्म।

21 मिनु मेको निसाफ पतीके ऊरीम नु थुम्मीम वोइक्तीक झोला आ मुन्द्रामी नीलो डोरीम लिक्शा, कुचु तार वोइक्तीक वामी पाइक्ताक्म। मोपा मेको निसाफ पतीके झोला दारपाइश्शो पाइक्तीक तार बाक्शो कुचुम वोइक्तीक वा रे एर ओंथ मयाक्सेक्ल, दे पाइक्ताक्म। परमप्रभु यावेमी मोसा कली दोपा अरेवा, मोपा सेल्लेक्म।

कुचु तार वोइक्तीके आगा डा वा

22 मिनु मेको कुचु तार वोइक्तीके आगा फेक्तीक नेल्ल नीलो प्याजी रड डा वा के फेरतेक्म।

23 मिनु पिया ख्रीतीक पोव्रला सेल्लेक्म। मेको पोव्रला आ एर ओंथ मगाक्का डा पा आ सुर थम बोल्यो पा प्रोव्रतेक्म।

24 मेको फेक्तीके आ उइ डा सुर एर ओंथ गे नीलो, लल नु प्याजी रड नु रिम्शो किरशो सुती श्येले के प्रोव्रशो वा के सेल्शो दारीम क्युक्शा सेल्लेक्म।

25 मिनु मेकोपुकीम क्येख सुन के आइक्च किङगो सेल्लेक्म। फेक्तीक उइ गे किङगो का दारीम का खाक्शा क्युक्तेक्म।

26 किङगो का दारीम का नु किङगो का दारीम का पा खाक्शा, बिर हिरशा क्युक्तेक्म। मेको परमप्रभु यावे आ डोंइती गेय पची ना फेक्तीक वा दुम्त। परमप्रभु यावेम मोसा कली दोपा अरेवा मोपा सेल्लेक्म।

आगा डा फेक्तीके सेल्शो

27 हारून नु आ तौ आन कली रिम्शो पा किरशो सुती श्येले के प्रोव्रशो वा के फेक्तीक यो सेल्लेक्म।

28 रिम्शो पा किरशो सुती श्येले के प्रोत्रशो वा के पियाम रुक्तीक नु गुक्तीक ताकी नु सुरुवाल सेल्लेक्म।

29 रिम्शो पा किरशो सुती श्येले के प्रोत्रशो वा के नीलो, प्याजी नु लल रड डा श्येलेमी दारशो बुटा आप्शो किप्तीकपुकी सेल्लेक्म। परमप्रभु यावेमी मोसा कली दोपा अरेवा, मोपा सेल्लेक्म।

### कुप्फीम पांडतीके सेल्लो

30 मेकोपुकीमी क्येख सुन के फू खोदेशो पा कुप्फीम पांडतीके चेम्तेक्म। मेकेर छाप मुशो खोदेशो पा “परमप्रभु यावे कली ला” दे मुशा ब्रेक्ताक्म। प्रस्थान २९:६; प्रस्थान २७:३६; लेवी ८:९; जकरिया १४:२०;

31 कुप्फीम पांडतीके कली पियाम गुक्तीकेमी नीलो श्येलेमी फ्रेंताक्म। परमप्रभु यावेमी मोसा कली दोपा अरेवा, मोपा सेल्लेक्म।

### मोसामी ताम्बु डा गेय कोत्रशो

32 मिनु परमप्रभु यावे आ बाक्तीक गुम्तीक ताम्बु डा गेय नेल्ल नुम्त। परमप्रभु यावेमी मोसा कली दोपा अरेवा, मोपा इस्राएल डा मुरपुकीमी नेल्ल सेल्लेक्म।

33 मिनु मेकोपुकीमी परमप्रभु यावे आ बाक्तीक नु आ मारेइ मारेइ मोसा आ बाक्तीकेमी चाक्तेक्म। मार मार चाक्गमे बाक्त देशा हना, ताम्बु नु आ ग्योब नेल्ल, ब्वेक्तीक, फलेक, लाइशो कोक्के, थाम नु राप्पाइक्तीकपुकी,

34 लल रडम नुप्शो सांड आ कुशुल के सुम्तीके, नेल्ल क्येडा रिम्शो कुशुल के सुम्तीके, फारतीके,

35 कबल पशो सन्दोस, मेको आ कुरतीक कोक्के नु सुम्तीके,

36 टेबलम वोइक्चा माल्लो मारेइ मारेइ नु कोंइतीक शोब्ले,

37 क्येख सुन के बत्ती दातीके नु आ दियारी आन कली ठीक सेल्लेक्के थोत्रक नु बत्ती कली तेल,

38 सुन के चढ़ेतीक, लुक्चा कली तेल, ब्रोव्रशो रिना पाइब धूप, ताम्बु ओव्रतीके डा फारतीक वा,

39 कांसा के चढ़ेतीक, मेको आ कांसा के मी तिक्तीक जाली, कुरतीक कोक्के नु चढ़ेतीक आ मारेइ मारेइ, चिक्तीक ठेयब बोस नु मेको निप्पाइक्तीके,

40 ताम्बु आ लाडगा डा फारतीक नु थामपुकी, आन राप्पाइक्तीकपुकी, लाडगा ओव्रतीक डा फारतीक वा, आ फ्रेंतीकपुकी नु किलापुकी, मिनु परमप्रभु यावे आ बाक्तीक गुम्तीक ताम्बु डा गेय पचा कली मारेइ मारेइ नेल्ले,

41 परमप्रभु यावे आ बाक्तीक डा गेय पचा कली हारून कली फेक्तीक वा नु आ तौ आन कली परमप्रभु यावे कली चढ़ेब दुम्चा कली आन फेक्शा गेय पतीके वा नेल्ल चाक्तेक्म।

42 परमप्रभु यावेमी मोसा कली दोपा अरेवा, मोपा इस्राएल डा मुरपुकीमी सेल्लेक्म।

43 मिनु मोसामी मेको नेल्ल कोव्रतु। मिनु परमप्रभु यावेमी दोपा अरेवा, मोपा ठीक सेल्लशो तशा, मोसामी मेको नेल्ल आन कली आसीक गेप्तु।

## 40

गुम्तीक ताम्बु कीचा शेंशो

1 मिनु परमप्रभु यावेमी मोसा कली

2 “डोंइती डा महिना डा डोंइती नाक्ती, आं बाक्तीके गुम्तीक ताम्बु कीडो। प्रस्थान ४०:१७; प्रस्थान १२:२; प्रस्थान १९:१

3 गे कबल पशो सन्दोस आगाम वोइश्शा, फारतीक वाम फारदो।

4 टेबल ओंइशा, मेको तारी मार मार वोइक्चा माल्बा, ठीक पा वोतो। मिनु बत्ती दातीके ओंइशा आ दियारी दाडो।

5 सुन के धूप चोशा चढ़ेतीके कबल पशो सन्दोस आ डोंइती वोतो। आं बाक्तीक आ ओव्रतीक डा फारतीक वा क्युक्को।

- 6 ग्रुम्तीक ताम्बु आ ओव्रतीक आ डोंइती चोशा चढेतीके वोतो।
- 7 ग्रुम्तीक ताम्बु नु चढेतीक आस दातेम चिकतीक ठेयब बोस वोइशशा, ब्वाक्कुम प्रिंदो।
- 8 लाङगा डा थाम वोइशशा, एर ओंथ हिरशा फारतीक वा नु ओव्रतीक डा फारतीक वा क्युक्को।
- 9 मिनु गे लुक्या कली तेल चाक्शा, आं बाक्तीक नु मेकेर डा मारेइ मारेइ आन कली 'परमप्रभु यावे केन बाक्ब' दे तेल लुकतो। मोपा मेको नेल्ल आं के दुम्नीम।
- 10 चोशा चढेतीक नु मेको आ मारेइ मारेइ आन कली यो 'परमप्रभु यावे केन बाक्ब' दे तेल लुकतो। मोपा मेको नेल्ल यो आं के दुम्नीम।
- 11 चिकतीक ठेयब बोस नु मेको आ निप्पाइक्तीके कली यो तेल लुकतो। मिनु मोपा मेको आं के दुम्ब।
- 12 मिनु हारून नु आ तौ आन कली, ग्रुम्तीक ताम्बु डा ओव्रतीकेम चाक्शा चिकतो।
- 13 आं कली चढेब दुम्पाइक्चा कली हारून कली चढेतीक वा फेक्पा, तेल लुकशा आं कली जिम्मा गेयी।
- 14 आ तौ आन कली यो चाक्शा, वा फेक्तो।
- 15 आन आफ कली खोदेशो पा मेको आन कली यो तेल लुकतो। मेकोपुकी यो चढेब दुम्शा, आं गेय पचा माल्नीम। मेको तेल लुकतीके आन चच युइ आन पाला नेल्लेमी गेना हना यो आं कली चढेब दुम्नीम" देंत।
- 16 मिनु परमप्रभु यावेमी मोसा कली दोपा अरेवा, मोपा पाप्तु।

### ग्रुम्तीक ताम्बु कीशो

- 17 इजीप्त रे गाक्मा आ नोले जाक्शो बर्स आ डोंइती डा महिना, डोंइती डा नाक्ती परमप्रभु यावे आ बाक्तीक ताम्बु कीतेक्म।



30 मोसामी ग्रुम्तीक ताम्बु नु चढेतीक आस दातेमी चिकतीक ठेयब बोस वोइशशा, चिकचा कली ब्वाक्कुम प्रिंताक्व।

31 मिनु मोसा, हारून नु हारून आ तौपुकीमी आन गुइ खोइली चिकसाक्म।

32 ग्रुम्तीक ताम्बुमी ओव्रशा चढेतीकेम लमानु, आन गुइ खोइली चिकचा माल्तेक्म। परमप्रभु यावेमी मोसा कली दोपा अरेवा, मोपा पाप्तु।

33 मोसामी ग्रुम्तीक ताम्बु नु चढेतीक आ लाडगा एर ओंथ नेल्ल थरपु हिरशा, आ ओव्रतीके डा फारतीक वा क्युकुतु। मोपा मोसामी ग्रुम्तीक ताम्बु डा गेय नेल्ल थुम्तु।

परमप्रभु आ बाक्तीकेम जाक्शो

34 मिनु गोस्सुमी ग्रुम्तीक ताम्बु सुम्तु। परमप्रभु यावे आ सक्ति नु छेडछेडमी मेको आ बाक्तीक ब्रीत। इजीकीएल ४३:१-९

35 मिनु मोसा ग्रुम्तीक ताम्बुमी ओव्रने मचब। मारदे हना मेको गोस्स मेको तारी बाक्शा, परमप्रभु यावे आ सक्ति नु छेडछेडमी आ बाक्तीक ब्रीत। गन्ती ७:८९

36 मेको गोस्स परमप्रभु यावे आ बाक्तीक तारी रे ग्येत्थ बोक्मेनु, इस्राएलीपुकी गाक्चा गोम्तेक्म। प्रस्थान १३:२१; गन्ती ९:१५-२३; गन्ती १०:३४-३६; १राजा ८:१०-११; यसेया ४:५

37 मेको गोस्स ग्येत्थ मबोक्म सम्म इस्राएली मेक उइ बाक्तेक्म।

38 नाक्ती परमप्रभु यावे आ गोस्स आ बाक्तीक तारी बाक्त। नाक्दो चहिं मेको गोस्स आगाम मी दुम्त। इस्राएली गोरशो रागीम गाक्मा सम्म मोदेशो दुम्स डा दुम्स पा नेल्लेमी ताम्तेक्म।

## परमप्रभु यावे आ लोत्र

### **Bible in Sunwar (NP:suz:Sunwar)**

copyright © 2011 Wycliffe Bible Translators, Inc.

Language: Sunwar

Translation by: Wycliffe Bible Translators, Inc.

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937101646

**The Bible without Deuterocanon**

in Sunwar

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

27cd6a1c-0244-5add-a4e8-b4f0e5104473